

O LE EKALESIA A IESU KERISO O LE AU PAIA O ASO E GATA AI • JANUARI 2014

O Leiphona



**Iosefa Filitia
Samita: Puipuia o le
Faatuatuaga, i. 32**

**O Le Eklesia i Mekisiko —
O Se Talafaasolopito Mauoa,
o se Lumanai Matagofie, i. 24**

**Autu o le Mutuale 2014,
i. 50, 52, 53**

**Gaoioiga Valivali ma le Siata
Faitau mo le Feagaiga Tuai,
i. 74, 76**



*"O nisi o outou atonu
ua manatu ifo e le
mafai ona outou o
ese mai vaitoa eleelea,
ua faapea e faigata
tele o outou tulaga,
ma faigata tele o
outou tofotofoga, ua
maoae naua o outou
faaososoga. . . la
manatua, o le au o le
lili vai e ola i faigata,
ma e pei ona siitia e
le 'au ia le lili o le vai,
e faapena foi ona
lagolagoina ma siitia
oe e lou faatuatua."*

Mary N. Cook, o le sa avea
muamua ma Fesoasoani Lua i le au
peresitene aoao a Tamaitai Talavou,
"Taula o Molimau," *Liahona*,
Me 2008, 122.



O SAVALI

- 4 Savali a le Au Peresitene Sili: O Le Taimi Sili ona Lelei e Totoina ai se Laau**
Saunia e Peresitene Dieter F. Uchtdorf
- 7 Savali a Faiaoga Asiasi: O Le Misiona Paia a Iesu Keriso: Faataitaiga**

TALA FAAALIA

- 18 Faafetaiaia o le Lumanai ma le Faatuatua ma le Faamoe**
Saunia e Elder M. Russell Ballard
E tatau ona tatou tuuto atu ma le faapaiaaina o tatou olaga i le galuega a le Faaola, savaivali i le faatuatua ma galulue ma le talitonuga maumaututu.

- 24 O Paionia i Atunuuma:**
Ua Matale mai Mekisiko — Mai le Tauiviga i le Malosi
Saunia e Sally Johnson Odekirk
Na faia e le Au Paia o Aso e Gata Ai i Mekisiko ni osigataulaga se tele ina ia faatuina le Ekalesia i lo latou atunuuu.

- 32 Faamaoni ma Faatuatua:**
Musumusuga mai le Soifuuga ma Aoaoga a Iosefa Filitia Samita
Saunia e Hoyt W. Brewster Jr.
Feiloai i se perofeta o aso nei o le sa masau lana ta i le peisipolo ma agamalu ma sa auauna atu faamaoni i le Alii.

I LE FAAVAA

Luma: Ata o Iosefa Filitia Samita na pueina i le aso 26 o Aperila, 1910, ina ua faatoa mavae le faauuina o ia o se Apostololo i le 33 o ona tausaga. Faavaa i totonus i le pito i luma: Ata na pueina e LaRene Porter Gaunt.

MATAGALUEGA

- 8 Tusigāmanatu o le Konafesi o Oketopa 2013**
- 10 Tatou te Talanoa ia Keriso: Mai le Pouliuli i le Malamalama**
Taofia le igoa
- 12 O Perofeta o le Feagaiga Tuai: Atamu**
- 14 Tala Faamamai o le Talalelei: O Le Aiga Atua Paia**
Saunia e Peresitene Gordon B. Hinckley
- 17 Aoao Atu Mo Le Malosi o le Autalavou: Tausia o le Aso Sapati**
- 38 O Leo o le Au Paia o Aso e Gata Ai**
- 80 Seia Tatou Toe Feiloai: E mafai ona la Vaai ia te Au?**
Saunia e Teresa Starr



42

42 Tumau ma le Lelei

Saunia e Elder J. Christopher Lansing
*O le a le mea o finagalo le Alii
 tatou te faia pe afai ua faigata
 mo i tatou ona ausia o tatou
 faamoemoega ma miti?*



46

**46 Sauniaina o Meaalofa mo
 Lou Aiga i le Lumanai**

Saunia e Peresitene Henry B. Eyring
*O a meaalofa e mafai ona e atina
 ae nei e faamanuiaina ai lou aiga
 i le lumanai?*

50 Autu o le Mutuale 2014

Saunia e le au peresitene aoao o
 Alii Talavou ma Tamaitai Talavou
*"O mai ia Keriso, ma faaatoatoa-
 ina ia te ia, ma faafiti outou lava
 mai mea uma e le faaleatua."*

**52 O lea Mataupu ma lea Mataupu:
 Moronae 10:32**

*O le autu o le Mutuale o le tausaga
 lenei e aoao ai oe e uiga i le ala i
 le atoatoa.*

**53 Pepa Lautele o I Ai se Savali:
 O Mai ia Keriso****54 E Mafai Faapefea e le lloaina
 o le Aiga Atua ona Suia Au?**

Saunia e Lori Fuller
*O mataupu faavae nei e lima e
 faatatau i le Aiga Atua e mafai
 ona suia le auala e te ola ai —
 i ni auala tetele ma laiti.*

**56 Mo Le Malosi o le Autalavou:
 Ou Te Manatua Pea o la**


Saunia e Larry M. Gibson
*O le tausia o le aso Sapati ia paia
 e faaalia ai lo outou tuuto atu ia
 outou feagaiga.*

58 Faaopoopo Atu i le Manuia

Saunia e Daniel Kawai
*Na tatau i se tagata tauva i le tau-
 vaga o le matematika ona filifili i
 le va o le tausia o le aso Sapati ia
 paia po o le faaleaogaina.*

59 Tuusao i le Mataupu**60 O Vaega Uma e Lua
 o le Faamanuiaga**

Saunia e Brittany Beattie
*E mafai ona tatou maua faama-
 nuiaga faaopoopo pe a tatou
 sailia igoa o o tatou lava aiga
 ma ave i latou i le malumalu.*

64 O La Tatou Avanoa

72

**66 Uo i le Lalolagi:
 O Mahonirae ma
 Helamana mai Mekisiko****68 Molimau Faapitoa: O le a le
 uiga o le avea ma se Kerisiano?**

Saunia e Elder Robert D. Hales

69 Uo i le Lalolagi: Tusifolau**71 O La Tatou Itulau****72 E Faapei Lava o Tusitusiga Paia!**

Saunia e Renae Weight Mackley
*O tusitusiga paia e mafai ona avea
 e pei lava o lo'u olaga!*

74 Lu'i o Mau o le Feagaiga Tuai**77 O Le Auala Faaofuofu
 o le Manumalo**

Saunia e Rosemary M. Wixom
*O ai e mafai ona faasino ia
 te oe le ala e toe foi atu ai i
 le Tama Faalelagi?*

78 Aumaia o le Peraimeri i le Fale:

Na Saunia e le Tama Faalelagi
 se Auala mo Au e Toe Foi atu
 ai ia te la

**81 Atatosi o le Perofeta:
 Harold B. Lee**

JANUARI 2014 VOL. 38 NU. 1

O LE LIAHONA 10981 890

O Le Lomiga Faamaonia Faa-Samoa a le Ekalesia a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Aposteto e Toasefululu:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Jose L. Alonso, Mervyn B. Arnold, Shayne M. Bowen, Stanley G. Ellis, Christoffel Golden

Pule Faatonusili: David T. Warner

Faatonusili o le Lagolago mo Aiga ma Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr

Au Tusitusi ma Faatonutonu: Susan Barrett, Brittany Beattie, David Dickson, David A. Edwards, Matthew D. Flitton, Mindy Raye Friedman, Lori Fuller, Garrett H. Garff, LaRene Porter Gaunt, Jennifer Grace Jones, Michael R. Morris, Sally Johnson Odekirk, Joshua J. Perkey, Jan Pinborough, Richard M. Romney, Paul VanDenBerghe, Marissa Widdison

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, C. Kimball Bott, Tom Child, Nate Gines, Colleen Hinckley, Eric P. Johnsen, Susan Lofgren, Scott M. Mooy, Mark W. Robison, Brad Teare, K. Nicole Walkenhorst

Faatonu o le Puetaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Kevin C. Banks, Connie Bowthorpe Bridge, Julie Burdett, Bryan W. Gygi, Denise Kirby, Ginny J. Nilson, Gayle Tate Rafferty

Tailolomi: Jeff L. Martin

Faatonusili Lolumiga: Craig K. Sedgwick

Faatonusili o le Tufatufaga: Stephen R. Christiansen

Mo le okaina o mekasini, alu i le store.Ids.org po o le Falefutsi Totutonu i Pesega, Telefoni 64127. Totogi o le Mekasini: \$0.55 (Samoa) I le kopī. Totogi mo le Tausaga Atoa \$6.60 (Samoa).

Auina atu tusitisiga ma faafesili i luga o le initoneti i le liahona.Ids.org: pe meli mai i le Liāhona, Rm. 2420, 50 E. North Temple, Salt Lake City, UT 84150-0024, USA; po o le i-meli: liāhona@ldschurch.org.

O Le Liāhona (o lona uiga i le Tusi a Mamona o le "tapasa" po o se "faatonuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaoitia, Siekisolvakia, Tenimaka, Take, Igilisi, Estonia, Fiti, Finelani, Farani, Siāmani, Eleni, Hanikeri, Initu, Iselani, Inritonesia, Italia, Iapani, Kiripati, Korea, Lativia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafagofieina), Silovenia, Sipāniolo, Suetena, Swahili Tagaloka, Tahiti, Tai, Toga, Iukureini, Urutu, ma Viatenam. (E eseese lava gagana.)

© 2014 Puetaofia e le Intellectual Reserve, Inc. Ua taofia ai tatua uma. Lomia i le lunaite Setete o Amerika.

E mafai ona kopī tala ma ata o le Liāhona mo le toe faaaogaina i lotu po o le aiga ae ia le faia ai ni pisinisi. E le tatau ona kopī ni tala po o ni ata pe afai o faasa mai i le laina o loo tā ua ai le e ona lea faatufugaga. Auina atu feisili e uiga i le puetaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

January 2014 Vol. 38 No. 1. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send all UAA to CFS (see DMM 707.4.12.5). NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.

Manatu mo Afiafi Faaleaiga

O lenei lomiga o loo i ai tusiga ma gaoioiga e mafai ona faaaoga mo afiafi faaleaiga.
O ni manatu nei e lua.



ATA NA SAUNIA E CODY BELL

"Sauniaina o Meaalofa mo Lou Aiga i

le Lumanai, itulau 46: A uma ona faiatū le tusiga a Peresitene Eyring, mafaufau e fai se faaliga taleni faaleaiga lea e mafai ona fefaasoai ai taleni a matua ma fanau. A uma ona maua e tagata uma le avanoa e faasoa atu ai, e mafai e matua ona faamatala atu ni auala o le a faamanuiaina ai e a latou taleni le aiga. E mafai ona e valaaulia tamaiti e faasoa mai pe faapefea ona faamanuiaina le aiga e a latou taleni—ma pe faapefea ona faamanuiaina ai o latou aiga i se aso i le lumanai. Atonu

e mafai e matua ona uunaia le fanau e faatutu ni sini ina ia faaaauau pea ona atiina ae a latou taleni.

"Lui o Mau o le Feagaiga Tuai,

itulau 74: Mafaufau e amata le lui o mau o le Feagaiga Tuai o se aiga E mafai ona aveese le siata valivali mai le mekasini pe lolomi se kopi mai liāhona.Ids.org e faailoga ai lou alualu i luma. Faiatū ma talanoaina faatasi o se aiga ia mau ua fautuaina atu ma mafaufau e fai se fuafuaga e faamaea ai le lui o le faiatū faalevaiaso i lenei tausaga.

I LAU GAGANA

O loo maua le O Le Liāhona ma isi tusi a le Ekalesia i le tele o gagana i le languages.Ids.org.

AUTU I LENEI LOMIGA

E ta'u mai e numera le itulau muamua o le tusiga.

Afio Mai Faalua, 18

Agaga Paia, 14, 40, 54,
64, 81

Aiga, 46, 60, 64

Aiga Atua, 14, 54

Ata o le faaolataga, 78

Atoatoa, 50, 52

Auauna atu, 40

Autu o le mutuale, 50,
52, 53

Faamaualuga, 10

Faamoemoe, 18

Faataitaiga, 7

Faatuatua, 18

Feagaiga, 56, 58

Feagaiga Tuai, 12, 74

Filemu, 41

Galuega faafaifeautalai,
38, 59

Iesu Keriso, 7, 14, 50, 52,
54, 56, 68

Kerisiano, 40, 68

Lee, Harold B., 81

Lotomaualalo, 10

Malumalu, 24, 39, 60

Manuia, 18

Mekisiko, 24, 39, 66

Molimau, 64

Olaga Faaletino, 12, 42, 78

O Le Tofi, 24, 32

Paionia, 24

Pau o Atamu, 12

Salamo, 4, 10, 46

Samita, Josefa Filitia, 32

Sapati, 17, 56, 58

Sini, 4, 18, 46

Talafaasolopito o aiga,
60, 64

Tama Faalelagi, 14, 54,
77, 78, 80

Tamaiti, 41

Tatalo, 64

Tofotofoga, 42

Togiola, 4, 10, 14, 54

Tumau, 42, 72

Tusi a Mamona, 38



Saunia e Peresitene
Dieter F. Uchtdorf

Fesoasoani Lua i le
Au Peresitene Sili

O LE TAIMI SILI ONA LELEI E Totoina ai se Laau

TRoma anamua, na avea Janus ma atua o le amataga. E masani ona faailoa mai o ia ma ni foliga se lua—o se tasi o tepa i tua i le taimi ua tuanai, ma le isi o vaavaai atu i luma i le lumanaia. O nisi o gagana e faaigoaina le masina o Ianuari ia te ia ona o le amataga o le tausaga o se taimi mo le toe manatunatuga faapea foi ma fuafuaga.

O le faitau afe o tausaga mulimuli ane, e faaauauina ai e le tele o aganuu i le lalolagi atoa se tu masani o le faia o ni folafolaga mo le tausaga fou. E moni, o le faia o ni folafolaga e faigofie—ae o le tausiaina o se mea e ese mai ai lava.

Sa faia e se tasi alii se lisi umi o folafolaga mo le Tausaga Fou ma maua ni lagona lelei i lona alualu i luma. Sa ia mafaufau ia te ia lava, “E oo mai i le taimi nei, o loo ou tausia lava au meaai paleni, ou te le o toe ita, o lea ou te tumau i lau paketi, ma ou te le o toe tomumu lava i le tai-fau a le tuaoi. Ae o le asō o le aso 2 o Ianuari ma na tatagi le faailo o le uati ua oo i le taimi ou te ala ai i luga. O le a manaomia se vavega e faaauau ai pea ona ou tumau ma mulimuli i au sini uma.”

Toe Amataina

O loo i ai se mea faamoemoeina ofoofogia e uiga i se amataga fou. Ou te matea i se tasi taimi po o le isi foi na tatou mananao uma lava e faia se amataga fou e aunoa ma ni mea sese.

Ou te fiafia i le mauaina o se komepiuta fou ma se utugagana mama a le komepiuta. E lelei atoatoa mo se taimi. Ae a o faagasolo pea ia aso ma vaiaso ma amata faapipiina

le tele ma le tele o polokalama (o nisi e faamoemoeina, o nisi e le faamoemoeina), o le a iu lava ina faifaiaga le komepiuta, ma o mea sa masani ona vave ma lelei le faiga ua amata ona tuai. O nisi taimi e le ola ai lava. E oo lava i le amataina o le a avea ma se galuega pe a tumu le utugagana a le komepiuta i le anoanoai o lapisi faalavefau o faamatallaga ma faatekinolosi. O le a i ai ni taimi e na o le pau le mea e fai o le toe tapeese o le utugagana o le komepiuta ma toe amataina.

E mafai foi ona faatumulia tagata soifua i le fefe, masaloso, ma le tausalaina i avega mamafa. E mafai foi e mea sese na tatou faia (fuafuaina ma lei fuafuaina) ona avea ma avega i o tatou luga seia oo ina foliga mai ua faigata le faia o le mea tatou te iloa e tatau ona tatou faia.

I le tulaga o le agasala, o loo i ai se faagasologa o le toe faatulagaina matagofie e ta'ua o le salamo lea e mafai ai e i tatou ona faamamaina o tatou utugagana faakomepiuta mai faaletonu ia ua mamafatu i o tatou loto. O le talalelei, e ala i le Togiola faavavega ma le alofa o Iesu Keriso, ua faaalia mai ia i tatou le ala e faamama ai o tatou agaga mai pisipisia o le agasala ma toe faafouina, atoatoa, ma mama e pei o se tamaitiiti.

Ae o nisi taimi e i ai isi mea e faatuia ma taofia i tatou, ma mafua ai ni mafauauga ma faatinoga le aoga ma faafai-gata ai mo i tatou ona toe amatalia.

Faaalia Mai o lo Tatou Tagata Sili

O le faatutuina o sini o se taumafaiga taua. Ua tatou iloa o loo i ai ni sini a lo tatou Tama Faalelagi aua na Ia fetalai



mai o Lana galuega ma le mamalu lenei o le “ia aumaia le tino ola pea ma le ola e faavavau o le tagata” (Mose 1:39).

O tatou sini faaletagata lava ia e mafai ona faaalia mai ai lo tatou tagata sili. Ae peitai, o se tasi o mea e faalavelave ia tatou taumafaiga i le osia ma tausia o faaiuga o le faatuai lea. O nisi taimi e faatuai ai ona tatou amata, faatalitali mo le taimi sa’o e amata ai—o le aso muamua o se tausaga fou, o le amataga o le taumafanafana, ina ua valaauna i tatou o se epikopo po o le peresitene o le Aualofa, ina ua

amata ona aooga le fanau, pe a tatou litaea.

E te le tau manaomia se valaaulia ae e te lei agai atu i le ala o au sini amiotonu. E te le tau faatali mo se faatagaga e avea ma tagata na foaoaina ai oe e avea ai. E te le tau faatali seja valaaulia e auauna atu i le Ekalesia.

E mafai i nisi taimi ona tatou faamaumauina tausaga o o tatou olaga e faatalitali ai ina ia filifilia (tagai i le MF&F 121:34–36). Ae o se manatu sese lena mea. Ua uma ona filifilia oe!

E i ai taimi i lo’u olaga sa ou

AOAO ATU MAI LENEI SAVALI

Na faamalamalama mai e Peresitene Uchtdorf faapea afai tatou te le ausia a tatou sini, “e mafai ona faamalosia i tatou. . . . E ui lava ina atonu tatou te le taunu i lo tatou tini, ae o le faaauauina o le malaga o le a avea ai i tatou ma tagata sili atu nai lo le taimi muamua. Fai atu i tagata o le aiga e faasoa mai ni aafiaga na latou aoaoina atili mai i le faagasologa nai lo mea na latou aoaoina mai le taunuuga, e pei o le faauu mai le aoga po o le mauaina o se taui.

faaaluina ai ni po o le le moe e tauivi ai ma ni faafitauli, popolega, po o faanoanoaga patino. Ae po o le a le pogisa o le po, e faamalosiauina lava au i lenei manatu: o le a oso ae lava le la i le taeao.

O aso fou taitasi, e tafa mai ai se ata fou—e le gata mo le lalolagi ae faapea foi mo i tatou. Ma faatasi ai la ma se aso fou o le a oo mai ai se amataga fou—o se avanoa e toe amata ai.

Ae Faafefea pe Afafai Tatou Te Toilalo?

O nisi taimi o le mea o taofia mai i tatou o le fefe. Atonu tatou te fefefe

nei o tatou toilalo, nei o tatou manuia, nei faamaasia i tatou, nei suia i tatou e le manuia, pe suia tagata tatou te alolofa i ai.

Ma o lea tatou te faatali ai. Pe faavaivai.

O le isi mea e tatau ona tatou manatua pe a oo mai i le faatutuina o sini o le mea lenei: E toetoe lava a tatou toilalo—o le mea sili i se tulaga puupuu. Ae nai lo le lotovaivai, e mafai ona faamalosia i tatou aua o lenei malamalamaaga e aveesea ai le mamafa o le atoatoa i le taimi nei. Sa faailoa mai le amataga i se tasi taimi po o se isi, atonu tatou te le ausia le atoatoa. O le muai iloaina o lenei

mea e aveese ai le tele o le ofo ma le lotovaivai o le toilalo.

A tatou taulimaina a tatou sini i lenei auala, e le tatau ona faatapulaaina i tatou e le toilalo. Ia manatua, e tusa lava pe tatou te le oo atu i le taimi lava lea i lo tatou taunuuga sili ma moomia, ae ua tatou alualu i luma i le aluga o le ala o le a tau atu i ai.

Ma o le mea lena e taua—e taua tele.

E ui lava atonu tatou te le tauuu i lo tatou tini, ae o le faaauauina o le malaga o le a avea ai i tatou ma tagata sili atu nai lo le taimi muamua.

O Le Taimi Sili e Amata Ai o le Taimi Nei

Na fai mai se alagaupu tuai, “O le taimi sili ona lelei e totoina ai se laau o le 20 tausaga ua mavae. O le taimi sili lona lua o le taimi nei.”


O loo i ai se mea matagofie ma faamoemoeina e uiga i le upu *nei*. O loo i ai se mea mamana e uiga i le mea moni e faapea afai tatou te filifili i le taimi nei, e mafai ona tatou agai i luma i le taimi lava lenei.

O le taimi *nei* o le taimi sili lea ona lelei e amata ai ona tatou avea ma tagata tatou te fia avea ai—e le gata i le 20 tausaga mai le taimi nei, ae faapea foi mo le faavavau atoa. ■

AUTALAVOU

Ia Avea ma Lou Tagata Sili ona Lelei—Amata i le Taimi Nei

Na aoao mai peresitene Uchtdorf faapea “o ni sini patino e mafai ona aumaia lo tatou tagata sili ona lelei”. Mafaufau e seti ni sini i ni vaega se lua pe tolu o lou olaga, e pei o le soifua maloloina faaletino, soifua maloloina faaleagaga, ma faauoga, mo se faataitaiga. O a faamanuiaga e te manao i ai i nei vaega i lenei tausaga? A o e mafaufau ma le agaga tatalo i nisi o sini, ia mautinoa e mafai ona ausia ae o le a manaomia ai foi lou tuputupu ae. I lau api o talaaga, faamata lau auiliili mai au sini ina ia mafai ona e iloa ai lou alualu i luma pe a mavae le tausaga.



Ia suesue ma le agaga tatalo i lenei anomea ma saili ia iloa le mea e faasoa atu. Efaapefea e le malamalama i le sofiuaga ma le misiona a le Faaola ona faateleina ai lou faatuatua ia te la ma faamanuia ai isi e te leoleoina e ala i faiaoga asiasi? Mo nisi faamatalaga, alu i le reliefsoociety.lds.org.


O Le Misiona Paia a lesu Keriso: Faataitaiga

O se vaega lenei o se faasologa o Savali a Faiaoga Asiasi e faaautu i le vaega o le misiona a le Faaola.

Ao tatou malamalama o Iesu Keriso ao lo tatou faataitaiga i mea uma, e mafai ona tatou faateleina lo tatou naunau e mulimuli ia te Ia. Ua tumu tusitusiga paia i faamalosiauga mo i tatou e mulimuli i tulagavae o Keriso. Na fetalai atu Keriso, i le au sa Nifae, “Ona o galuega na outou vaai na ou faia o mea ia tou te faia foi” (3 Nifae 27: 21). Na fetalai atu Iesu ia Tomasi, “O a’u nei le ala, ma le upu moni, ma le ola: e le alu atu lava se tasi i le tama, pe a le ui mai ia te a’u” (Ioane 14:6).

I lenei vaitaimi ua faamanatu mai e o tatou taitai ia i tatou e faatuina le Faaola e avea ma o tatou faataitaiga. Na saunoa mai Linda K. Burton, peresitene aoao o le Aualofa, “A oo ina tusia i le taele o o tatou loto taitoatasi le aoaoga faavae o le togiola, ona amata lea ona avea i tatou ma ituaga o tagata e finagalo ai le Alii.”¹

Na saunoa mai peresitene Thomas S. Monson, “O lo tatou Alii



ma le Faaola, o Iesu Keriso, o lo tatou Faataitaiga ma lo tatou malosiaga.”²

Ia tatou filifili e faalatalata atili atu ia Iesu Keriso, ia ususitai i Ana poloaiga, ma taumafai e toe foi atu i lo tatou Tama Faalelagi.

Mai Tusitusiga Paia

2 Nifae 31:16; Alema 17:11;
3 Nifae 27:27; Moronae 7:48

FAAMATALAGA

1. Linda K. Burton, “Pe Ua Tusia ea i o Tatou Loto le Faatuatua i le Togiola a Iesu Keriso?” *Liahona*, Nov. 2012, 114.
2. Thomas S. Monson, “Faafetaiaia o Lui o le Olaga,” *Liahona*, Ian. 1994, 82.
3. “Ma’eu le Poto ma le Alofa,” *Viiga*, nu. 109.
4. Dieter F. Uchtdorf, “O Le Fiafia, O Lo Outou Talatuu,” *Liahona*, Nov. 2008, 120.



Faatuatua, Aiga,
Toomaga

Mai lo Tatou Talafaasolopito

“Sa la faailogaina le ala ma taitai atu ai le ala,” na tusia e Eliza R. Snow, o le peresitene aoao Iona lua o le Aualofa, e uiga i le galuega faaletino a Iesu Keriso.³ Na auauna atu o la i tagata—taitoatasi. Sa la aoao mai e tatau ona tatou tuua le ivasefulu ma le iva ae laveai le tasi ua se (tagai i le Luka 15:3–7). Na la faamaloloina ma aoaoina tagata taitoatasi, e oo lava i le faavanoaina o le taimi mo tagata taitoatasi o i le motu o tagata e 2,500 (tagai i le 3 Nifae 11:13–15; 17:25).

I tamaitai o le Au Paia o Aso e Gata Ai, na saunoa mai i ai, Peresitene Dieter F. Uchtdorf, Fesoasoani Lua i le Au Peresitene Sili, e faapea: “E tuuina atu e outou na tuafafine ofoo fogia galuega alofa i isi mo mafuaaga e sili mamao atu nai lo manaoga mo manuia faaletagata lava ia. Ua outou faaaoao ai i le Faaola. . . . O Lona finagalo ia fesoasoani atu i isi.”⁴

O Le A se Mea e Mafai Ona Ou Faia?

1. Aisea ma e faapefea ona avea Iesu Keriso ma ou faataitaiga?
2. E mafai faapefea e le auauna atu i uso o ou asia ona fesoasoani ia te au e mulimuli i le Faaola?

TUSIGĀMANATU O LE KONAFESI O OKETOPA 2013

"O le mea ua fai atu ai A'u o le Alii, ua Ou fai atu ai; . . . pe i lo'u lava leo po o i le leo o a'u auaua, ua tutusa lava" (MF&F 1:38).

A o e suesueina le konafesi aoao ia Oketopa 2013, e mafai ona e faaaogaina nei itulau (ma Tusigāmanatu o le Konafesi i lomiga i le lumanai) e fesoasoani ai ia te oe e suesue ma faaaoga aoaoga talu ai nei a perofeta soifua ma aposetolo ma isi taitai o le Ekalesia.



Folafolaga Faaperofeta: Fetaiai Ma Tofotofoga

O lo tatou Tama Faalelagi, o le o loo tuuina mai ia i tatou le tele o mea e fiafia ai, ua la silafia foi tatou te aoao ma tuputupu ae ma malosi atili ao tatou fetaiai ma manumalo mai tofotofoga ia e tatau ona tatou pasia. Ua tatou iloa e i ai taimi o le a tatou lagonaina ai le faanoanoa o le lotonutimomoia, o taimi tatou te faavauvau ai, ma taimi atonu o le a tofotofoina ai i tatou i le mea e gata ai. Peitai, o ia faigata e faatagaina ai i tatou ia suia mo le lelei sili atu, ia toe fausia o tatou olaga i le ala ua aoao ai i tatou e lo tatou Tama Faalelagi,

ma ia avea ma se tagata e ese mai le tagata sa tatou avea ai — ia lelei atu nai lo le mea sa tatou i ai, sili atu ona malamalama nai lo le mea sa tatou i ai, sili atu ona tigaalofa nai lo le mea sa tatou i ai, faatasi ai ma ni molimau malolosi atu nai lo a tatou molimau sa i ai muamua.

E tatau ona avea lenei ma a tatou faamoemoega — e le gata ia tumau ma onosai, ae ia faapena foi ona faamamaina atili faaleagaga a o tatou ola i taimi lelei ma taimi leaga. Ana le seanoa mo luitau ia faatoilaloina ma faafitaui ia foiaina, semanu o le a tatou tumau ai lava i le mea e tasi, i sina alualu i luma pe leai foi e agai atu i la tatou sini o le ola e faavavau."

Peresitene Thomas S. Monson, "Ou Te Le Tuua Lava Oe, Ou Te le Tuulafoai Lava ia te Oe," *Liahona*, Nov. 2013, 87.

Ina ia faitau, matamata, pe faalogologo foi i lauga o le konafesi aoao, asiasi ane i le conference.lds.org. E faapefeara ona faaaogaina e lou aiga mea ua e aoaoina mai le konafesi aoao? Imeli mai ia i matou i le liahona@ldschurch.org.

O Tali mo Oe

O konafesi taitasi, ua tuuina mai e perofeta ma aposetolo ni tali musuia i fesili atonu e i ai i tagata o le Ekalesia. Faaaoga lau lomiga o Novema 2013 pe asiasi i le conference.lds.org e sue ai tali i fesili nei:

- O a aoaoga faavae ua tatou aoaoina i le Mataupu Faavae o le Faatuatua? Tagai L. Tom Perry, "O Aoaoga Faavae ma Mataupu Faavae o Loo I Ai i Mataupu Faavae o le Faatuatua."
- E mafai faapefeara ona tatou auai i le galuega faafaifeatalai pe afai tatou te lagonaina le fefe? Tagai M. Russell Ballard, "Ia Outou Faalagolago i le Alii."
- O a mea e faaaogaina ai le sefuluai? Tagai David A. Bednar, "O Pupuni o le Lagi."
- E mafai faapefeara e le agasala ma le tetee ona aafia ai lo tatou faiatalia ma taitai atu ai i le nofo pologa? Tagai Quentin L. Cook, "O Le Auega a Ieremia: Faaeteete i le Nofo Pologa."



ALU MA FAI

Na aoao mai e Elder Robert D. Hales o le Korama a Apostolo e Toasefululua e faapea, o faamanuiaga silisili o le konafesi e oo mai pe a tatou:



1. "Faapotopoto e faalogo i afioga a le Alii."

2. "Toe foi atu i o tatou aiga ia tatou ola ai."

Mai le "Konafesi Aoao:Faamalosia o le Faatuatua ma le Molimau," *Liahona*, Nov. 2013, 7.

O UPU A PEROFETA I TAMAITAI MA LE PERISITUA

Sa fesili Elder Neil L. Andersen o le Korama a Apostolo e Toasefululua: "Aisea la e faatautaia ai e alii ia sauniga o le perisitua? . . .

"E pei lava ona tatou iloa ma le mau-tinoia e 'tutusa' le alofa o le Atua mo Ona atalii ma Ona afafine, ua tatou iloa foi Na te lei foafoaina ia tutusa ia alii ma tamaitai. Ua tatou iloa o le itupa o se vaega e manaomia mo lo tatou faasi-nomaga ma faamoemoega faaletino ma le faavavau. Ua tuuina atu i itupa uma ni tiutetauave paia.

"Na tatou iloa mai le amataga na faavaeina e le Alii le ala e faatautaia ai Lana perisitua."

I le faamatalaga faaiu lona 12 o lenei lauga, sa ttau ai e Elder Andersen isi perofeta o e na tali mai i lenei fesili. Na saunoa mai Peresitene Gordon B. Hinckley (1910–2008), "O le Alii na filifili o alii i Lana Eklesia e tatau ona umia-inia le perisitua." Na saunoa mai Elder M. Russell Ballard o le Korama a Apostolo e Toasefululua, "E le faaalia mai lava e le Alii pe aisea ua la faatulagaina ai Lana Eklesia e pei ona la faia ai."

Mai le "Mana o le Perisitua," *Liahona*, Nov. 2013, 92.

FAATUMU LE AVANOA

1. "O tagata tau si feagaiga o tagata foi ia e tau si i _____!" (Linda K. Burton, "O Le Mana, Olioli, ma le Alofa e Maua i le Tausiga o Feagaiga, *Liahona*, Nov. 2013, 113).
2. "O le toatele, e aunoa ma le iloaina ai, ua taitaiina e le Alii i nofoaga lea e mafai ona latou faalogo ai i le _____ ma o mai i Lana _____" (Gérald Caussé, "E Le O Toe Tagata Ese Outou, *Liahona*, Nov. 2013, 50).
3. "O le amiontonu e sili atu le malosi nai lo o le _____" (Boyd K. Packer, "O Le Ki i le Puipuiga Faaleagaga," *Liahona*, Nov. 2013, 27).
4. "O le faanenefuina o eseesega o tamaitai ma alii, ua tatou le iloa ai mea alofa manino, ma tutusa lelei a _____ ma _____ ia e fatuina faatasi ai se mea atoa maoae atu" (D. Todd Christofferson, "O Le Malosiaga Amiontonu o Tamaitai, *Liahona*, Nov. 2013, 31).

Tali: 1. pololei; 2. talalelei, lafu;
3. amiolega; 4. tamatalai, alii.

MAI LE POULIULI I LE MALAMALAMA

*E mafai ona tatou iloa ma le mautinoa pe a pogisa o tatou olaga ma e mafai e lesu Keriso
ona suia lena pogisa i le malamalama pe a tatou salamo ma le faamaoni.*

Taofia le igoa

Na i ai ni taimi i lo'u olaga na ou lagona ai le pei ua leai sou faamoemoe e maua ai le fiafia po o le toe foi atu i lo tatou Tama o i le Lagi. I le tele o tausaga ua mavae, sa taofia ai au mai le Eklesia. Sa ou ola i se olaga o le faamaualuga ma le agasala ma sa matua mafatia ona o au amioga. Sa lei manuia la'u faamau i se tamaitai sa ou alofa i ai, sa afaina au sootaga ma isi, ma sa ou le fiafia.

E ui lava sa ou momoo maimau pe ana ou filifili e lotomaualalo i se taimi ua leva, ae sa faamalosia au ia lotomaualalo ma ia saili e fai le finagalo o le Alii. Sa amata ona ou faitau soo i tusitusiga paia, tatalo soo, ma saili e auauna atu i isi. Sa ou taumafai e faaleleia ni sootaga sa ou faatamala i ai mo se taimi umi lava, e aofia ai le ma sootaga ma le Tama Faalelagi. Sa ou faanaunau moni lava i se liuga o le loto.

O le taeao po lava ao ou tietie atu i se tasi aso i le aoga, ma e lei oso ae le la. Sa susulu le tafailagi i sasae, ae na pogisa le tafailagi i sisifo, ma na amata

ona goto ifo i ona tua atu le masina ua atoa. Na ou atinaeina se mausa o le talanoa ma lo'u Tama Faalelagi a o aveina le taavale. Ao faia sau tatalo i le taimi o lenei malaga, na faamalamainaina lo'u mafaufau, ma sa tuuina i totonu o lou loto se faamoemoe fou.

Sa ou iloina le susulu o lo'u olaga ma na amata ona faateleina le malamalama, e pei lava o le tafailagi i sasae. Na amata ona mouese atu le pogisa, ma o au agasala, lea na tele e pei o lena masina ua atoa, na goto ifo i lalo. E lei faapea ua o ese, ae sa



O LE FIAFIA E ALA I LE SALAMO

"O tatou malamalama ea i le [naunautaiga] o lo tatou Tama Faalelagi ia tatou taumafaiga uma e toe foi atu ia te ia? E tusa lava pe tele se vaega o le ala ua tatou se ese ai, na te talia lo tatou toe foi mai. Tatou te lagonaina le olioli a o faamautinoa mai e le alofa o lo tatou Faaola ia i tatou e mafai lava ona tatou mama, o le a i ai se aso o le a tatou toe foi atu ai i le aiga. O lenei fiafia e nao le salamo e oo mai ai.

"A tatou tuua ia mea sese na faia ma faaaoga le faatuatua ia lesu Keriso, tatou te mauaina se faamagaloga o a tatou agasala. Tatou te lagonaina o loo faia e lo tatou Faaola mo i tatou mea e le mafai ona faia e i tatou lava."

Elder Neil L. Andersen of the Quorum of the Twelve Apostles, "The Joy of Becoming Clean," Ensign, Apr. 1995, 51.



ou iloaina e le toe umi pe afai e faaauau pea ona ou salamo faamaoni. Sa ou faamoemoe o le a i ai se aso o le a faamalamalama ai lou olaga e pei o le aoauli.

I le aluga o taimi ma ao ou tatalomo le alofa mo lo'u Tama Faalelagi ma isi, sa amata ona ou maua atili le lotomualalo. O le faateleina o le lotomualalo na taitaiina atu ai au ia au-auna atu i le Atua ma isi e aunoa ma le manatu faapito, ma sa faafouina ma toe faatumuina lou faamoemoe mo le ola e faavavau ma se lumanai sili atu ona lelei. A o tuputupu ae lena faamoemoe, sa faapena foi lo'u faatuatua i lo'u Faaola, o Iesu Keriso, e ona le mana e laveai ma faamama ai au mai amioletonu uma. Ou te iloa e moni upu a Mamona: "Tou te faamoemoe e ala i le togiola a Keriso ma le mana o lona toetu, ia faatutu mai outou i le ola faavavau" (Moronae 7:41). ■

O A TUUTUUGA O LE SALAMO?

Na aoao mai e le perofeta o Helamanā e i ai tuutuuga o le salamo:

"E moni o le a afio mai le Alii e togiola lona nuu, ae o le a le afio mai o ia e togiola i latou ia latou agasala, ae e togiola i latou mai ia latou agasala.

"Ma ua ia te ia le mana na tuuina mai ia te ia mai le Tamā e togiola ai i latou mai ia latou agasala ona o le salamo; o lea na ia auina mai ai ana agelu e talai mai tala o tuutuuga o le salamo, lea e aumai ai i latou i le mana o le Togiola, mo le olataga o o latou agaga" (Helamanā 5:10–11; faaopoopo le faamamafa).

Mafaufau e suesue i mau nei e malamalama atili ai i nisi o na tuutuuga: Roma 3:23; 1 Nifae 10:21; 2 Nifae 2:8; Mosaea 4:9–10; Mataupu Faavae ma Feagaiga 58:42–43.

Matou te talia tala o ou aafiaga faale-talalelei e fesootai ma le galuega ma le misiona a le Faaola. O ni autu e ono talafeagai e aofia ai le Togiola, alofa tunoa, faamalologa, faamoemoe, po o le salamo. Faamolemole ia faatapu-la lau tusiga i le 600 upu, tusi ai o le "Tatou Te Talanoa ia Keriso," ma auina atu i le liahona.lds.org po o le imeli i liahona@ldschurch.org.

ATAMU

"E toaitiiti nai tagata na aafia moni i le ata o le faaolataga nai lo le tagata o Atamu."¹

Sa iloa au e le toatele o tagata o le uluai tagata na ola i le lalolagi, ae anoanoai e lei iloaina sa i ai sou tiutetauve faapitoa ae ou te lei sau i le lalolagi. I le muai olaga, sa ou taitaia autau a le Atua e faasagatau atu i autau a Satani i le Taua i le Lagi,² ma sa ou fesoasoani ia Iesu Keriso e foafoaina le lalolagi.³ Sa iloaina au ia Mekaeli, o lona uiga o se tasi "o lē ua pei o le Atua."⁴

Na filifilia au e le Atua e avea ma uluai tagata i le lalolagi ma tuuina au i le Faatoaga o Etena, o se parataiso ma le tele o ituaiga o laau ma manu. Sa ia manava i totonu ia te au "o le mānava ola"⁵ ma tuuina mai ia te au se igoa fou: Atamu.⁶

Sa fetalai mai le Atua ia te i maua ma lo'u toalua, o Eva, e aua le aia le fua o le laau e iloa ai le lelei ma le leaga.⁷ Afaí ma te le aai i le fua, e mafai ona ma tumau i le faatoaga ma ola e faavavau ai, ae e le mafai ona "alualu i luma e ala lea i le iloaina o mea faafeagai i le olaga faitino"⁸ pe maua se fanau.⁹ O le filifiliga o i maua e faia.

Talu ai ona sa ma filifili e tofo i le fua, o lea na tatau ai ona ma tuua le faatoaga ma le afioaga o le Atua. Ua ta'ua lenei mea o le Pau. Na avea i

maua ma tagata faaletino, e lagolina le lelei ma le leaga o le olaga, ma aumaia fanau i le lalolagi.¹⁰

Na silafia e le Atua o le a tupu le Pau—na Ia auina mai Iesu Keriso e togiola mo a tatou agasala ma faatoilalo le oti ina ia

mafai ona tatou toe foi atu ma o tatou fanau ia te Ia.¹¹

Na ma aoao ma Eva e uiga i le talalelei a Iesu Keriso—e aofia ai le faatuatua ia Iesu Keriso, salamo,



papatisoga, mauaina o le meaalofa o le Agaga Paia, ma tumau e oo i le iuga—ma sa ma aoao atu i a maua fanau.¹²

Ona o lo'u aafiaga, sa tatalaina o'u mata, ma sa ou maua le olioli i lenei olaga.¹³ Ia manatua e mafai foi ona e lagona le

alofa o le Atua ma toe foi atu ia te Ia pe afai e te mulimuli ia Iesu Keriso,¹⁴ e pei lava ona ou aoao e faia. ■

FAAMATALAGA

1. Robert L. Millet, "O Le Tagata o Atamu," *Liahona*, Feb. 1998, 4.

2. Tagai i leFaaaliga 12:7–8.
3. Tagai See Robert L. Millet, "O Le Tagata o Atamu," 10.
4. Taiala i Tusitusiga Paia, "Mekaeli," scriptures.lds.org.
5. Kenese 2:7.
6. Tagai Mose 1:34.
7. Tagai i le Kenese 2:16–17; Mose 3:16–17.
8. *Tala'i La'u Talalelei: O Se Taiala mo le Galuega Faafaifeatalai* (2004), 49.
9. Tagai i le2 Nifae 2:22–23.
10. Tagai i le Mose 4:22–31; 5:10–11; Alema 12:21–27.
11. Tagai Ioane 3:16–17; 1 Korinto 15:22; 2 Nifae 9:21; Alema 42:2–15.
12. Tagai i le Mose 5:1–12, 58–59; 6:51–67.
13. Tagai i le Mose 5:10.
14. Tagai i le Mosaea 27:25–26.
15. Tagai Mataupu Faavae ma Feagaiga 27:11.
16. Tagai Kenese 5:5.
17. Tagai i le Mataupu Faavae ma Feagaiga 116:1; Tanielu 7:9–14.
18. Tagai i le Mataupu Faavae ma Feagaiga 29:26.
19. Tagai Mataupu Faavae ma Feagaiga 88:114–16.

MAI LE AGAVALE: ATAVALI NA SAUNIA E DAN BAXTER; ATAMU MA EVA I LE FAATOAGA, SAUNIA E LOWELL BRUCE BENNETT; TUUA LE FAATOAGA O ETENA, SAUNIA E JOSEPH BRICKLEY; I FAATUSA, SAUNIA E JOSEPH BRICKLEY; O ATAMU MA EVA O LOO ADAOINA A LAUA FANAU, SAUNIA E DEL PARSON; FAUUIINA SETU E ATAMU, SAUNIA E DEL PARSON; O LE AGELU SILI O MEKAELI O LOO FAATOILALOINA SATANI, SAUNIA E GUIDO RENI/BRIDGEMAN ART LIBRARY/GETTY IMAGES; TUATAA NA SAUNIA E THINKSTOCK A/ISTOCKPHOTO

PUSA O FAAMATALAGA MONI: ATAMU

Igoa: Atamu, le Tama o Atamu, le Anamua o Aso, Mekaeli¹⁵

Tausaga i le taimi na maliu ai: 930¹⁶

Matafaioi o le muai olaga: Taitaia autau a le Atua e faasagatau ia Satani; na fesoasoani ia lesu Keriso i le foafoaina o le lalolagi

Matafaioi o le olaga nei: Peteriaka, tane, ma tama; na fesoasoani e aumaia le Pau; ola i le talalelei a lesu Keriso.

Matafaioi pe a mavae le olaga nei: O le a asiati atu i lona nuu i Atamu-onai-Amani¹⁷; fesoasoani ai i le Toetu¹⁸; taitaia le taua faaiu e faasagatau atu ia Satani¹⁹



**Saunia e Peresitene
Gordon B. Hinckley
(1910–2008)**

Peresitene Sefululima
o le Ekalesia

O LE AIGA ATUA PAIA

O lo tatou talitonuga i le Atua le Tama Faavavau; i Lona Alo o lesu Keriso; ma le Agaga Paia o le totonugalemu lea o la tatou faatuatuaga.

O Gordon B. Hinckley, peresitene lona 15 o le Ekalesia, na soifua mai i le aso 23 o Iuni, 1910. Sa faauuina o ia o se Apostolo i le aso 5 o Oketopa, 1961, i le 51 o ona tausaga, ma i le aso 12 o Mati, 1995, sa lagolagoina ai o ia e avea ma Peresitene o le Ekalesia.

I le faatulagaina mai o elemene autu o la tatou aoaoga faavae, na tuu ai e le Perofeta o Iosefa Samita lenei mea o le numera tasi:

“Matou te talitonu i le Atua, le Tama Faavavau, ma Lona Alo, o Iesu Keriso, ma le Agaga Paia” (Mataupu Faavae o le Faatuatua 1:1).

[Na aoao mai foi le Perofeta]: “O le uluai mataupu faavae o le talalelei o le iloa ma le mautinoa o uiga o le Atua” (*History of the Church*, 6:305).

O nei folafolaga uiga ese ma le maoae e ogatasi lelei ma afioga a le Alii . . . : “O le ola e faavavau foi lenei, ia latou iloa oe le Atua moni e toatas, atoa ma le ua e auina mai, o Iesu Keriso lea” (Ioane 17:3). . . .

Le Atua le Tama Faavavau

Ou te talitonu e aunoa ma le taufaasese po o le masalosalo i le Atua,

le Tama Faavavau. O Ia o lo'u Tama, o le Tama o lo'u agaga, ma le Tama o agaga o tagata uma. O Ia o le Foafoa silisilise, o le Pule o le Atulaulau. . . . O Lona faatusa na foafoa ai le tagata. E patino o Ia. E moni o Ia. E toatas i o Ia. E i ai Sona “tino o aano ma ivi e mafai ona pai i ai e pei o le tagata” (MF&F 130:22).

O le tala i le foafoaga o le lalolagi, “Ona fetalai ane lea o le Atua, Ina tatou faia ia o le tagata i lo tatou faatusa, ia foliga ia i tatou” (Kenese 1:26).

E i ai seisi gagana e sili atu ona manino? Mata e tuuitiitia ai le Atua, e pei ona faatalitonuina i tatou e nisi, faapea na foafoaina le tagata i Lona faatusa faapitoa? Nai lo lena, e tatau ona faaosofia i totonu o loto o alii ma tamaitai uma se agaga talisapaia sili atu mo ia lava o se atalii po o se afafine o le Atua. . . .

. . . Ao avea ma se faifeatalai, sa ou lauga atu [i Lonetona, Egelani, ae faalavelave mai se tagata faitio], “Aisea e te le tumau ai i le aoaoga faavae o le Tusi Paia lea e fai mai ai le Ioane (4:24), ‘O le Atua o le Agaga lava Ia?’”

Sa ou susueina la'u Tusi Paia i le fuaiupu na ia sii mai ma faiat atu ia te ia le fuaiupu atoa: “O le Atua o le agaga lava ia; o e tapuai ia te ia, e tatau ona tapuai atu ai i le agaga ma le faamaoni.”

Sa ou fai atu, “E moni o le Atua o se agaga, ma e faapena foi oe, i se tuu-faatasiga o le agaga ma le tino lea e

avea ai oe ma se tagata ola, ma e faapena foi au.”

O i tatou taitoatasi o se tagata itulua o le vaega faaleagaga ma le vaega faaletino. E iloa uma lava le moni o le oti . . . , ma e iloa foi e i tatou taitoatasi o loo soifua le agaga i le avea ai ma se vaega o tagata taitoatasi ma o nisi taimi, i lalo o le fuafuaga paia ua mafai ai ona maua e ala i le taulaga a le Alo o le Atua, o le a i ai se toe faatasiga o le agaga ma le tino. O le tautinoga a Iesu faapea o le Atua e le o toe avea ma se agaga ua teena ai le i ai o Sona tino nai lo le faamatalaga lea o au o se agaga a o loo i ai foi ma se tino.

Ou te le faatusaina lou tino ma Lona tino i lona toe faaleleia, i lona tulaga, i lona matagofie ma le susulu. O Ia e faavavau. O lou tino e faaletino. Ae o le mea e na o le faateleina ai o lo'u faaaloalo mo Ia. . . . Ou te saili e alofa ia te Ia ma lo'u loto atoa, manatu, mafaufau, ma le malosi. E sili atu Lona poto nai lo le poto o tagata uma. . . . O Lona alofa e aofia ai Ana fanau uma, ma o Lana galuega ma Lona mamalu ina ia aumaia le tino ola pea ma le ola e faavavau o Ona atalii ma afafine. . . (tagai i le Mose 1:39). . . .

O Le Alii o lesu Keriso

Ou te talitonu i le Alii o Iesu Keriso, le Alo o le Atua soifua e faavavau. Ou te talitonu ia te Ia o le Ulumatua a le Tama ma le Toatas Na Fanaua e le



Tama i le tino. Ou te talitonu ia te Ia o se tagata soifua, mavaevae mai Lona Tama. . . .

Ou te talitonu o Lona soifuaga faafetino o Ia o le tagata atoatoa e toatasi na savalia le lalolagi. Ou te talitonu o Ana upu ua i ai lena malamalamā ma le upumoni lea, afai e usitaia, o le a faaolaina ai le lalolagi ma aumaia le faaeaga i tagata. Ou te talitonu o Lana perisitua ua i ai le pule paia—le mana e faamanuia ai, le mana e faamalolo ai, le mana e pulea ai ia matapu faa-lalolagi a le Atua, le mana e fusifusia ai i le lagi mea e fusifusia foi i luga o le lalolagi.

Ou te talitonu e ala i Lana taulaga togiola, o le tuuina atu o Lona soifua i luga o le mauga o Kalevaria, sa Ia puapuagatia ai mo agasala a tagata, ma aveesea mai ai ma i tatou le avega o le agasala pe afai tatou te lafoai ia

mea leaga ma mulimuli ia te Ia. Ou te talitonu i le moni ma le mana o Lona Toetu. . . . Ou te talitonu e ala i Lana Togiola, . . . ua ofoina mai ai ia i tatou le meaalofa o le toetu mai le otu. Ou te talitonu atili e ala atu i lena taulaga o loo ua faalautele atu i alii ma tamaitai uma, atalii ma afafine uma o le Atua, le avanoa mo le ola e faavavau ma le faaeaga i le malo a lo tatou Tama, a o tatou. . . usiusitai i Ana poloaiga.

E leai se tasi ua silisili naua ua savalia le lalolagi. E leai se tasi ua na faia se taulaga e faatusalia pe na tuuina atu se faamanuiaga faapena. O Ia o le Faaola ma le Togiola o le lalolagi. Ou te talitonu ia te Ia. Ou te tautino atu Lona paia. . . Ou te alofa ia te Ia. Ou te tautala atu i Lona suafa i le faaaloalo ma le ofo. . . .

. . . Ua tau mai e tusitusiga Paia i

[latou] na Ia faaalia o Ia lava i ai, ma i latou na Ia fetalai i ai i le avea ai ma se Alo o loo soifua ma ua toetu o le Atua. E faapena foi ona Ia faaali mai i lenei tisipenisione, ma o i latou o e na vaai ia te Ia na tautino mai:

“Ma o lenei, ina ua mavae le tele o molimau ua tuuina mai e uiga ia te ia, o le molimau mulimuli lenei, i molimau uma, ma te tuu atu e uiga ia te ia: O loo soifua o ia!

“Aua sa ma vaai ia te ia, i le lima taumatau lava o le Atua; ma sa ma faalogo i le leo o molimau mai o ia o le Toatasi na Fanaua e le Tama—

“E faapea e mai ia te ia, ma ala mai ia te ia, ma o ia, ua i ai lalolagi ma na foafoaina, ma o e ua nonofo ai o atalii ma afafine fanauina mo le Atua” (MF&F 76:22–24).

O le Keriso lenei lea ou te talitonu, ma o lea ou te molimau atu ai.

O Le Agaga Paia

E maua le malamalama mai le upu o tusitusiga paia, ma o lena molimau e sau mai le mana o le Agaga Paia. O se meaalofa, e paia ma matagofie, na tuuina mai e ala i le faaialiga mai le sui lona tolu o le Aiga Atua. Ou te talitonu i le Agaga Paia i le avea ai ma se peresona o agaga e nofoia se nofoaga faatasi ma le Tama ma le Alo, o nei tagata e toatolu e fatuina ai le Aiga Atua paia. . . .

Na mautinoa lava le iloaina o le Agaga Paia i aso anamua o se tasi o le Aiga Atua i le talanoaga i le va o Peteru ma Anania ina ua taofia e i laua se vaega o le tupe na maua mai le faatauina o se vaega o le fanua.

“A ua fai atu Peteru, Anania e, se a le mea ua faatumu ai e Satani lou loto e te pepelo ai i le Agaga Paia . . . ?

“. . . Ua e le pepelo i tagata, a o le Atua” (Galuega 5:3–4).

O le Agaga Paia o le Fesoasoani [leal] na folafola mai e le Faaola o le o le aaooina Ona sooi mea uma ma faamanatuina mai mea uma. . . (tagai i le Ioane 14:26).

O le Agaga Paia o le Molimau o le Upumoni, o le e mafai ona aoao atu i tagata mea e le mafai ona latou aoao i le tasi ma le isi. . . . O se malamalama i le moni o le Tusi a Mamona ua folafola atu “i le mana o le Agaga Paia.” Na tautino atu e Moronae, “Ma o le mana o le Agaga Paia e mafai ona outou iloa ai le moni o mea uma lava” (Moronae 10:4–5).



Ou te talitonu o lenei mana, lenei meaalofa, ua avanoa mo i tatou i lenei vaitaimi.

Moni ma Patino

. . . Ou te talitonu i le Atua, le Tamā Faavavau, ma Lona Alo, o Iesu Keriso, ma le Agaga Paia.

Sa ou papatiso i le suafa o i latou nei e toatolu. Sa ou faaipoipo i le suafa o i latou nei e toatolu. E leai sau fesili e uiga i lo latou tulaga moni ma lo latou tulaga taitoatasi. Na faaalia lena tulaga taitoatasi ina ua papatiso Iesu e Ioane i Ioritana. Sa tu i totonu o le vai le Alo o le Atua. Sa faalogoina le siufogfa a Lona Tama o folafolaina mai Lona tulaga paia faaleatalii, ma sa faaali mai le Agaga Paia i le tulaga o se lupe (tagai i le Mataio 3:16–17).

Ua ou iloa na fetalai mai Iesu ua faapea mai o i latou o e na vaai ia te Ia ua vaai i le Tama [tagai Ioane 14:9]. Pe le tutusa ea lea mea i le toatele o atalii o e soo i ona matua?

Ina ua tatalo Iesu i le Tama,

e mautinoa lava Na te le o tatalo ia te Ia Lava!

Lotogatasi Atoatoa

O i latou o ni tagata mavaevae, ae ua tasi i le faamoemoe ma le malosi. Ua latou lotogatasi ina ia tasi i le faataunuina o le fuafuaga sili ma le paia o le faaolataga ma le faaeaga o fanau a le Atua.

. . . Sa aioi atu Keriso i Lona Tama e uiga i le au Apostetolo, lea na Ia alofagia, ua fetalai mai:

“E le faapito la’u tatalo mo i latou nei, a o i latou foi e faatuatua ia te au ona o la latou upu;

“Ina ia tasi i latou uma, faapei o oe le Tama o i totonu ia te au, o au foi o i totonu ia te oe, ina ia tasi i latou i totonu ia te i taua” (Ioane 17:20–21).

O le lotogatasi atoatoa lena i le va o le Tama, le Alo, ma le Agaga Paia lea e fusia ai nei tagata e toatolu i le tuufaatasiga o le Aiga Atua paia. ■

Mai le “O Le Tama, Alo, ma le Agaga Paia,” Liahona, Mat. 1998, 3–9; ua faalaugatasia ia mataitusi tetele ma failogia.

TAUSIA O LE ASO SAPATI

Le toatele o tagata, o le Aso Sa o se isi lava aso i le faaiuga o le vайaso mo malologa faaopoopo ma faafiafiaga. Ae peitai, o faaaliga anamua ma nei ona po ua aoaoina ai le taua o le tausia o le aso Sapati ia paia. I itulau e 56–57 o le lomiga lenei, o loo talanoaina ai e Larry M. Gibson, fesoasoani muamua i le au peresitene aoao o Alii Talavou, le matafaioi taua o le tausia o le aso Sapati. Na saunoa mai Brother Gibson, “O le auala tatou te tausia ai le aso Sapati ia paia o se faailoaga i fafo o a tatou feagaiga e manatua pea Iesu Keriso.”

Aoao lau fanau e tausia le aso Sapati ia paia, o le a saunia i latou e maua le tele o faamanuiaga. E pei ona saunoa mai Brother Gibson, “Afai o le a tatou mulimuli ma ola ai i le tiute paia o le tausia o le aso Sapati ia paia, o le a faamanuiaina i tatou e le Alii, taitaiina i tatou, ma musuia i tatou i le foiaina o faafitauli e faafetaiaia i tatou.”

Fautuaga mo le Aoaoina o le Autalavou

- Faitau faatasi le tusiga a Brother Gibson i itulau e 56–57. Ona talanoaina lea po o le a se mea e mafai ona faia e lou aiga i vайaso taitasi e saunia ai e tausia le aso Sapati ia paia. I afiafi faaleaiga, e mafai ona outou usuina le pese “Si'i Malie Viiga Paia” (*Viiga*, nu. 81) po o se isi viiga e uiga i le Sapati, ma talanoaina mea e mafai ona faia e lou aiga i le Aso Sa ia tausia ai le aso Sapati ia paia.

- Mafaufau e faitau faatasi ma lau fanau talavou le vaega o le tausia o le aso sapati i le *Mo le Malosi o le Autalavou*, e aofia ai mau o loo lisi atu i le faaiuga. E mafai ona outou sueina faatasi isi mau e uiga i le tausia o le aso Sapati ia paia ma talanoaina ia mataupu faavae i tua atu o le tausiaina o le aso Sapati.
- Afai e maua mataupu aoaoina fou a le autalavou i lau gagana, e mafai ona e faaaogaina ia lesona e saili ai tusiga po o vitio i le tausia o le Sapati ia paia. Alu i le lds.org/youth/learn. E mafai ona fesoasoani lesona o Setema e faatatau i poloaiga mo lenei autu.

Fautuaga mo le Aoaoina o Tamaiti

- Faitau le “Tiakono Fou Lava” i le *Liahona* o Oketopa 2013 ma talanoa i le taua o le faamanatuga i le tusiga o le aso Sapati ia paia.
- Mafaufau e faitau le “O Se Lesona i le Migao” i le *Liahona* o Mati 2010; atonu e te manao foi e fai le gaoioiga e o faatasi ma le tusiga. Ia talanoaina faatasi ma lau fanau le ala e mafai ai ona fesoasoani le migao i le lotu e tausia ai le aso Sapati ia paia.
- Ia talanoaina mea e mafai ona faia e lou aiga i le Aso Sa e faamaluina ai le Alii. Atonu e te manao e faitau le “Filifili Nei Loa” mai le *Liahona* o Mati 2012 mo



O MAU E UIGA I LENEI AUTU

- Esoto 20:8–11
Isaia 58:13–14
1 Korinito 11:23–26
3 Nifae 18:3–11
Moronae 6:4–6
Mataupu Faavae ma Feagaiga 59:9–13

se faataitaiga o se tasi na tausia le aso Sapati ia paia i se tulaga faigata.

- E mafai ona outou usuina faatasi ma lau fanau nisi o pese e faatatau i le Sapati, e aofia ai le pese “Aso Toonai” (*Tusipese a Tamaiti*, 105). Talanoa e uiga i auala e mafai ai e lou aiga ona faaaogaina le Aso Toonai ma isi aso o le vайaso e saunia ai mo le Aso Sa. ■

*Ia manatua
i taimi uma,
o Iesu Keriso—
le Foafoa o le
atulaaulau, o
le mataisau o
lo tatou faa-
olataga, ma o
le ulu o lenei
Ekalesia—e
pule aoao.*



Saunia e Elder
M. Russell Ballard

O Le Korama a
Apostolo e Toasefululuā



FAAFETAIAIA O LE LUMANAI MA LE Faatuatua & Faamoemoe

Otulaga i le lalolagi e le o mautonu ma matautia, ma o le tamaoaiga o le lalolagi e le o mautu ma le mautinoa. O tulaga faatauaina faapelepele o le olaga, saolotoga, ma le sailiga o le fifiafia o loo osofaia e i latou o e o mananao e faatapulaaina le faitalia ma faia ina ia tatou ola faalagolago nai lo le uunaia o i tatou e faaaoga o tatou tomai ma taleni e fatuai ai ni auala fou ma mananaia o le faia o mea.

O tulaga faatonuina o le ola mama ua toilalo. O loo ua osofaia le aiga ma ua solovī. O le alofa o i loto o alii ma tamaitai ua faasolo ina maalili, ma ua le moni (tagai i le Mataio 24:12; Roma 1:31). O loo i ai se faaletonu faifai pea i le amio sa'o, faamaoni, ma le amiontonu o faaupufai, pisinisi, ma isi taitai. Ua faateleina ia taua ma tala o taua i totonu o atunuū ma talitonuga. Ma e sili atu ona matautia nai lo soo se taua o tauina i le va o le lelei ma le leaga—i le va o le Faaola ma Lana autau o le malamalamama ma Satani ma ana au leaga o le pogisa—mo agaga o le fanau a le Atua.

Na faamatalaina e Peresitene Gordon B. Hinckley (1910–2008) le lalolagi lea o le a ulu atu i ai ia tagata talavou o aso nei ina ua ia saunoa: “Ua tatou ola i se vaitau ua faia ai e e faasaua mea matautia ma le mataga. Ua tatou i se vaitau o taua. Ua tatou ola i se vaitau o le faasausili. Ua tatou ola i se vaitau o le amioleaga, o ata ma tusi mataga, o le ola le mama. O agasala uma lava a Sotoma ma Komoro ua maua i o tatou nuu ma alalafaga. E lei fetaiai o tatou tupulaga talavou ma se luitau sili atu [nai lo lenei]. Tatou te lei vaai manino muamua faapenei i foliga faatiapolo.”¹



E le tatau ona tatou ofo i nei tulaga o o tatou taimi aua na molimau ia tusitusiga paia ma valoaga e faatatau i o tatou aso i le mea o le a tupu i le lalolagi pe afai e fultuita tagata i le Atua. O le a tatou aafia i le tele o mea lē lelei, aua o loo faaaauau pea taumafaiga a le tiapolo e faataunu ana fuafuaga faatiapolo. I le taimi lava e tasi, o perofeta anamua o e na vaai i o tatou aso, o e na vaai i tupulaga talavou o aso nei, na iloa o le taimi lenei o le a avea ma se vaitaimi o le malamalama ma le ofoofofogia e lei oo lava i ai le lalolagi.

A o ou saunia lenei savali, sa ou talosaga atu mo le taitaiga ina iloa ai po o le a le savali o loo finagalo lo tatou Tama Faalelagi tatou te faasoa atu. Na oo mai i lou mafau-fau ia upu toafimalie ma faamautinoa na saunoa ai le Alii i le Perofeta o Iosefa Samita: “Ia fiafia, ona o le a Ou taitaia outou i le ala. O le malo ua ia outou . . . , ma o oa o le faavavau ua ia outou ia” (MF&F 78:18).

Suia le Fefe i le Faatuatua

O le mea ou te talitonu e finagalo le Alii ou te fai atu e faapea e tatau ona tatou suitulagaina le fefe i le faatuatua—faatuatua i le Atua ma le mana o le Togiola a le Alii o Iesu Keriso.

E mafai ona ou manatua i le avea ai ma se tama talavou e 13 tausaga le matua o toe foi mai i le fale mai le sau-niga perisitua i le Aso Sa, 7 o Tesema, 1941, e iloa ai mai ou matua faatoa uma lava ona pomuina e Iapani ia Pearl Harbour. O lenei mea na uunaia ai le Iunaite Setete i se taua o le lalolagi lea ua leva ona vevela i Europa mo le lua tausaga. Sa foliga mai o le olaga sa matou iloaina o le a faaiuina. Sa tele le le mautonu a o aveina atu le toatele o alii talavou i le tautua faamiliteli. Ae peitai, i le taimi lava lenei, i le lotolotoi o feeseseaiga uma, tauiviga, ma faatosinaga leaga i le lalolagi, sa i ai lava le tele o le lelei.

A o tatou mafau-fau e uiga i le lumanai, e tatau ona faatumulia i tatou i le faatuatua ma le faamoemoe. Ia manatua pea o Iesu Keriso—le Foafoa o le atulaulau, o le mataisau o lo tatou faaolataga, ma o le ulu o lenei Ekalesia—e pule aoao. Na te le faatagaina lava Lana galuega ina ia toilalo. O le a Ia manumalo i le pogisa ma le leaga uma. Ma sa Ia valaaulua i tatou o tagata uma, o Lana Ekalesia ma isi o faamaoni i le loto, e auai i le taua mo agaga o le fanau a le Atua. Faatasi ai ma isi mea uma o le a tatou faia i le

olaga, e tatau foi ona tuuto atu ma faapaiaina o tatou loto, manatu, mafau-fau, ma le malosi i Lana galuega, ma sava-vali i le faatuatua ma galulue faatasi ai ma le talitonuga maumaututu.

Faafetaiaia o le lumanai ma le fiafia. Ou te talitonu ua tatou tutu nei i le amataga o se vaitau fou o le tuputupu ae, tamaoaiga, ma mea e tele. O le leai o se faalavelave po o se faafitauli faavaomalo e lei mafau-fauina, ou te manatu ai o nai tausaga a sau o le a aumaia se toe aliae mai i le tamaoaiga o le lalolagi e pei ona faia mea fou i fesootaiga, vailau faafomai, malosi, femalagaaiga, fisiki, tekinolosi faakomepi-uta, ma isi vaega o taumafaiga.

O le toatele o nei mea ua maua, e pei ona o le taimi ua tuanai, o le a avea ma taunuuga o le Agaga o musumusu mai ni malamalamaaga ma faamalamalamaina ai mafau-fau o tagata taitoatasi o sailia le upu moni. O nei mea ua maua ma tekinolosi fou ma faaleleia o le a oo mai ai ni avanoa o ni galuega fou ma le manuia mo i latou o e galulue malosi ma aemaise lava mo i latou o e taumafai e tausi i poloaiga a le Atua. O le tulaga lea sa i ai i isi vaitau taua o le tuputupu ae faaletamaoaiga o le faaleatunu ma faavaomalo.

E le gata i lea, o le tele o nei mea ua maua o le a faia e fesoasoani e aumai ai le faamoemoega ma galuega a le Atua ma ia faatelevaveina ai, e aofia ai le galuega faafai-featalai, o le fausiaina o Lona malo i le lalolagi i aso nei.

Fai Lau Vaega

A o lei Afio Mai Faalua le Faaola—ma e tusa ai ma Lana taimi paia—e tatau ona ave le talalelei i atunuuma, itu-aiga, gagana, ma tagata seia oo ina faatumulia ai le lalolagi atoa. E mafai ona outou manatua upu faaperofeta a le Perofeta o Iosefa Samita: “E leai se lima palapala e mafai ona taofia le galuega mai le agai atu i luma; e mafai ona matamataita sauaga, e mafai ona tuufaatasi le au faatupu faalavelave, e mafai ona faapotopoto autau, e mafai ona osofai mai talapepelo taufaaleaga, ae o le a agai pea i luma ma le le fefe le upumoni a le Atua, e viia, ma tutoatasi, seia oo atu i konetineta uma, ma asia itulagi uma, faatumulia ai atunuuma, ma lagona e taliga uma, seia oo ina faata-nuuina faamoemoega o le Atua, ma fetalai mai ai le Ieova Silisili ua mae'a le galuega.”²

Ao aveina atu le talalelei i le faitau piliona o agaga o fiaai



O le a tele ni mea fou o le a maua e fesoasoani i le aumaia o faamoemoega ma le galuega a le Atua ma ia faatelevaveina ai le fausiaina o Lona malo i le lalolagi i aso nei, e aofia ai le galuega faafafautealai.

faaleagaga, o le a faataunuina vavega e ala i aao o le Alii O faifeautalai o le toatele o aganuu o le a auauna atu i le Alii i le lalolagi atoa. O le a fausia falelotu fou ma le tele o nisi malumalu ina ia faamanuiaina le Au Paia, e pei ona valoia e faatatau i le tuputupu ae o le Ekalesia ao lei oo i le meleniuma.

Atonu e te fesili, “O fea o le a aumai ai ia punaoa tauupe lea o le a faatupe ai lenei tuputupu ae? O le a aumai punaoa mai tagata faamaoni e ala i a latou sefuluai ma tauлага. Ao tatou faia la tatou vaega o le a faamanuiaina i tatou e le Alii i le manuia ma le poto e faataulai atu ai o tatou mafaufau i mea e sili ona taua i le olaga: “Ae ia outou muai saili le malo o le Atua, ma lana amiontonu; ona faoopooina atu lea o nei mea uma ia te outou” (Mataio 6:33).

O lea ona ua toe o se vaitau, atonu o se vaitau puupuu, o le a foliga mai ai e pei ua toina moni mai ai lava pupuni o le lagi ina ia “silisili ona tele” (Malaki 3:10).

Ou te talitonu o le toatele o talavou matutua o le taimi nei o le a auai malosi i faamanuiaga faaletino pe afai latou te tausia poloaiga a le Alii. Faatasi ai ma le manuia o le a oo mai ai ma se luitau tulagaese—o se suega o le a tofo-tofo ai le toatele i o latou gafatia faaleagaga. Ina ua e laa i totonus o lenei lalolagi fou o le tamaoaiga ma faaaauai i le liua ai o lou tomai ma aoaoga i le manuia tautupe, e tatau

lava ona e iloa le eseesege i le va o manaoga ma mea e manaomia.

Saili muamua le malo o le Atua

O le a e maua ni filifiliga se lua. Mata o ou naunautaiga e fausia ma maua ia faamanuiaga a le Alii e mo le faamalieina faaletagata lava ia, mo le aloaiaina e tagata, ma mo le malosi, uunaiga, ma le faateleina o lou lava malosi po o taua? Pe o lou naunautaiga ea e mo le faamamaluina o le Atua, e galulue e fesoasoani i le aumaia o le tuputupu ae ma le faalauteleina o Lana Ekalesia?

O i latou o e saili ia ‘oa e fausia ai o latou lava uiga faaletagata o le a maseesee a latou ‘oa ma o le a le mafai ona taofia i latou i aso o lo outou mativa (tagai i le Helamana 13:31). O le manuia o o latou agaga o le a i ai i se tulaga lamatia tele. Na lapataia i tatou e Iakopo, o le uso laitiiti usiusitai o Nifae:

Ma ua fiafia tele mai le aao o le Atua i luga o outou, ua outou maua ai oloa e tele; ma ona ua maua e ni isi o outou ni oloa e sili atu ona tele nai lo o outou uso o lea ua faafefeteina ai outou i le faamaualuluga o o outou loto, ma outou ofu i ua maaa ma ulu maualuluga ona o le taugata o o outou ofu, ma outou sauaina o outou uso ona o lo outou manatu ua outou sili atu nai lo i latou.

“... Tou te manatu ea ua ta’uamamāina outou e le Atua i lenei mea? Faauta, ou te fai atu ia te outou, E leai. Ae ua ta’usalaina outou e ia, ma afai tou te faia pea nei mea, o le a vave ona oo mai o ana faamasinoga ia te outou.

“... Aua le tuua lenei faamaualuga o o outou loto e faaumati a i o outou agaga!” (Iakopo 2:13, 14, 16).

Ona tuu lea e Iakopo o lo tatou naunautaiga ia maua le oa i le tulaga e tatau ai i se folafolaga:

“Peitai ae tou te lei saili mo le oa, ia outou saili mo le malo o le Atua.

“Ma pe a uma ona outou maua o se faamoemoe ia Keriso o le a outou maua oa, pe afai tou te sailia, ma ia outou saili e fai ai mea lelei—e faaoofu ai e ua le lavalava, ma fafaga ai e ua fia aai, ma faasaoloto e ua faatagataotauina, ma avatu ai le fesoasoani i e ua mamai ma puapuagatia” (Iakopo 2:18–19).

E le o faapea mai le Alii ia i tatou e le tatau ona tatou mauoa po o le mauoa o se agasala. Nai lo lena, Na te faamanuiaina pea Ana fanau usiusitai. Ae o loo Ia ta’u mai ia i tatou e tatau ona tatou saili ia mauoa pe manuia pe a uma ona tatou saili, maua, ma auauna atu ia te Ia. Talu ai, ona o loo lelei o tatou loto, ona e faasilisili ma faatauaina lo tatou alolofa ia te Ia, o le a tatou filifili ai e faaagaoioi a tatou oa ua tatou maua i le fausiaina o Lona malo.

Afai e te filifili e saili i oa mo le manuia o oa, o le a e le



IA OUTOU LOTOTETELE

E ui ina foufou mai afa, e ui ina to mai uaga i o tatou luga, ae o lo tatou malamalama i le talalelei ma lo tatou alolofa i lo tatou Tama Faalelagi ma lo tatou Faaola, o le a faamafanafanaina ma lagolagoina ai i tatou ma aumaia le olioli i o tatou loto a o tatou savavali sa’o ma tausi poloaiga. O le a leai se mea o lenei lalolagi e mafai ona manumalo ia i tatou.

“Ou uso e ma tuafafine pele, aua tou te fefefe. La outou lototetele. E malamalama le lumanaia e pei foi o lo outou faatuatua.”

Peresitene Thomas S. Monson, “Ia Outou Lototetele,” *Liahona*, Me 2009, 92.

taunu. O le a le faamalieina lava oe. O le a leai sau mea e maua, o le a le maua le fafia moni ma le olioli tumau.

O le tofotofoina o lo outou faatuatua i nai tausaga e sosoo ai e le faapea ona ua e le mauaina ni mea faaletino o lenei lalolagi. Ae o le filifilia o se mea e fai i faamanuiaga faaletino na e mauaina.

I tupulaga talavou laiti o le vaitaimi lenei, na saunoa ai Peresitene Ezra Taft Benson (1899–1994):

“Mo le toeitiiti ono afe tausaga, na faapolopoloina ai oe e le Atua e te oo mai i aso amuli a o lumanaia le afio mai faalua o le Alii. . . .

“... Na faapolopolo e le Alii mo le vaitaimi mulimuli nisi o ana fanau aupito malolosi, o e o le a tauaveina ma le manumalo le malo.”³

Na saunoa mai Peresitene Thomas S. Monson, “O outou o nisi o fanau aupito sili ona malolosi a lo tatou Tama Faalelagi, ma sa ia faapolopoloina outou e o mai i lenei lalolagi ‘i se taimi faapenei’ [Eseta 4:14].”⁴

O le avea ma se vaega taua o le “galuega ofoofogia ma le mea e ofo ai” (2 Nifae 25:17) o nei aso e gata ai, e tatau ai ona gauai atu o tatou loto i le Atua, ma tofatumoanaina i Lona finagalo. Ao outou “fetaomi atu i luma ma le tumau ia Keriso, ma se susulu atoatoa o le faamoemoe, ma le alofa i le Atua ma tagata uma . . . taumamafa fafia i le afioga a Keriso” (2 Nifae 31:20), saili ma le filiga, tatalo e le aunoa, ma talitonu, ma e pei ona folafola mai le Alii, “o le a galuue faatasi mea uma mo lo outou lelei” (MF&F 90:24).

Faapaia ma Faamanuiaina


Ou te uunaia outou ina ia faia se tautinoga ia te oe lava ma le Tama Faalelagi e tuuto atu lou ola ma faapaiaina ou taimi ma taleni i le fausiaina o le Ekalesia a Iesu Keriso e saunia ai mo le Afio Mai Faalua o le Faaola. Ia tuu atu i faamoemoega o ou mafaufauga ma amioga e faamamaluina ai le Atua ma faamanua ai o outou uso a tagata. Ia uunaia oe e lenei manao e faafeiloai ma le naunautai ia taeao fou taitasi, ma ia musuaina ou manatu ma amioga i le aluga o aso taitasi.

Afai e te faia lenei mea, o le a faamanuiaina oe i le lotolotoi o se lalolagi ua vave ona leiloa lona ala, ma o le a outou maua ma e pele ia te oe le saogalemu ma le fafia. E le faapea o le a e le feagai ai ma faigata ma tofotofoga, ae o lona uiga o le a e maua le malosi faaleagaga

MANATU FAALEAO-AOGA FAAVAE

E mafai ona tatou tumau ma le lelei e uiga i le lumana'i pe afai tatou te:

- Faatumauina le faatutua i le mana o le Togiola a lesu Keriso.
- Faamuamua le Tama Faalelagi i o tatou olaga.
- Tuuto atu lo tatou ola ma faapaiaina o tatou taimi i le fausiaina o le malo o le Atua.



e tauima ai i latou ma le faatuatua ma faalagolago i le Alii.

O le faamoemoega o la'u savali o le fesoasoani lea ia te oe e vaai faalemafaufau atu i lou lumana'i. Ia maua le faatuatua ma le faamoemoe mo le lumana'i manuia o loo outou feagai ai. O alii talavou o ni tamā o le lumana'i; o tamaitai talavou o ni tina ma e faafaileleina o le lumana'i. I le tuufaatasia ua avea ai outou "o se tupulaga filifilia, o se perisitua tau tupu, o se malo paia, o se nuu faapitoa ma tulaga ese" (1 Peteru 2:9).


Mo alii ma tamaitai uma, o se tasi o au mea e sili ona faamuamua o le sailia lea o sou soa faavavau pe afai e te lei maua lava. O le faaipoipoga i le malumalu o le a tuuina atu

ai ia te oe se soa e fesoasoani i lou tumau ai i le ala sa'o lea e taitai atu ai i le afioaga o lo tatou Tama Faalelagi ma le Alii o Iesu Keriso. E tatau ona faia la tatou vaega o le faaauau pea ona sauniuni mo le Afio Mai Faalua. ■

Mai se saunoaga na tuuina atu i le Iunivesite o Polika Iaga-Idaho i le aso 6 o Aperila, 2012. Mo le tusiga atoa i le gagana Poretania, asiasi i le web.byui.edu/devotionalsandspeeches/speeches.aspx.

FAAMATALAGA

1. Gordon B. Hinckley, "Ola i le Atoatoaga o Taimi," *Liahona*, Ian. 2002, 6.
2. *Aoaoga a Peresitene o le Ekalesia: Iosefa Samita* (2007), 151.
3. Ezra Taft Benson, ia Thomas S. Monson, "Ia Lototele e Tu Na o Oe," *Liahona*, Nov. 2011, 62.
4. Thomas S. Monson, "Ia Outou Maua le Lotototoa," *Liahona*, Me 2009, 123-27.



Ua Matala mai Mekisiko

MAI LE TAUIVIGA I LE MALOSI

*O le Au Paia o Aso e Gata Ai i Mekisiko ua fausia i luga o lo latou talatuu
o le faatuatua e aumaia se lumanaia matagofie i lo latou atunu.*

Saunia e Sally Johnson Odekirk

Mekasini a le Ekalesia

Ile aso 6 o Novema, 1945, na taliina tatalo ina ua taunu le vaega muamua o tagata Mekisiko a le Au Paia o Aso e Gata Ai i le Malumalu o Mesa Arisona mo le mauaina o sauniga o le malumalu i lo latou lava gagana. O José Gracia, o le sa avea ma peresitene o le Paranesi o Monterrey na saunoa mai, “Ua tatou o mai e fai se galuega maoae mo i tatou lava ma o tatou augatama. . . . Atonu o nisi o i tatou na faia ni osigataulaga, ae o na taulaga na faia e le o faia fua e aunoa ma se aoga. Ua tatou fiafia i le faia o na mea.”¹

O Peresitene Gracia ma i latou o e sa malaga atu i le malumalu na mulimuli i tulagaaao o tagata Mekisiko anamua o le Au Paia o Aso e Gata Ai, o e na ositaulaga i lea lava ala e tasi mo le talalelei toefuataiina.


Faataatiaina o le Faavae

Sa avea laueelele o mauga, toafa, vaomatua, ma talafatai mataina, o Mekisiko anamua ma aiga i tagata o e na fausia ia malumalu ma aai matagofie. I le aluga o seneturi, na fausia ai e tagata Mekisiko se faavae malosi o le faatuatua ma le tatalo lea na fesoasoani ia i latou e tumau ai i taimi faigata.

Ao faatuina e le Au Paia le Ekalesia i Iuta, na galulue ia tagata Mekisiko e toe faatulaga lo latou atunu, e aofia ai le tusiaina o se faavae fou lea e tuueseeseina ai le ekalesia ma le setete. Na oo mai le savali o le talalelei i Mekisiko i le 1876 ma faifeautalai muamua, o e na tauaveina ia ni vaega filifilia mai le Tusi a Mamona, lea na

1810: Faalauiloa le tutoatasi o Mekisiko ma na tutoatasi i le 1821 ina ua mavae tausaga e 300 o pulea e Sepania.

1830: Lomia ma faasalau atu le Tusi a Mamona ma ua faatuina le Ekalesia i Palamaira, Niu Ioka, ISA.



Na asiisi atu Peresitene Siaosi Alapati Samita i Mekisiko ma fesoasoani i le tuufaatasia o tagata o le ekalesia ao ia aapa atu i le Fonotaga lona Tolu.

1846–1848: Taua a Amerika-Mekisiko; nofoia e paionia Mamona ia le Iunaite Setete i Sisifo.



1857–61: Faatulaga e Peresitene Benito Juárez le malo o Mekisiko ma faatuina ia le saolotoga faalelotu.

latou auina atu i taitai lauiloa o Mekisiko. E lei umi ae sosoo ma papatisoga.

I le taimi o se konafesi faapitoa o le Ekalesia lea sa faia i le aso 6 o Aperila, 1881, na aea ai e le peresitene o le paranesi o Silviano Arteaga, ni taitai i le lotoifale, ma le Apo-setolo o Mose Thatcher (1842–1909) ni vaega maualuluga o le Mauga mu o Popocatépetl. Na faapaiaina lea e Elder Thatcher o le laueelele mo le talaiga o le talalelei.

I le konafesi na tatalo ai Peresitene Arteaga, ma sa faamatalaina e Elder Thatcher: “Sa tafe mai loimata i ona alafau maanuminumi, mo le laveaiga o lona nuu ma tagata. . . Ou te le’i faalogo lava o tatalo faatauanau se tagata, ma e ui sa tatalo i se gagana ou te le malamalamā i ai, ae na foliga mai sa ou malamalamā e ala i le Agaga, i mea uma sa ia aioi atu ai.”²

I lea lava taimi e tasi, na faavaeina ai nisi o paranesi o Mekisiko i le eria. O Desideria Yáñez, o se tagata matua ua oti lana tane i le setete o Hidalgo, sa fai sana miti e uiga i le tamaitusi a Parley P. Pratt *O Se Leo o le Lapataiga*. Sa ia auina atu lana tama tama i le Aai o



Na asiisi atu Peresitene Siaosi Alapati Samita i Mekisiko ma fesoasoani i le tuufaatasia o tagata o le ekalesia ao ia aapa atu i le Fonotaga lona Tolu.

Mekisiko ina ia maua se kopi o le tamaitusi, lea na faatoa faaliliuina i le Faasipaniolo. Sa ia auai i le Ekalesia i le 1880, ma avea ai ma uluai tamaitai e auai i le Ekalesia i Mekisiko.³

Mai lena taimi e toatele tagata o le Ekalesia i Mekisiko na tumau faamaoni i aluga o vaitausaga o fetauaiga, sauaga, mativa, ma le faaesea.⁴

Faataitaiga o Paionia Faamaoni

O se tasi o faataitaiga o lenei faatuatua o loo maua i le paranesi o San Pedro Martir, na faatulagaina i le 1907. Na fono faatasi ia uluai tagata i saute o le Aai o Mekisiko i se tamai pale na fausia e se tagata faatoa papatiso o Agustín Haro, lea na valaaufina e pulefaamalumalu i le paranesi. I le faagasologa o tausaga faigata o Fetauaiga i Mekisiko, lea na le ititi ifo ma le tasi miliona tagata Mekisiko na fasiotia, e toatele le Au Paia na saili se sulufaiga i San Pedro ao avea o latou setete ma laueelele o le taua. Na tuuina atu e le usoga o le Aualofa i San Pedro se auaunaga agaalofa mo nei tagata sulufai.⁵



O SE NUU UA ALOFAGIA E LE ALII


"O ai e le talitonu o le a tupu mai i se tauiviga o i ai nei se Mekisiko sili atu ma lelei. . . O le a saunia le ala mo le aoaoina o le Talalelei moni i tagata o lena lauelele, o le Talalelei o le aumaia lo latou togiola ma avea i latou ma nuu e alofagia e le Alii."¹⁷

Rey L. Pratt, o le peresitene o le Misiona a Mekisiko i le taimi o le Fetauaiga i Mekisiko.

Sa faamanuiaina foi tagata o le ekalesia i ni taitai tuuto e pei o Rey L. Pratt. Na valaauna e avea ma peresitene o le Misiona a Mekisiko i le 1907, na ia galue i lena valaauga seia oo i lona maliu i le 1931. Sa fiafia o ia i le talafasolopito, aganuu, ma tagata o Mekisiko ma maua lo latou alolofa ma le faatuatuaga a o latou galulue faatasi e faamalosia le faavae o le Ekalesia iina. O le taumafaiga a Peresitene Pratt e atiaeina ia taitai o tagata Mekisiko moni a le Ekalesia lea na faapitoa le faamaonia le taua i le 1926 ina ua faamalosia e le malo o Mekisiko le tulafono e faasa ai ona pulefaamalumalu

1875: Faaliliuina ni vaega o le Tusi a Mamona i le Faasipaniolo ma lolomiina.

1876: Malaga ia uluai faifeautalai i Mekisiko.



1881: Faia se konafesi faapitoa; faapaiaina e le Apostetolo o Mose Thatcher le lauelele mo le galuega faafeautalai.



1885: Faatuina ni faalapotopotoga a tagata Mamona i Mekisiko.

**1886:
Lolomiina ma faasalalauina atu ia anotusi atoa o le Tusi a Mamona i le gagana Sipaniolo.**

ni tagata e le o ni tagatanuu moni o le malo i aulotu i Mekisiko.⁶ I lena taimi sa faatulaga ai e se vaega o tagata lolotu le vaega na ta'ua o le Tulafono lona Tolu ma amata ai ona tofia o latou lava taitai ma fausia ni falelotu.

Fausia i luga o le Faavae

Na valaauna Arwell L. Pierce e avea ma peresitene o le Misiona a Mekisiko i le 1942. O le gauai atu i ona aafiaga ao ou tuputupu a'e i Chihuahua ma auauna atu i se misiona i Mekisiko, na aapa Peresitene Pierce i le alofa ma le malamalama ao ia aoao atu, faamalosia, ma fesoasoani i le tuufatasia o tagata o le ekalesia. Sa ia galue foi ma tagata o le Fonotaga lona Tolu e foia o latou atugaluga.

O se tasi o sini a Peresitene Pierce o le fesoasoani i tagata o le ekalesia e o i le malumalu.⁷ I le 1943 na faagasolo ai ni taumafaiga ina ia maua ai e le toatele o tagata o le ekalesia

ia faamanuiaga o le malumalu. Ina ua maea le fonotaga ma taitai i le lotofale o le Ekalesia i Arisona, ISA, na saunoa ai Elder Iosefa Filitia Samita (1876–1972), o le sa avea ma se tasi o le Korama a Aposetolo e Toasifulua i lena taimi, "Ou te le iloa pe aisea o le a pulepule-tutu ai e le gagana Peretania ia le sauniga o le malumalu."⁸ Na talosagaina Elder Antoine R. Ivins o le Fitugafulu ma Eduardo Balderas e i le matagaluega a le au faaliliu a le Ekalesia e faaliliu ia sauniga o le malumalu i le Faasipaniolo. O lenei faaliliuga na setiina ai le tulaga mo malumalu ina ia fausia i isi lauelele.⁹

E masani ona faia ni osigataulaga tetele a tagata o le ekalesia anamua mo le talalelei.





O SE LUMANAI OFOOFOGIA

"Ou te manatu o le lumanai o le Ekalesia i Mekisiko o le faaofoina ia tagata uma, e oo lava ia i latou o e na aofia ai. E matua masani lava tagata Mekisiko i alalafaga o latou nonofo ai, ma o loo i ai nisi o mea latou te le fia mananao i ai. Latou te vaavaai i mea o loo ofoina atu e le talalelei; ma ua latou naunau e totogi soo se tau."¹⁸

Elder Daniel L. Johnson,
Peresitene o le Eria i
Mekisiko

O le mauaina o sauniga o le malumalu i le gagana Sipaniolo i le Malumalu o Mesa Arisona ma se asiasiga mai le Peresitene o le Ekalesia o Siaosi Alapati Samita (1870–1951) i Mekisiko i le 1946 e fesoasoani i le tuufaatasia o le Au Paia Mekisiko,¹⁹ ua amata ai ona tuputupu ae le Ekalesia i se auala sa na o le mafaufauina e augatupulaga anamua. Ua fatuina ni misiona ma ni siteki fou i totonusi o le atunuua atoa, ma ua uunaia e aoga ua lagolagoina e le Ekalesia ia aoaoga.

I le 1964 na faapaiaina ai e le Ekalesia le El Centro Escolar Benemérito de las Américas,

1889: O ese mai faifeautalai mai le ogatotonu o Mekisiko.

1901: Toe faaaauau le galuega talai i le eria o le Aai o Mekisiko.

1910: Amata Fetauaiga i Mekisiko.

Peresitene Harold B. Lee (1899–1973), ona fesoasoani, nisi o Apostolo, ma isi taitai. Na faafafia ai iina le Aufaipesi a le Tape-neko, e faaopoopo i le taumafataga faale-agaga. Na alalaga tagata na auai i le konafesi, "Ua sili atu nai lo le mea ua tatou mafau-fauina e mafai—o se konafesi i lo tatou lava atunu."²⁰

O le vaitau o le 1970 sa avea ma se taimi mataina o le tuputupu ae i Mekisiko. I le 1970, sa toeitiit atoa le 70,000 tagata o le ekalesia i le atunuua; e oo atu i le faaiuga o le sefulu tausaga ua latalata i le 250,000 [tagata o le ekalesia].



1912: Malaga umi mai le nofoaga o Mamona, i Mekisiko i matu.

1913: Ua aveesea mai faifeautalai ona o fetauaiga; taitai e le peresitene o le misiona o Rey L. Pratt le Ekalesia i Mekisiko e ala i fesootaiga ma galuega ma tagata e tautatala faa-Sipaniolo i le Iunaite Setete.


o se aoga na tautuaina ia manaoga faale-aoaoga, faaagafesootai, faaleagaga, ma le faaletaitai o tagata seja oo ina ua avea ma se nofoaga autu mo le aoaoina o faifeautalai i le 2013.²¹ O Sister Lorena Gómez-Alvarez, o se ua faauu mai le aoga, na fai mai, "Na fesoasoani Benemérito ia te au ia iloa ma atiina ae au taleni, ma ia maua ai se vaaiga i tua atu ma se malamalamo o le talalelei lea ua faamanuaina ai lo'u olaga. O le a fesoasoani i faifeautalai i le taimi nei e faasalalau atu le talalelei ma o le a faamanuaina ai pea ia olaga o tagata, i se auala e ese mai ai."²²

O Se Vaitaimi o le Tuputupu Ae

O le konafesi o le eria a le Aai o Mekisiko i le 1972 o se tasi o taimi taua [o suiga] o le tuputupu ae o le Ekalesia. Na femalagaai tagata i mea mamaao ina ia faalogo ia

O le tolu tausaga ina ua mavae le konafesi a le eria, na vaeluaina ai e Elder Howard W. Hunter (1907–95) ni siteki se tolu na i ai ina ia fatuina ai ni siteki se 15 i le faaiuga o se vайасо se tasi, ma valaauina ai le tele o tagata Mekisiko talavou e avea ma ni taitai.²³

Ua faalauteleina foi le galuega faafaifeautalai i le taimi lenei. O le Misiona a Mekisiko, lea na tatalaina aloaia i le 1879, na vaeluaina mo le uluai taimi i le 1956; i le taimi nei ua 34 misiona i Mekisiko.²⁴ O Brother Jorge Zamora, o le sa auauna atu o se faifeautalai i le Misiona o le Aai o Mekisiko i Matu i le 1980, na molimauina le tuputupu ae. Na ia tomanatu ai i se vaega o lana misiona lea na malaga ai mo le itula ni tagata o le ekalesia e auai i le lotu; i le taimi nei ua i ai se siteki. Na ia fai mai, "E ofoofogia ia te au le ala o galue ai le Alii i le fausiaina o le Ekalesia, e tusa lava po o le a le atunuua po o le aganuu."





E auai tagata Mekisiko o le ekalesia i galuega faatino o le nuu. Sa fesoasoani nei tagata o le ekalesia i le totoina o laau i le 2007.

AGRÍCOL LOZANO HERRERA: ULUAI MEKISIKO E AVEA MA PERESITENE O LE SITEKI

O Agrícol Lozano Herrera sa avea o se tagata talavou o le Ekalesia ina ua ia faalogo ia Peresitene Spencer W. Kimball (1895–1985), o se tagata o le Korama a Apoetolo e Toasefuluua i lena vaitaimi, uunaia le au paia i Mekisiko e aooga ina ia mafai ona fesoasoani e faamalosia lo latou atunuu. Na filifili uso Lozano e avea ma se loia ma se puluvaga mo tagatanuu o lona atunuu. Sa avea foi o ia ma faufautua sili mo le Ekalesia i Mekisiko ma na auauna atu ma uluai Mekisiko e avea ma peresitene o le siteki, o se peresitene o le misiona, ma se sui risone i Apoetolo e Toasefuluua, ma o le peresitene o le Malumalu o le Aai o Mekisiko.¹⁹



1921: Ua toe tofia faiseautalai i le eria o le Aai o Mekisiko.

1926: O suiga o pulega i Mekisiko ua oo atu ai i le aveese faamalosio o faifeau uma e le ni tagatanuu.

1930s: Ua faatumauina e taitai i le lotoifale se tulaga mautu o le Ekalesia i Mekisiko.



1945: Ua faaliliuina ia sauniga o le malumalu i le gagana Sipaniol; amatalia ia faigamalaga i le Malumalu o Mesa Arisona.



Ua Anoanoai Malumalu i le Laueele

E fiafia tagata Mekisiko o le ekalesia i sauniga faaola o le malumalu ma e naunau e faia ni osigataulaga tetele o taimi ma tupe e tapuai ai. I le na o le silia ma le 100 tausaga ina ua uma ona faapaiaaina ai e Elder Thatcher le laueele mo le talaiga o le talalelei, na fausia ai se malumalu i le Aai o Mekisiko. O le fale tatala i le 1983 na fesoasoani e aumaia i fafo o le pouliuli le Ekalesia i Mekisiko ao asiiasi atu le faitau afe o tagata i le malumalu ma talosagaina nisi faamatalaga. I totonus o le 30 tausaga, e 11 nisi malumalu na faapaiaaina i le atunuu atoa, ma o le isi tasi o loo fausiaaina.

Na ola ae Isabel Ledezma i Tampico ma manatuaina le taimi na faamau ai ona matua i le Malumalu o Mesa Arisona. “E lua aso e malaga ai i Arisona ma e matua taugata tele,” o lana tala lea. “Ina ua faapaiaaina le Malumalu o Mekisiko Aai o Mekisiko, na faaitiitia le

mamao i le 12 itula e ala i le taavale. O le i ai o se malumalu i Tampico, ua mafai ai nei ona matou auai sooi i ai.”

Na fai mai Limae Ontiveros, o le sa avea ma peresitene o le Malumalu o Oaxaca Mekisiko mai le 2007 i le 2010, “O i latou o e o i ai se molimau loloto ma tumau e uiga i le talalelei e sailia se auala e o mai, e ui lava i luitau o le mamao ma mea tau tupe, ma ua latou vaai i le malumalu o se faailo o le sulufaiga.”

Na faaopoopo mai Sister Ledezma, “Matou te manaomia le Agaga i o matou aai, ma o le i ai o se malumalu iinei e fesoasoani lea. Afai e i ai ni a matou faafitalui, pe a matou faanoanoa, e latalata mai le malumalu ma e matou te maua le filemu iina.”

Faatoilaloina o Faigata

E feagai tagata Mekisiko o le ekalesia ma luitau ma faaososoga e masani ai, ae ua latou



1946: Asiasi
atu Peresi-
tene Siaosi
Alapati
Samita i
Mekisiko.



1950: Fatuina
ni itu ma ni
paranesi i le
toeitiiti lava o
setete uma o
Mekisiko.

1961: Ua faatu-
ina le Siteki i le
Aai o Mekisiko
ma avea ai
Harold Brown
ma peresitene.



1964: Ua tatala le
Aoga o Benemérito
i le Aai o Mekisiko.

1967: Ua faatulagaina le
siteki lona lua i le Aai o
Mekisiko; ua valaauna ia
Agricol Lozano Herrera e
avea ma uluai peresitene
Mekisiko o le siteki.

1972:
Konafesi
a le eria
i le Aai o
Mekisiko.



matautia, o faaosoosoga e matuai faigata lava, ae o le fesoasoani mai o le tatalo tatou te le auai atu ai i faaosoosoga a le lalolagi, ma o le a tatou tutu o ni molimau o se olaga sili atu le lelei."

Tulimata'i atu i le Lumanai

Ua leva ona faatuina le talalelei i Mekisiko, ae o loo i ai pea lava ni eria o loo tau atiaeina ai le Eklesia. O Jaime Cruz, e 15 tausaga, ma lona aiga ua na o le pau ia o tagata o le Eklesia i lo latou tamai nuu i mauga i luga o le Aai o Oaxaca. La te galulue ma lana uo o Gonzalo i le seminare o loo faia suesuega i le fale i le aluga o le vasio. O Aso Toonai uma lava la te o ai i le pasi mo le lua itula i le falelotu au-pito lata ane mo le vasega seminare faatasi ai ma isi talavou mai le la uarota. E faasoa atu e Jaime ni mea sa ia aoaoina i le seminare i lana vasega i le aoga ma taliina a latou fesili. O le




uso laitiiti o Jaime o Aleki, o se tiakono, o se taitai i totonusi o ana uo. Na fai mai Alex afai na te fai atu lelei ia i latou e aua nei faaaogaina ni gagana leaga pe ofuina ni ofu le lelei, latou te faalogo i mea o ia fai atu ai. Ua iloa uma e Jaime ma Alex o le umiaina o le perisitua o se faamamaluga ma se tiutetauave. "Ou te iloa o le perisitua ua tuuina atu i alii talavou e faamamaluna ai le suafa o le Atua e ala i le auauna atu i isi ma le talaiina o le talalelei," o le tala lea a Jaime.

I le taimi o se asiasiga talu ai nei i Mekisiko, sa feiloai ai Elder Neil L. Andersen o le



O LE TUPUTUPU AE O LE EKALESIA I MEKISIKO



O Malumalu:

e 12 ma le isi 1
na fofogaina
i Tijuana

Siteki:

222

Itu:

36

Uarota ma

Paranesi: 2,000

Misiona:

35

*Talu mai Iuni 2013



1975: E 12 ni siteki fou na faatulagaina i le tele o eria o Mekisiko.

1983: Faapaiaina le Malumalu o le Aai o Mekisiko.

1993: Toefuatina aloia faale tulafono le Ekalesia i Mekisiko.

2000: Ua faapaiaina malumalu laiti e iva.



2009: Valaauiina le Au Peresitene o le Eria o uluai Tagata Mekisiko uma.



2013: Ua tatala le nofoaga autu o aoaoga mo faifeautalai i le Aai o Mekisiko.

Arwell L. Pierce and the Third Convention," *BYU Studies* vol. 37, nu. 1 (1997): 127–151.

8. Tagai Eduardo Balderas, "Northward to Mesa," *Ensign*, Sept. 1972, 30.
9. Tagai Eduardo Balderas, "Northward to Mesa," 30–31.
10. Tagai "The Church Moves On," *Improvement Era*, July 1946, 446; John D. Giles, "Father Lehi's Children," *Improvement Era*, Sept. 1946, 556.
11. Tagai Joseph Walker, "Missionary surge prompts LDS Church to open new MTC in Mexico," *Deseret News*, Jan. 30, 2013, www.deseretnews.com.
12. O nei upusii ma isi upusii na sosoo ai mai tagata Mekisiko o le Ekalesia i nei ona po na aumai mai faatalanoaga ma le tusitala i le aso 7 o feb., 2013.
13. In Jay M. Todd, "The Remarkable Mexico City Area Conference," *Ensign*, Nov. 1972, 88.
14. Tagai Eleanor Knowles, *Howard W. Hunter* (1994), 202.
15. Tagai Don L. Searle, "One Million in Mexico," *Ensign*, July 2004, 34; Kristine Miner, "The Church in Oaxaca, Mexico," *Ensign*, Apr. 2001, 78.
16. Mai se faatalanoaga ma le Matagaluega o Otovisio ia Aperila 2012.
17. Rey L. Pratt, in *The Young Woman's Journal*, vol. 25, no. 9 (1914), 539.
18. Mai se faatalanoaga ma le tusitala i le aso 5 Ape., 2013.
19. Tagai "Agricol Lozano Herrera: Mexican Mormon Church Leader," http://mittromnemormon.net/meet-some-mormons-2/meet-some-mormons-2/agricol-lozano-herrera-mexican-mormon-church-leader.



E fiafia tamaiti aoga seminare i Oaxaca e mafuta faatasi.



Joseph Fielding Smith

FAAMAONI MA FAATUATUA

O Musumusuga mai le Soifuaga ma Aoaoga a
IOSEFA FILITIA SAMITA

Saunia e Hoyt W. Brewster Jr.


Ina ua ulu atu Iosefa Filitia Samita e 33 tausaga i le Tapeneko i Sate Leki i le aso 6 o Aperila, 1910, e auai i le konafesi aoao, sa fai atu se tagata faasino nofoa ia te ia, "Ia Iosefa, o ai le apostolo fou?"

"Ou te le iloa," o le tali lea a Iosefa. "Ae e le o oe ma e le o au!"¹

Ao faiatua mai ia igoa o le Au Apostolo e Toasefululua mo se palota lagolago, na faafuasei lava ona maua e Iosefa se musumusuga atonu o lona igoa lea o le a sosoo le tauina mai. Ma sa tauina mai, ma lagolagoina ai o ia e avea ma alii lona 12 o lena korama faamamaluina.

Sa faaalia le lotomaualalo ma le aga malie o Iosefa ina ua ia toe foi mai i le fale mai le konafesi e faailoa atu i lona aiga lona valaauga fou. Sa ia faafeiloaia lana ava ma se faamatalaga le mautonu: "Ou te manatu e tatau ona faatau atua le povi," o lana tala lea. Ma le leai o se masalosalo, sa faateia o ia ao ia faatalitali mo se faamalamalamaga faaopoopo. O lana tali faigofie lea, "E leai sou taimi ou te toe tausia ai!"² Sa faapea ona amatalia ai se galugega faa-apostolo lea na silia ma le onosefulu tausaga.

Atalii o le atalii o Ailama Samita, o Iosefa Filitia Samita o le Peresitene lona 10 o Le Eklesia a Iesu Keriso o le Au Paia o Aso e Gata Ai. Sa umi atu lana auaunaga o se tasi o le Korama a Apostolo e Toasefululua a o lei valaauna e avea ma Peresitene o le Eklesia nai lo soo se isi lava Peresitene o le Eklesia. I le 60 tausaga o lona avea ai ma se tasi o lena korama o molimau faapitoa, sa ia malaga muamua i le solofanua ma le taavale toso ma mulimuli ane i le taavale ma se vaalele e aoao atu le Au Paia. O ana saunoaga ma le tele o tusitusiga na faamanuiaina ai le Eklesia ma i latou uma o le a faalogo i ana savali musuia.



*"Ia tatou
faamaoni ma
faatuatua i
taimi uma,
ma ia i ai se
naunautaiga
e tausi i polo-
aiga a le Alii
ma faamama-
luina o Ia ma
manatua fea-
gaiga na tatou
osia ma Ia."*



Sa valaaulaina au e tusia lenei tusiga talu ai le ma mafutaga ma Peresitene Iosefa Filitia Samita, o lē sa ou valaauiua ma le alofa o Tama Matua. Sa faagaetia au i lona soifuaga mai le taimi na ou fanau ai, ina ua ia faia lou sauniga o le igoa ma le faamanuiaina, seja oo ina maliu o ia, ina ua avea au ma atalii o fanau o le na siiina lona pusa maliu i lona falelauasiga.

O Se Perofeta na Muai Faauuina

Faapei o perofeta uma a le Atua, na muai faauuina Iosefa Filitia Samita e sau i le lalolagi e tusa ai ma le faatulagaga paia a le Alii (tagai Galuega 17:26). O Iosefa o le lona fa o le fanau ae o le atalii muamua a Julina Lambson Samita. I le agaga faamaualalo o le tina faamaoni i le Feagaiga Tuai o Hana (tagai 1 Samuelu 1:11), na tauto atu Julina faapea afai e avatu

e le Alii ia te ia se atalii, “o le a ia faia uma i lona malosi e fesoasoani ia ia te ia ia aoga mo le Alii ma lona tama.”³ E le gata i le taliina e le Alii o lana talosaga ae na faaalia foi ia te ia, a o lei fanau mai lana tama tama, o le tamaitiiti o le a i ai se aso o le a valauina ai e auauna atu o se tasi o Ana molimau faapitoa i le Korama a Apostolo e Toasefululuua.⁴

Na soifua mai Iosefa i le aso 19 o Iulai, 1876, e Iosefa F. ma Julina Lambson Samita. Na fanau mai Iosefa, ao avea lona tama o se Apostolo ma se fesoasoani ia Peresitene Polika Iaga. Ina ua iva masina o Iosefa, sa ave o ia e ona matua i le faapaiaga o le Malumalu o St. George Iuta. O se taimi mulimuli ane sa ia talasua ai faapea, “O lou uluai tofiga i le ekalesia o le malaga faatasи lea ma Polika Iaga e auai i le faapaiaga o le Malumalu o St. George.”⁵

Ina ua maua e Iosefa lona faamanuiaiga faapeteriaka i le 19 tausaga, o se peteriaka musuia na tuuina ona lima i luga o le ulu o Iosefa ma tau atu: “O lou faamanuiaiga le ola i se olaga lelei umi ma o le finagalo o le Alii o le a avea oe ma se alii malosi i Isarel. . . . E moni o le a e tu i le lotolotoi o tagata o se perofeta ma se talifaaaliga ia i latou, ona ua faamanuiaina ma faauuina oe i lenei valaauga.”⁶

Olaga Faaleaiga: O Se Tuufaata-siga o le Alofa ma Tofotofoga

Ia Iosefa Filitia Samita, “o le aiga o le faalapotopotoga sili ona taua i le taimi nei ma le faavavau.”⁷ Na ola ae o ia i se aiga e puleaina i le alofa, faatuatua, tulaga maualuluga faatulagaina lelei, ma le galue ma le filiga, ma sa

Luga: O le ata lenei o le taulealea o Iosefa Filitia Samita sa tuuina i le Tusi Paia a le aiga a ona matua. Taumatau: Fiafia Iosefa e taalo po polo ma lona uso o Tavita. Lalo: O Elder Samita (lona lua mai le agavale) ma uso faifeautalai i Egelani, 1901. O le ata o loo i le itulau faafeagai e aumai foi mai le taimi ao avea o ia o se faifeautalai. Lalo, taumatau: O Elder Samita (agavale) ma uso Apostolo o Siaosi Alapati Samita ma Isarel Samita, 1936.



ia saili pea lava pea e aumai na lava mataupu e tasi i lona lava aiga. (Tagai i le mataupu e 4, 15, ma le 16 o *Aoaoga a Peresitene o le Ekalesia: Iosefa Filitia Samita*.)

Na ia faaipoipo ia Louie Emily Shurtliff i le Malumalu o Sate Leki i le 1898. I le mavae o le tausaga e tasi na valaauiua ai o ia i se misiona i Peretania Tele mo le lua tausaga ma sa lagolagoina ai ma le faamaoni e lona toalua. Ina ua toe taliu mai, na toe faaauau le la faatasiga ma sa faamanuiaina i le fanau mai o ni afafne e toalua. O le mea e faanoanoa ai, i le taimi o se maitaga faigata lona tolu na maliu ai Louie.

I lona faavauvau na tatalo ai Iosefa, "Ou te tatalo i Lau Afio, fesoasoani mai ia te au, ia ou ola ina ia ou agavaa e feiloai ma ia i le mamalu e faavavau, ina ia ma toe faatasi ma ia, ma ia le toe faaeseeaina. . . . Fesoasoani mai ia te au e tausi i au fanau taua ina ia tumau i le mama ma le le pona i o laua olaga atoa."⁸

I se uunaiga a lona tama, na sailia ai ma le agaga tatalo e le tamā faavauvau o le fanau e toalua se ava ma se tina mo lana fanau laiti. Na faamanuiaina ona manaoga amiontonu i le mauaina o Ethel Georgina Reynolds i lona olaga. Sa la faaipoipo ia Novema 1908 i le Malumalu o Sate Leki. Na avea lenei tamaitai ofoofogia ma tina o le fanau teine e toalua muamua a Iosefa ma mulimuli ane, na fanauina ai se fanau faaopoopo e toaiva.

I se tasi taimi, sa mamafa lava i le mafaufau o le Apostolo le avega a lona faletua ao ia malaga atu i se konafesi faalesiteki. Sa ia tusia se tusi ia te ia ma faapea mai: "o loo ou mafaufau ia te oe ma manao e faatasi ma oe i taimi uma mo ni vaiaso o i luma, e fesoasoani e tausi ia te oe. O le a ou fesoasoani ia te oe i mea uma ou te mafai a pei ona i ai, ma le faamoemoe o le a mafai ai ona e *lagona* la'u faatosinaga. Fai atu i tamaiti ina ia agalelei ia te oe ma le tasi



i le isi."⁹ Ona ia faasoa mai lea ia te ia o lagona loloto o lona loto i le tulaga o se solo, lea sa avea mulimuli ane o se tasi o a tatou viiga, "E Foliga Umi le Malaga?" (nu. 127).

O le mea e faanoanoa ai, na maliu Ethel i le 1937. I le taimi o lona maliu, e toalima le fanau e lei faaipoipo o i le aiga. Sa lagona e Elder Samita le uunaiga e saili se isi ava ma se soa. I le 1938, na ia faaipoipo atu ai ia Jessie Evans Samita i le Malumalu o Sate Leki.

Na tusia e se tasi e iloa lelei i laua: "E ui i le eseesega i le luasefulu ono tausaga ma le eseesega i uiga, soifuaga, ma aoaoga, ae sa matagofie le

fegalegaleaiga a Iosefa Filitia ma Jessie Evans Samita. . . . O le mea na faafesootai ai lenei va tele i nei uiga esese tele o le alofa faamaoni ma le faaaloalo o le tasi i le isi."¹⁰ (Tagai i itulau e 6–23 o le tusi lesona.)

O Se Tagata Sailiili i le Aoaoina e ala i le Suesue ma faapea foi i le Faatuatua

O Iosefa Filitia Samita sa lauiloa i le Ekalesia i le avea ai ma se tagata atamai i mau ma le talalelei. E amata i lona talavou, sa i ai sona manao faaloloto e "saili i le aoaoina, e ala lava lea i le duesue ma le faatuatua foi" (MF&F 88:118). Sa ia faitauina faalua le Tusi a Mamona ao lei atoa lona 10 tausaga. Ina ua misia o ia e ana uo, e masani lava ona latou mauaina o ia i le mea e teu ai vao mago mo manu o loo faitauina ia tusitusiga paia.¹¹

Sa ia faamatala atu i se aulotu i ni nai tausaga mulimuli ane, e "mai le taimi sa ou muai iloa ai faitau, sa ou maua le fiafia ma le faamalieina sili mai le duesueina o tusitusiga paia . . . nai lo se isi lava mea i le lalolagi atoa."¹² (Tagai i le mataupu e 10 ma le 18.)

I se tasi taimi na tuuina atu ai e Peresitene Heber J. Grant (1856–1945) se faamālo i le sikolasipi a Peresitene Samita e



Luga: O Peresitene Samita ma ona atalii. Luga i le taumatau: O Elder Samita o loo faafeiloaia e Peresitene Tavita O. Makei, 1961. Taumatau: O Peresitene Samita o loo alala i luga o le tulaga i le Tapeneko i Sate Leki. Lalo: O Peresitene Samita o loo pueina lona ata i se taaloga pesipolo, o se taaloga sa fiafia e taalo ai a o talavou.



ala i le tauina atu, "Ou te mafaufau ia te oe o oe o se tagata sili ona atamai i tusitusiga paia o le Au Pulega Aoao a le ekalesia ua i ai nei."¹³

O lona galala mo le aoaoina e le o ta'ua ai faapea sa lei auai o ia i taaloga i le avea ai ma se tama talavou e oo lava i le avea ma se tagata matua. Sa fiafia o ia e taalo pesipolo ma le tele o taaloga lea na taaalo ai le autalavou na ola ae i se siosiomaga o mea tau faatoaga. I le avea ma se tagata matua sa avea o ia ma se tagata taalo po polo naunautai ma e auai soo atu i taaloga a lana lava fanau. Sa auai foi o ia i taaloga i faatasiga a aiga. Ou te manatua faamama'i se taaloga sofipolo ina ua taina e lo'u tamamatua se polo ma lavea ai le meapueata a se tamaloa a lo matou aiga na pueata mai le ituagavale o le malae.

O Se Tagata e Puipuia ma le Agaalofa le Faatuatuaga

E oo lava i le taimi ao leai valaaolina o se Aposetolo, o Iosefa Filitia Samita sa lauiloa o sē puipuia le faatuatuaga, lea e i ai taimi na mafua ai ona manatu nisi o ia o se tagata sauva. E ui

sa ia le faavaivai i lona manao ina ia faamaoni i ana feagaiga ma ia uunaia tagata uma e taliaina le talalelei toe-fuataiina a Iesu Keriso, ae sa i ai sona itu agavaivai sili atu lea sa faigofie ona iloa e lona aiga ma uo. Na saunoa mai Peresitene Spencer W. Kimball (1895–1985) e faapea: "E tele taimi tatou te fai atu ai talu ai ona o le Toasefululu o le a avea ma faamasino o Israelu, soo se tasi o i tatou o le a faamasino-in a ia o le a fiafia, aua o lana faamasinoga e agalelei, alofa mutimutivale, tonu, ma paia."¹⁴

Na faaalia e Peresitene Samita se faataitaiga o lea agalelei i se fonotaga lea na talanoaina ai se faalavelave na aafia ai se taavale a le Ekalesia. O se toeaina na aveina se loli o fualau faisua ma e leai se inisiua na mafua ai le faalavelave. Ina ua mavae ni feuta-gaiga, sa fautuaina le Ekalesia e ave le mataupu i le faamasinoga. Ae peitai, na saunoa mai Peresitene Samita: "Ioe, e mafai ona tatou faia lena mea. Ma afai tatou te tuleia ma le malosi atoa, atonu o le a tatou manumalo foi i le aveesea mai o le loli mai si tamaloa; ona faapefea lea ona ola o ia? Na toe suia e le komiti lana fautuaga, ma faamalolo lea mataupu."¹⁵

Sa ou lagona le alofa o isi mo ia ao ou latalata atu ia Peresitene Harold B. Lee (1899–1973) i le Fanuatanu o Sate Leki ina ua mavae le faapaiaga o le tuugamau o Peresitene Samita. Sa ou fai atu ia te ia, "Peresitene Lee, i le avea ai ma se sui o le aiga ou te manao ia e silafia lou talisapaia tele o le agalelei sa e faaalia i lo'u tamamatua. I le tali mai sa ia tilotilo sao mai i ou mata ma fai mai ma le agamalu, "Ou te alofa i lena tamalii!"



2014 KOSI O SUESUEGA

Olenei tausaga, o le a suesue ai e le usoga a le Aualofa ma e umia le Perisitua Mekisateko *Aoaoga a Peresitene o le Ekalesia: Iosefa Filitia Samita*. O le a fesoasoani lenei tusi lesona ia mautinoa ai o avanoa ia aoaoga musuia a Peresitene Samita mo tupulaga o loo i ai nei ma le lumana, talu ai ona maliu o ia i le 1972 ina ua faatoa silia ma le 3 miliona le aofai o tagata auai o le Ekalesia. O nisi o i latou o e o loo soifua o le a maua se manatuaga patino o le soifuga faamamaluina o Peresitene Samita, ae o le a mafai ona siitia ma musuia tagata uma e ala i le mana o ana aoaoga.

A o e suesue ma mafaufau ma le agaga tatalo i ana aoaoga musuia, o le a faamalosia lau molimau ma o le a faamanuiaina oe i se malamalamfaateleina o le upumoni faigofie ma mama o le talalelei a Iesu Keriso. O lenei kosi o suesuega o le a faateleina ai lou naunau e ola ai ina ia “faamaoni ma faatuatua”. ■

Faaaliga: Na soifua mai le tina o le tusitala, o Naomi Samita Brewster, i le tausaga na valaauna ai Iosefa Filitia Samita i le Korama a Aposetolo e Toasefulula ma o le tamaitiilona lua a Ethel Georgina Samita, o le na faaipoipo ma Peresitene Samita i le mavae ai o le maliu o lona faletua muamua.

FAAMATALAGA

1. *Aoaoga a Peresitene o le Ekalesia: Iosefa Filitia Samita* (2013), 16.
2. Joseph Fielding Smith Jr. ma John J. Stewart, *The Life of Joseph Fielding Smith* (1972), 176.
3. *Aoaoga: Iosefa Filitia Samita*, 1; tagai foi Bruce R. McConkie, “Joseph Fielding Smith: Apostle, Prophet, Father in Israel,” *Ensign*, Aug. 1972, 29.
4. See Bruce R. McConkie, “Joseph Fielding Smith,” 29.
5. Iosefa Filitia Samita, sii mai i le Smith and Stewart, *Le Soifuaga o Iosefa Filitia Samita*, 121.
6. Quoted in Smith and Stewart, *Le Soifuaga o Iosefa Filitia Samita*, vii.
7. *Aoaoga: Iosefa Filitia Samita*, 75.
8. *Aoaoga: Iosefa Filitia Samita*, 289.
9. Iosefa Filitia Samita, sii mai i le Smith and Stewart, *Le Soifuaga o Iosefa Filitia Samita*, 21.
10. *Aoaoga: Iosefa Filitia Samita*, 24.
11. Tagai i *Aoaoga: Iosefa Filitia Samita*, 4.
12. *Aoaoga: Iosefa Filitia Samita* 5.
13. Heber J. Grant, in Francis M. Gibbons, *Joseph Fielding Smith: Gospel Scholar, Prophet of God* (1992), 290.
14. Spencer W. Kimball, in Bruce R. McConkie, “Joseph Fielding Smith,” *Ensign*, Aug. 1972, 28.
15. See Lucile C. Tate, *Boyd K. Packer: A Watchman on the Tower* (1995), 176.
16. Iosefa Filitia Samita, i le Conference Report, Oct. 1919, 88; faaopoopo le faamamafa.
17. Boyd K. Packer, “Covenants,” *Ensign*, Nov. 1990, 84.
18. Iosefa Filitia Samita, i le Conference Report, Oct. 1912, 124–25.

O Se Auauna Faamaoni ma Faatuatua

O le galuega a Peresitene Samita sa faailoga i le usiusitai i poloaiga a tusitusiga paia e talai atu le salamo (tagai, mo se faataitaiga, MF&F 6:9; 11:9). Sa ia saunoa mai: “Ua ou manatu ua avea ma au misiona, ina ou lagona le fiafia, ou te mafaufau, i le Agaga o le Alii i au femalagaaiga i siteki o Siona, ma fai atu i tagata o *nei* o le aso o le salamo ma valaau atu i tagata o le Au Paia o Aso e Gata Ai ina ia manatua a latou feagaiga, . . . uunaia i latou ina ia *faamaoni ma faatuatua* i mea uma.”¹⁶ (Tagai i le mataupu e 5.)

I le faagasologa o lona soifuaga ua toeitiiti 96 tausaga, na tatalo ai Peresitene Samita ina ia ona tumau faamaoni ma faatuatua ma tumau seia oo i le oti. E moni lava, sa matauina e Peresitene Boyd K. Packer, Peresitene o le Korama a Aposetolo e Toasefulula: “E oo lava ina ua mavae le ivaselulu e na te tatalo ina ia ona ‘tausia ana feagaiga ma matafaoi ma tumau e oo i le iuga.’”¹⁷

Mo Peresitene Samita, o le “faamaoni ma le faatuatua” sa sili atu nai lo se fuaitau e fai soo. O se faaaliga mai le loto o lona faamoemoe mo tagata uma—mo tagata o le Ekalesia o e ua osi feagaiga ma ioe, mo fanau uma a le Tama o i le Lagi. “E tatau ona tatou muamua ma taimua, . . .” na aioi mai ai Peresitene Samita, “mo le malo o le Atua ma Lana amiontonu. Ia tatou faamaoni ma faatuatua i taimi uma, faatasi ai ma se naunautaiga e tausi i poloaiga a le Alii ma faamamalu ia te Ia ma ia manatua feagaiga na tatou osia ma Ia. O lau tatalo lenei

mo Isaraelu uma.”¹⁸ (Tagai i mataupu e 19–22.)

A o e mafaufau loloto ma le agaga tatalo i ana aoaoga musuia, o le a faamalosia lau molimau ma o le a faamanuiaina oe i se malamalamfaateleina o le upumoni faigofie ma mama o le talalelei a Iesu Keriso. O lenei kosi o suesuega o le a faateleina ai lou naunau e ola ai ina ia “faamaoni ma faatuatua”. ■

- O lo tatou sootaga i lo tatou Tama o i le Lagi ma lo tatou Faaola
- O le faatosinaga a le Agaga Paia i o tatou olaga
- O le misiona a le Perofeta o Iosefa Samita
- O le taua o feagaiga o le malumalu
- Pe faapefea ona i ai i le lalolagi ae le ni o o le lalolagi
- Pe faapefea ona saunia mo le Afio Mai Faalua o Iesu Keriso e ala i le faamaoni ma le faatuatua

O loo maua le tusi lesona i le ititoneti i le LDS.org ma masini feaveai i mobile.lds.org.

MATA E MAFAI ONA OU FAITAUNA LENA TUSI?

Etusa ma le 50 tausaga talu ai, sa ma talai ai ma la'u soa faifeautalai i tafatafa o le Iunivesite o Córdoba i Atenitina, sa valaaulia i maua e se alii talavou i totonu o lona fale mautotogi. Sa vave ona foliga mai sa latou valauliaina ma ana uo i maua ina ia finau mai e uiga i le i ai o se Atua.

Ma te lei fia finau, o lea na ma ioe ai e feiloai i se taimi mulimuli ane e talanoaina ai la maua savali i se siosiomaga e siitia ai le aaooina. Ina ua ma toe foi mai, na faamalamalama mai e le alii talavou le mafuaaga na te talitonu ai e leai se Atua. Na fai mai o ia na faia e le tagata le Atua ona o lona manao ina ia talitonu i se mea e sili atu, se mea ofoo fogia.

Ina ua oo i lo ma taimi, sa ou fesili atu, "E faapefea ona e iloa e i ai se Iunaite Setete? Ou te molimau atu e uiga i lona moni ma fesili atu pe i ai nisi faamaoniga e faamaonia ai lona i ai. Na fai o ia sa ia faitau i ai i tusi ma

nusipepa. Ona ou fesili atu lea pe sa ia talitonu i la'u molimau ma mea sa ia faitauina. Sa fai mai faamalosi o ia ioe na ia talitonu.

"O lona uiga la e le mafai ona tatou faafititia le molimau a i latou, e pei o a'u, e sau mai le Iunaite Setete," sa ou fai atu ai. "E le mafai foi ona tatou teena le molimau a i latou o e ua tusia e uiga i ai." Na ioeina e le alii talavou.

Ona ou fesili atu lea, "E tusa la ma lenei manatu, e mafai ona tatou teena ia molimau a i latou o e na vaai i le Atua ma tusi e uiga i o latou aafiaga?" Sa ou faaali atu ia te ia le Tusi Paia, ma ta'u atu ia te ia o loo i ai i totonu ia molimau a alii ma tamaitai o e na vaai ma talanoa ma le Atua ma Iesu Keriso. Sa ou fesili atu pe mafai ona tatou teenaina ia molimau o loo i ai i le Tusi Paia, ma sa ia fai mai ma le musuā e leai.

Ona ou fesili atu lea, "O le a sou manatu e uiga i se tusi na tusia e ni

Sa ma tuuina atu i le alii talavou se Tusi Paia Mamona ma molimau atu e uiga i le alofa o le Atua mo Ana fanau.

tagata e ese mai ia i latou o i le Tusi Paia o e na vaai i lea lava Atua e tasi e pei o tusitala o le Tusi Paia? Sa ia tali mai e le o i ai se tusi faapena.

Na ma faaalia ia te ia le Tusi a Mamona ma aoao atu ia te ia lona faamoemoega. Sa ma molimau atu i le moni ma o loo fesootai mai pea le Atua e ala mai i perofeta soifua i le taimi nei.

I le te'i, na fai mai ai le alii talavou, "Ua mafai ona ou faafememeaiina ia faifeau uma mai isi ekalesia. O loo ia te oulu se mea ou te lei faalogo ai lava muamua. Mata e mafai ona ou faitauina lena tusi?" Sa ma tuuina atu ia te ia le tusi ma molimau atu e uiga i le alofa o le Atua mo Ana fanau.

Talu ai ona o le a faaiuina le semesa, sa le mafai ona ma toe asiasti i lenei alii talavou a o lei foi atu o ia i lona aiga i Polivia. Ae ui i lea, sa ou tatalo o le a ia faitauina le tusi ma maua se molimau.

I le 2002 sa valaaicina a'u e avea ma se peresitene o le paranesi faa-Sipaniolo i le Nofoaga Autu o Aoaoga mo Faifeautalai i Provo. I se tasi Aso Sa sa ou faamatalaina ai le tala lenei i faifeautalai. Ina ua maea sa tau mai ia te au e se faifeautalai mai Polivia faapea na ia faalogo o faamatalaina e se tamaloa matua i lana siteki le tala o lona liua—le tala lava lea e tasi sa ou faamatalaina iinei.

Sa faatumulua o'u mata i loimata. Ina ua mavae le 40 tausaga, sa ou mauaina se tali o a'u tatalo e uiga i le alii talavou mai Polivia. Ua ia iloaina o loo i ai se Atua ma Lana fuafuaga sili o le fiafia. Ou te iloa o le a i ai se aso ma te toe feiloai ai, ma o le a ma olioli faatasi ma ia i le talalelei. ■

Neil R. Cardon, Iuta, ISA



O LE MALAGA A MAMÁ SEFI I LE MALUMALU

Se tasi aso ao ou i ai le ofisa o le Misiona a Mekisiko i le vaitau o le 1940, na taunuu atu ai se tuafafine mai le tamai taulaga o Ozumba, o se taulaga e tu i le tausiusiuga o Popocatépetl, o se mauga mu ola pe a ma le 43 maila (70 km) i sautesasae o le Aai o Mekisiko. Matou te iloaina uma lava o ia. O lona igoa o Mamá Sefi.

E nonofo faifeautalai faamisiona i lona taimi fale e fai i piliki mai le palapala ma vaovao, lea na te teuina ai se potu mo nao i latou. O Mamá Sefi, e le atoa le lima futu (1.5 m) o le maualuga, e maua ana tupe i le faatauina atu o fualaau aina suamalie i maketi i alalafaga i totonu o Ozumba. E tofu le alalafaga ma se aso o le maketi, ma e malaga o ia i maketi taitasi e faatauina atu ana fualaau aina suamalie.

Sa malaga mai o ia i le ofisa o le misiona i lena aso o afisiina se taga falaoamata tele. Sa tumu i *tostones*, o afa-peso siliva lea na ia sefeina i le tele o tausaga. O nisi o tupe siliva e mai le vaitaimi o Porfirio Díaz, lea sa pulea Mekisiko mai le 1884 e oo i le 1911. O Mamá Sefi na malaga mai le pasi ma lana taga tupe mai Ozumba i le fale o le misiona. Sa ia tauina atu ia Peresitene Arwell L. Pierce sa ia sefeina le tupe mo le tele o tausaga ina ia mafai ona ia malaga atu i le Malumalu o Sate Leki ia maua ona faaeega paia.

Sa ia mauaina se faatagaga e tuua le atunu, sa nonoina atu e se faifeautalai se atopau ia te ia, ma sa matou momoliina o ia i le nofoaafi. Sa telefoni atu Peresitene Pierce i se tagata i El Paso, Texas, e faatali le nofoaafi i leisi itu o le tuaoi o le I.S. ma faaee ia Mamá Sefi i luga o se pasi mo le Aai o Sate Leki. Sa faatalia e ni tagata o le

paranesi faa-Sipaniolo i le Aai o Sate Leki le pasi, vaaia manaoga o lona fale, ma fesoasoani ia te ia i le malumalu.


I ni nai vaiaso mulimuli ane, na toe foi atu ai Mamá Sefi i le Aai o Mekisiko atoa ai ma lona aiga i Ozumba. Sa ia faia le malaga umi ma le saogalemu. Ona ia toe faaauau lea o le faatauina atu o fualaau aina suamalie i maketi.

E le tautala Mamá Sefi i le gagana Peretania, ma o lea sa matou fesiliglia ai o ia pe na faapefea ona ia okaina ia meaai ao malaga i le pasi mai El Paso i le Aai o Sate Leki—o se malaga e

tele ni aso. Sa ia fai mai sa aoaoina o ia e se tasi i le tauina o le “pai apu” i le faaPeretania, ma o taimi uma lava e tu ai le pasi mo taumafataga, na te okaina le pai apu.

Talu ai ona e pau na o upu sa ia iloaina i le faaPeretania, sa ia ola i le pai apu i le taimi o lana malaga i le pasi i le itu o setete—i le aluga *ma le* toe foi mai. Ae e lei afaina lea mea ia Mamá Sefi. Nai lo lena, sa toe foi mai o ia ma le agaga faafetai ma le susulu mai lona aafiaga i le malumalu. ■

Betty Ventura, Iuta, ISA



N a malaga mai le pasi ia Mamá Sefi pe tusa ma le 43 maila (70 km) i le fale o le misiona ma lana taga tupe.

ALU E LIPEA LANA LAAU PESE

Olō matou tuaoi o le faifeau a le au-talavou a se ekalesia i le lotoifale, ma e masani ona asiisi atu le autalavou o lana ekalesia ia te ia. Sa le o se vaaiga masani le tele o ni taavale e paka i luma o lona fale i le ao ma le po.

O nisi o nei talavou e taina ni musika malomaloa i laau a o latou taavale i taimi uma. E mafai ona matou faalogoina mai le tele o poloka, ma ao latou latalata mai, e luluina faamalama o lo matou fale. E masani ona fafaguina au i le po i le leotele o le musika. Na tuputupu ae lo'u faagau-lemalie, ma sa amata ona ou vaaia nei tupulaga talavou o ni o'u fili.

I se tasi aso a o ou saluina ia lau laau, sa ou faalogo i le malomaloa mai o le taina o le laau taavale mai

le tele o poloka o mamao ese atu. E lei umi ae ua amata ona faasolosolo ona latalata mai ma leotele mai le leo. E oo atu i le taimi na afe mai ai i le pioga ma agai mai i le fale a lou tuaoi, ua ou ita ma tatalo ina ia faaleagaina e le Tama Faalelagi le laau taavale.

Na liua lau tatalo naunautai i se tasi o viiga ma le agaga faafetai ina ua faafuasei lava ona pe le laau taavale ao tu le taavale i luma o le fale. Na ou galue i laau taavale ma iloa ai i le leo e lei tapeina—ua leaga.

Na le fiafia le alii talavou i le pe o lana laau taavale, ma sa faapotopoto atu ana uo e faafafia ia te ia. Ia te au, i le isi itu, na ou lagona se tulaga o le faamalieina i le molimauina o mea sa ou manatu o le

N a ou lagona se tulaga o le faamalieina i le molimauina o mea sa ou manatu o le aao o le Atua o taina le laau taavale.

aao o le Atua o taina le laau taavale.

Peitai ao faaaauau pea ona ou vaavaai atu, sa ou iloaina ai o loo ou tilotilo atu ia te au lava ia e pei ona ou amio ai i le tele o tausaga ua mavae. Na faamaluluina lo'u loto, ma amata ona ou mafau-fau faapea atonu o lenei alii e le o so'u fili. Ona musumusu mai lea o le Agaga, "Alu e lipea lana laau taavale."

Sa ou ofo i le uunaiga ma taumafai ina ia aveesea. Aisea e tatau ai ona ou lipeaina se mea o loo fai ma faasoessa i lo'u olaga? Peitai na toe oo mai le uunaiga, ma sa ou mulimuli i ai.

Ina ua uma ona ou ofoina atu la'u fesoasoani, sa vave ona ou iloaina le fofo o le faafitauli. Sa vave le lipeaina. E lei umi ae toe leotele foi le taina o le laau taavale.

Na faaalia e le alii talavou lona agaga faafetai ma fesili mai pe i ai se mea e mafai ona ia faia mo au. Sa ou fai atu ia te ia e tatau ona ou alapo mo le galuega, ma pe mafai ona ia kiina i lalo lana musika i afiafi, ou te matua fiafia lava. Sa ataata o ia ma faamautinoa mai ia te au o le a ia faia lena mea.

E le gata i le kiina i lalo o lana laau i le po, ae na avea foi o ia ma au leo-leo faapitoa o laau taavale ma e na te faamautinoaina ua kiina foi i lalo e ana uo a latou laau taavale. Mai lena taimi, ma te lei toe mauaina lava se faafitauli i le leotele o musika pe a pogisa.

Na faafogofa moni mai lava le Tama faalelagi ma tali mai i lau tatalo. O Lana tali na tuuina mai ai le toofilemu ma le filemu, o se lesona taua e uiga i le mulimuli i le Agaga, ma se malamalama sili atu ona lelei o le uiga o le "ia alofa atu i e o fai outou mo latou fili" (Luka 6:27). ■

Kent A. Russell, Florida, ISA



TALOFA, TAMAI MAMOE

Sa ma fesoasoani atu ma lo'u toalua i le ma tama teine ma lana fanau tama e toalua i le malae vaalele, lea na latou sauniuni ai mo le latou malaga toe foi atu i le aiga. Na ma fesoasoani i le ma tama teine ao fealuai ma siaki ia atopau, sue tusifolau, ma vaaia se tamaitiiti ulavale e tolu tausaga. O Tommy, o le atalii a le ma tama teine, e tasi tausaga na moegapepe i totonu o lana taavale toso seja oo ina ua faafuasei ona ala i luga. Sa fefe o ia ao taumafai ia masani i le pisa, sesega o moli, ma le vevesi lautele.

Sa ou vaaia ona foliga ma iloa ai le mea o le a tupu, o lea sa ou valaau atu i lau tama teine. Sa vave ona ia punou i lalo, opo mai ona foliga i ona lima, pupula sao atu i ona mata, ma fai atu ma le agaalofa, "Talofa, tamai mamoe".

I se taimi vave lava na suia ai lona muaulu maanuminumi, gutu faauu, ma ua vaivai ona tauau ao maua e lona tino le toa. Na ia tuuina mai se ataata laiti a o le'i toe moeiini ona laumata. Sa suia lona fefe i se faamautinoaga toafimalie ma le filemu lea e foliga mai ua siomia ai o ia. O se faaaliga laitiiti ae mamana o le faatuatuaina e Tommy o lona tina. O lana pa'i mai masani, leo, ma le i ai iina na faamafanafana ai o ia.

Faapei o Tommy, na tatou lagolina uma le fefe, le le mautonu, ma le lofituina. E lagona le mafanafana i le iloa o Iesu Keriso, o le leoleo Mamoe Lelei, o loo valaau mai ia i tatou. Na te silafia Lana lafu, ma e mafai ona tatou faalagolago atoatoa ia te Ia. Na ia saunoa ma le alofa, "Ou te tuuina atu ia te outou le manuia, o lo'u manuia ou te avatu ai ia te outou. . . .

Aua le atuatuvalo o outou loto, aua foi tou te matatau" (Ioane 14:27).

Ou te iloa o le taimi o le le mautinoa e mafai ona tatou maua ai le mafanafana ma le faamautinoaga ao tatou liliu atu i le Leoleo Mamoe Lelei ma le faatuatua ma le faalagolago. Pe faamanuiaina au i le toofilemu i le ogatotonu o le vevesi, ou te fiafia e

tomanatu i lena taimi i le malae vaa-lele faatasi ai ma la'u tama teine ma lana tama tama. Faapei o Tommy, ou te manavaina se mapuea ao faamain-a a'u avega. I le aluga o na taimi, ou te lagona ai se faamalo patino "Talofa, tamai mamoe" mai lo'u Leoleo Mamoe. ■

Colleen Solomona, Ontario, Kanata

Sa fefe le tama tama
e tasi tausaga a le
ma tama teine ao ia
taumafai e faamasani i
le pisa, sesega o moli,
ma le vevesi lautele.



Tumau ma le Lelei

Saunia e Elder J. Christopher Lansing

Fitugafulu Eria, Eria a Amerika
Matu i Matusasae

O le ata o le faaolataga o se fuafuaga matagofie, ma o se vaega o lena fuafuaga e aofia ai le faatoilaloina o faafitauli lea o nisi taimi e faalavelave i o tatou ala ma taofia i tatou mai le faataunuina o tatou faamoemoega ma miti. Tatou te fetaiā uma ma faalavelave i le aluga o tatou taimi i le lalolagi. O nisi e laiti ao nisi e tele.

Atonu o se faafitauli laitiiti le uma o le penisini i luga o se auala pisi. O se faafitauli tele atonu o le maliu lea o se tasi e pele, o se faalavelave na pipili ai se tasi, po o se faalavelave faaleaiga. O nisi o faafitauli tatou te aumaia ia i tatou lava e ala i le le usiutai i tulafono a le Atua po o tagata. O nisi e le o se tatou mafuaaga e oo mai ai i o tatou luga. Ou te masalo o le toatele o i tatou ua oo i le mea e mafai ona faaupuina o ni “mea le lelei o loo tutupu” o le olaga. Soo se tasi na taalo i se taalogia lea e aofia ai se polo na te silafia mea uma e faatatau i le lelei o le fiti o le polo. O se vaega o le taalogia. E le taumateina le tele po o le fai faafia.

E le tatau ona tatou faamoe-moe i le Alii e aveese o tatou luitau ona ua tatou folafola atu ia te la o le a tatou faama-oni i taimi uma pe afai Na te faia. Nai lo lena, ia tatou tumau ma le lelei, ona faamanuiaina ai lea o i tatou.

O se tagata taalo lelei e na te silafiaina o fiti le lelei o se vaega o le olaga ma e taumafai ona faaauau pea ona ola ma le faatuatua ma le lototele. Ina ia tumau faamaoni i lo tatou naunau e toe nonofo faatasi ma le Tama Faalelagi, e tatau ona tatou sailia se auala e galulue ai e ala atu i faafitauli ma ia iloa le mea e sili ona taua i le olaga.

Tau Lava o le Aau Pea

Ao talavou le ma tama teine e toatasi, o Lindsay, ma te fiafia lava e matamata faatasi i ata tifaga. O se tasi o ata ma te fiafia i ai ma matamata faatasi i le tele o taimi o se ata tifaga ua ta'ua o le *Sailia o Nimo*. I le ata tifaga, na pueina Nimo e se tagata maulu ma faaiu ai i le tane e tuu ai i'a i le ofisa a se fomai nifo. Na naunau lava lona tama, o Marlin, e saili Nimo. Na fetau Marlin ma se i'a e igoa ia Dory i le aluga o lana malaga. Sa la feagai ma lea faafitauli ma lea faafitauli ao la taumafai e sue Nemo. Pe tele pe laititi le faafitauli, e tasi lava le savali a Dory ia Marlin: “Tau lava o le aau pea.”

AUTALAVOU MATUTUA



O ni nai tausaga mulimuli ane sa faamisiona ai Lindsay i Santiago, Chile. E faigata ia misiona. E tele faanoanoga. I vaiaso taitasi i le faaiuga o a'u imeli sa ou tusia ai, "Tau lava o le aau pea. Alofaaga, o Tama."

Ina ua maitaga Lindsay i lana tama lona lua, sa ia iloa ai o lana pepe e lei fanau mai e i ai se pu i lona fatu ma e le atoatoa le malosi o lona mafaufau [Down syndrome]. Ao ou tusi atu ia i te ia i lenei vaitaimi sili ona faigata, sa ou tapunia au imeli faapea, "Tau lava o le aau pea."

E oo mai faafitauli i o tatou olaga taitoatasi, ae ina ia mafai ona faatoiloina ma oo atu ai i le mea e te fia alu i ai, e tatau ona tatou aau pea.

O se tasi o fuaitau o mau ou te fiafia lava i ai o le vaega e 121 o le Mataupu Faavae ma Feagaiga. O se fuaitau matagofie lea e oo ai le Pero-feta o Iosefa Samita i le loloto o le faanoanoa ma ea ae ai i mea maualuluga faaselesitila. O lenei vaega ma vaega e 122 ma le 123 e sau mai se tusi na tusia e Iosefa i le Ekalesia. Ina ia malamalama atili i nei faaaliga maoae, e tatau ona tatou tuuina i le talaaga sao.

Na faapagotaiina ia Iosefa ma ni ona soa i le falepuipui i Lipereti, Misuri, mai ia Tesema 1838 seja oo ia Aperila 1839. Sa leai se ea mafanafana o le falepuipui, ma sa tau le mafai ona aiina meaai. Sa tuuina i latou i le potu i lalo o le fale ma le fola palapala ma le tauluga matua maualalo lava sa tau le mafai ona tu sao i luga. I lena lava taimi, na tutuliesea ai le Au Paia mai o latou fale. I le lotolotoi o lenei vevesiga, na tuuina mai ai e Kovana Lilburn W. Boggs lana faatonuga faaumatia.

Na aioi atu ai Iosefa, "Le Atua e, o fea o i ai oe? Ma o fea o i ai le faapologa ua ufi ai lou afioaga lafi?" (MF&F 121:1). O le Iosefa Samita lava lea e tasi lea sa oo mai i ai ni asiasiga faalelagi mai le Atua le Tama; Iesu Keriso; Moronae; Ioane le Papatiso; Peteru, Iakopo ma Ioane; ma isi. E lei leva ona tuuina atu ana fesili i fuaiupu muamua, ae faaalia loa e Iosefa lona le fiafia:

"Ia tuu atu lou toasa e faamumū e faasaga i o matou fili; ma, ia e tauimasi i matou i le toasa tele o lou finagalo ma lau pelu, mo sese ua faia ia te i matou.

"Ia manatua lau au paia mafatia, lo matou Atua e; ma o le a olioli ai au auauna i lou suafa e faavavau" (fuaiupu e 5–6).

Na tali mai le Alii i le faagaulemalie atu a Iosefa i le faapea mai, "Lo'u atalii e, ia filemu lou agaga; o lou tiga ma ou puapuaga o le a nao sina minute laitiiti" (fuaiupu e 7).

Ona la aoao mai lea ia Iosefa o se mataupu faavae matagofie: "Ma ona oo lea, afai e te talitalia lelei, o le a faaeaina oe e le Atua i luga; o le a e manumalo i ou fili uma" (fuaiupu e 8).

O le savali e tuusao ma pupuu. E le tatau ona tatou faamoemoe i le Alii e aveese o tatou luitau ona ua tatou folafola atu ia te Ia o le a tatou faamaoni i taimi uma pe afai Na te faia. Nai lo lena, ia tatou tumau ma le lelei, ona faamanuiaina ai lea o i tatou. O se lesona matagofie lena o le olaga mo i tatou taitoatasi.

E tele isi aoaoga o loo tuuina mai i le fuaiupu e 10, lea na ta'u mai ai e le Alii ia Iosefa, "E lei avea lava oe e pei o Iopu; e le o finau au uo faasaga mai ia te oe, pe tuuai oe i se solitulafono,

e pei ona latou faia ia Iopu." E ui lava i le tele o mea na puapuagatia ai Iopu, tatou te aoao, "Na afio ifo le Atalii o le Tagata i lalo o i latou uma. Ua sili atu ea oe ia te ia?" (MF&F 122:8).

Vaega 122 e faaatoatoaina le vaega e 121. Ou te faaigoaina o le vaega *afai*. O le upu *afai* e faa 15 ona faaalia mai. Mo se faataitaiga, fai mai le fuaiupu e lima, "*Afai* e valaaulia oe e te ala atu i puapuaga; *afai* e faalave-lavea oe i totolu o uso pepelo; *afai* e faalavelavea oe i le lauelele po o le sami" (MF&F 122:5; faaopoopo le faamamafa).

Afai tatou te suaia na luitau mo luitau o loo feagai ma i tatou i le lalolagi i nei ona po, atonu e mafai ona tatou aoaoina se mea, e pei o le *afai* o i ai se maliu i lo'u aiga po o le *afai* na tiai au e la'u uo tama po o le uo teine po o le *afai* e i ai ni au avega tautupe po o le *afai* e sili atu lou atamai.

Ina ua mavae na *afai*, ua fetalai mai le Alii, "Ia e iloa, lo'u atalii e [po o le afafinel], o nei mea uma e te maua ai le poto masani, ma o le a avea mo ou lelei" (fuaiupu e 7). I se isi faaupuga, o luitau o tatou mauaina i le olaga e matua aoga lava ma e taua foi.

"O lea, le au uso pele e, ia tatou faia ai ma le fiafia mea uma ua i ai i lo tatou mana; ona mafai lea ona tatou tutu, ma le mautinoa atoatoa, e vaai i le faaolataga a le Atua, ma mo lona aao e faaali mai" (MFF 123:17).

Ua tumu le olaga i faafitauli, o nisi e foliga mai ua matua faigata lava. E tatau ona tatou onosaiina ma le fiafia ma le faamaoni. O le faia faapea, o le a iu ina tatou toe foi atu ai ma nonofa faatasi ma le Atua i le faavavau.

O Le Faataitaiga a le Faaola

O le faataitaiga silisili ua tatou maua e faatatau i le tumau ai, o le soifuaga lea o le Faaola. E manaomia e le Togiola Lona afio ifo i lalo o mea uma, ma ofoina atu Lona soifuaga atoatoa mo i tatou. O le afio ifo i lalo o mea uma, na Ia puapuagatia ai mo faafitauli ma agasala uma o le olaga, "o le mafatia lea na oo ai ia te au lava, o le Atua lava lea, o le ua silisili i tagata uma, le gatete ona o le tiga, ma tafe toto ai i pu afu uma, ma mafatia ai i le tino atoa ma le agaga" (MF&F 19:18).

Sa silafia e Iesu mea na manaomia mai ia te Ia, ma sa Ia fetalai mai i se ala sili faaletagata, "Lo'u Tama e, afai e mafai, ia ave ese lenei ipu ia te au; a e aua le faia lo'u loto, a o lou finagalo" (Mataio 26:39). Ae ui i lea, sa Ia nau-nau e faia le finagalo o Lona Tama ma onosai i mea uma.

O Le Mea e Avea ai i Tatou e Faia ai le Eseesega

O lau pisinisi o i ai nei na faavae-inia e lou tama i le toeitiiti atoa le 60 tausaga talu ai. Sa maliu o ia i le 1980, ae tuua au e faafoeina le kamupani i le 30 o ou tausaga.

I na tausaga popofou, na tulai ane ai ni tulaga lea na manaomia ai au e faia ni faaiuga e aafia ai le lumanai o la matou pisinisi vaivai. Sa ou galue malosi e galue e pei o lou tama, ma sa ou faaaluina se taimi tele i ou tulivae, e taumafai ai ina ia iloatino le mea e fai. I na filifliga uma, ou te le'i lagonaina se uunaiga o le toafilemu po o soo se itu o se auala se tasi po o se isi. Na iu lava ina ou faia se mea sa ou manatu sa sili ona lelei ma agai i luma. Ae sa ou le fiafia e lei mafai ona ou mauaina se faamautinoaga o au faatinoga.

I se tasi po na oo mai ai lo'u tama ia te au i se miti. Sa amata ona ou

faitio ia te ia mo le le fesoasoani mai ia te au ina ia iloa le mea e fai. Sa fai mai o ia sa ia nofounta i lo'u tulaga ae sa pisi i le mea sa i ai ma e lei taua tele lana pisinisi lea sa i ai muamua. "Chris, matou te le popole tele i le pisinisi iiinei," o lana tala lea. "O le mea matou te matuai popole ai lava o le mea e avea ai oe ona o lau pisinisi."

O se lesona maoae lea ou te faamoemoe o le a le galava ia te au. O le mea tatou te mauaina i le faagasologa o tatou olaga e le taua, ae o le mea o le a avea ai i tatou i le olaga e matua tele lava se eseesega.

O nisi taimi e galva ai ia i tatou o le muai olaga na tatou tau ai faatasi ma le Faaola i le puipuiga o le fuafuaga o le faitalia tatau a le Tama. Ma sa tatou manumalo ai! Na tutuli ese Lusifelo ma ana au, ma tatou maua le avanoa e iloa ai le ola o tatou tauivi i ai. O le fuafuaga a le Tama o loo aofia ai le Togiola. O la tatou galuega o le fetaiai ai ma o tatou luitau ma onosaia lelei. A o tatou faia lenei mea, o le a i ai le uiga o le Togiola i o tatou olaga ma tatou faataunuina le galuega ma le mamalu a le Alii ma le mamalu: "ia aumaia le tino ola pea ma le ola faavavau o le tagata" (Mose 1:39).

Ou te molimau atu o Iesu o le Keriso. O Ia o le Faaola o le lalolagi. O Ia o le Alii o le Filemu ma lo tatou Puluvaga i le Tama. Ou te molimau atu e silafia e le Tama i tatou i o tatou igoa, alofa ia i tatou e ui lava i o tatou le atoatoa, ma o le a saunia se nofoaga mo i tatou pe afai tatou te faamoni ma tumau e oo i le iuga. ■

Ina ia tumau faamaoni i o tatou manaoga e toe nonofo faatasi ma le Tama Faalelagi, e tatau ona tatou saili se auala e galuue ai e ala i faafitauli ma iloa le mea e sili ona taua i le olaga.

Mai se lauga, "That's Life," o le faigalotu na tuuina atu i le BYU-Hawaii i le aso 30 o Oketopa, 2012. Mo le tusiga atoa i le gagana Peretania, asiasi i le devotional.byuh.edu/archive.






Saunia e Peresitene
Henry B. Eyring
Fesoasoani Muamua
i le Au Peresitene Sili

SAUNIAINA O *Meaalofa* MO LOU AIGA I LE LUMANAI

O le tausaga lenei, ia
amata ona atiina ae ni
meaalofa—meaalofa
maoae—mo lou aiga
i le lumanai.



Emasani lava ona ou moemiti i le avea ai ma se tagata foai o meaalofa sili. Ou te vaai faalemafaufau i tagata o tatalaina a'u meaalofa ma faaali atu ma loimata o le olioli ma se ataata faapea o le foai atu, ae le na o le meaalofa, ua ootia ai o latou loto. Atonu sa e mauaina foi se miti faapena. Masalo o le toatele o outou ua avea ma ni tagata tomai faapitoa i le tuuina atu o ni meaalofa.

O loo i ai se mea e mafai ona e faia i le tausaga lenei e amata ai ona avea oe lava ia ma se tagata sili i le tuuina atu o ni meaalofa. O le mea moni, i le avea ai ma tagata aoga, e i ai ni ou avanoa faapitoa. E mafai ona e amata i le tuu o nisi meaalofa—meaalofa maoae—e totogi auauai mo lou aiga i le lumanai. Sei ou faamatala atu ia te oe e uiga ia i latou.

Pepa Tusitusi mo le Aoga

E mafai ona e amata i lou potu i le taimi nei. O i ai se pepa aoga e lei uma i se mea i le faaputuga? (Ou te manatu o loo i ai ia faaputuga iina; ou te matea ou te iloa lou potu.) Atonu sa taina ma foliga mai ua saunia e tuuina atu i totonu. Aisea e popole atili i ai? Sa ou aoaoina le mafuaaga i le taimi o se vasega o mataupu faalelotu sa ou aoaoina i se tasi o taimi i le Kolisi o Ricks (ua avea nei ma Iunivesite o Polika Iaga-idaho) Sa ou aoao mai le vaega e 25 o le Mataupu Faavae ma Feagaiga. I lena vaega o loo faatonuina ai Ema Samita ina ia tuuina atu lona taimi e “tusitusi, ma le aoao tele” (fuaiupu e 8). Pe tusa o le tolu o laina nofoa i tua sa nofo ai se teineitiiti lanu enaena lona lauulu e manuminumi lona muaulu pe a ou uunaia le vasega

ina ia filiga i le atiaeina o tomai tutsi. Sa ia siiina i luga lona lima ma fai mai, “E le foliga talafeagai lena mea ia te au. E pau lava mea ou te tusiaina o ni tusi i lau fanau.” O lena mea na mafua ai le talieega i totonu o le vasega. Na o le tilotilo atu ia te ia na mafai ai ona ou vaai faalemafaufau i le toatele o tamaiti o siomaiaina o ia, ma sa ou iloa foi ia tusi sa ia tusiaina. Atonu o le mamana o le tusitusi sa le afaina ia te ia.

Ona tu lea i luga o se alii talavou e latalata i le pito i tua. E le tautala sooi le afa tausaga; ou te le mautinoa lava pe sa i ai se taimi na ia tautala ai. Sa matua atu o ia nai lo isi tamaiti aoga, ma sa matamuli o ia. Sa ia fesili mai pe mafai ona ia tautala. Sa ia ta'u mai i se leo lemu i le avea ma se fitafita i Viatename. I se tasi aso, i le mea na ia manatu o le a avea ma se mea filemu, sa tuua ai lana fana ma savali atu i le isi itu o le latou lotoa ua tuiolo i le valaauga o le meli. I le taimi lava na maua ai le tusi i lona lima, sa ia faalogoinga ai le iliina o le pu ma le alalaga ma le papa o fana o agai mai mai le fili ia na i luma atu. Sa ia toe taumafai atu i le mea o i ai lana fana, e faaagoinga ona lima e avea o ni auupega. Faatasi ma alii o e na sao mai, sa

ia aveina atu i fafo le fili. Ona latou nonofo lea i lalo ma i latou na feola, faatasi ai ma nisi o e ua maliliu, ma tatala lana tusi. Sa aumai mai lona tina. Sa ia tusia faapea sa i ai sona aafiaga faaleagaga na faamautinoa atu ai ia te ia o le a ia ola e toe foi mai i le fale pe afai e amiontonu o ia. Na fai atu lemu le tamaitiiti i la'u vasega, “Sa avea lena tusi ma tusitusiga paia ia te au. Sa ou teuina”. Ma sa ia nofo i lalo.

Atonu o le a e maua se tamaitiiti i se aso, masalo o se atalii. E mafai ona e vaai i ona foliga? E mafai ona e vaai ia te ia i se mea, i se taimi, i se tulaga matautia o le olaga nei? E mafai ona e lagonaina le fefe i lona loto? Na pai atu ia te oe? Mata e te manao e foai atu saoloto? O a taulaga o le a oo mai e tusia ai se tusi o le a manao lou loto e auina atu? Amata le faataitaiga i lenei aoauli. Toe foi atu i lou potu ma tusi ma faitau ma toe tusi pea lava peia i lena pepa. O le a le foliga mai o se ositaulaga pe a outou vaai faalemafaufau i lena tamaitiiti, lagonaina o lona loto, ma mafau i tusi o le a ia manaomia i se aso.

Foainoa Faafitauli o Matematika

Atonu o nisi o outou o le a leai se pepa o loo faatalitali mai mo oe.





Atonu e avea o se tusi aoga ma se faafitalui o le matematika e natia mai ai. Sei ou faamatala atu ia te oe e uiga i se aso i lou lumanai. O le a maua se atalii talavou po o se afafine o le a faapea mai, "Ou te inoino i le aoga." Pe a mavae ni faalogologo faaeteete, o le a iloa ai e le o le aoga po o matematika e le fafia i ai o ia—ae o le lagona o le toilalo.

O le a sa'o ona e iloa o na lagona, ma o le a e ootia; o le a e manao e foai saoloto atu. O lea o le a tatalaina le anotusi ma faapea mai, "Sei o tatou vaai faatasi i se tasi o faafitalui." Mafaufau i le tei o le a e lagonaina pe a e vaaia lena lava vaaalo e tasi o loo agai atu pea i le mulivai i le lua itula ma toe foi mai i le lima itula, ma o fesili o i ai lava pe o le a le saoasaoa o le tafe ma po o le a foi le mamao na malaga ai le vaa. Atonu e te manatu, "Ia, o le a ou tuuina atu se lagona lelei i lau fanau i le faaali atu ia i latou e le mafai foi ona ou faia le matematika. Sei ou tuuina atu ia te outou ni fautuaga: o le a latou vaaia lena mea o se meaalofa le lelei.

O loo i ai se meaalofa e sili atu ona lelei, ae o le a manaomia ai se taumafaiga i le taimi nei. O lo'u tama, a o tamaititi o ia, masalo sa ia foiaina le faafitalui o le vaaalo ma le tele o isi

mea. O se vaega lena o le meafaigaluga na manaomia e ia e avea ai ma se saienisi lea o le a faia ai se eseesege i le kemisi. Ae na ia faia foi se eseesege ia te au. O lo matou potu malolo sa lei manaia lona foliga e pei o nisi. Na tasi le ituaiga o meaafale—nofoa—ma se mea teuteu o le puipui e tasi—se laupapa lanumeamata. Sa ou oo i le tausaga o le a oo i ai lau tama tama po o lau tama teine. Ou te lei fia iloa pe mafai ona ou galueaina le faafitalui o le matematika; sa ou faamaonia i lou tulaga faamalieina e le mafai ona ou faia. Ma o nisi o o'u faiaoga sa faamalieina faapea ua moni foi.

Ae sa lei faamalieina Tama. Sa ia manatu e mafai ona ou faia ai. O lea sa ma auauai ai i lena laupapa. E le mafai ona ou manatuaina le meaalofa na afifiina e lo'u tama ma tuuina mai ia te au. Ae ou te manatua le laupapa ma lona leo filemu. O ana aoaoga na sili atu nai lo le naunau e tuuina atu lona taimi i lena taimi, po o le a lava le taua sa i ai. Na alu ai se taimi lea sa ia faaaluina muamua atu ina ua ia maua ni avanoa lea ua outou maua i le taimi nei. Talu ai ona sa ia faaaluina le taimi i lena taimi, ua mafai ona ma maua lena taimi i le laupapa ma ua

mafai ona ia fesoasoani ia te au.

Ma talu ai sa ia tuuina mai lena mea ia te au, o loo ia te au se tamaititi ma te saofafai faatasi i lalo i le tasi le tausaga. Ma te aloina faatasi lena vaa i luga ma lalo. Ma sa tusia e lona faiaoga le "matua faaleleia" i luga o lana kata o le lipoti. Ae ou te fia tau atu le mea ua sili atu ona faaleleia: o lagona o se tama lelei e uiga ia te ia lava. E leai se mea o le a ou tuu i lalo o se laau Kerisimasi mo Stuart e afa le avanoa o le avea ai ma se oa taua faaleaiga nai lo lona faamaualuga o le ausiaina.

Aoaoina o Ata ma Musika

Masalo o loo i ai ni ata (po o ni musika?) tamaiti aoga o ataata. O latou mafaufau faapea, "Ia e mautinoa lava e le mafai ona faatalitonuina au o loo i ai se meaalofa o loo natia i *lo'u* tofiga e le o maea." Ia tuu mai ia te au e taumafai. O le vaisaso ua tea, na ou alu ai i se mea na tupu o le faamamaluina o se alii talavou. Sa i ai se ata faasolosolo. Sa tape moli, ma sa ou iloaina ni leo se lua. O se tasi o se tamaitai pese lauiloa i le pito i tua, ma le isi, o le tagata faamatala, o le tama o le alii talavou.

Masalo na faaaluina e lona tama le tele o itula i le sauniaina o ata faasolo, tuisiaina o ni upu lea na faateleina, ona faamaoopoopoina lea o le musika ma upu ia sao le leo ma le taimi. O le a i ai sau tamaititi i se aso o le a faamamaluina i sea tulaga, ao vaavaai atu ona tau-soga ma fafine ma tamaloloa o le latou aiga. Ma faatasi ai ma lou loto atoa, o

le a e manao e ta'u atu ia te ia po o ai o ia ma le mea e mafai ona avea ai o ia. Pe e mafai ona e tuuina atu lena meaalofa i lena taimi e faalagolago lea pe e te lagona lona loto i le taimi nei ma ua ootia ma amata fausia ai tomai fatufatuai o le a e manaomiaina. Ma o le a sili atu lona taua nai lo lou moemiti i ai i le taimi nei, ou te folafola atu.

Salamo Nei

O loo i ai lava se isi meaalofa atonu o nisi o outou o manao e tuuina atu lea e manaomia ai le amata tuuina atu vave. Sa ou vaaia ai i le amataina i se tasi taimi ao avea au ma epikopo. Sa saofai se alii talavou e faasaga mai i la'u kesi. Sa ia talanoa mai e uiga i mea sese na ia faia. Ma sa ia talanoa mai e uiga i ona manaoga i ni tamaiti na te ono maua i se aso ina ia i ai se tama e mafai ona faaaoga lona perisitua ma mafai ona latou faamau i ai e faavavau. Sa ia fai mai ua ia iloa le tau ma le tiga o le salamo lea atonu e

tele. Ona ia fai mai lea o se mea o le a le gallo lava ia te au: "Epikopo, ua ou toe foi mai. O le a ou faia soo se mea e manaomia. Ua ou toe foi mai." Sa ia lagona le faanoanoa. Ma sa ia faatutua ia Keriso. Ma sa faaluina ai pea le tele o masina o taumafaiga tiga.

Ma o lea o loo i ai i se mea se aiga o loo avea ma ulu se tasi o umia ma le amiontonu le perisitua. Latou te maua le faamoemoega e faavavau ma le filemu i le lalolagi. Atonu o le a ia tuuina atu i lona aiga le tele o ituiga o meaalofa ua afifiina feilafi, ae e leai se mea o na mea o le a sili ona taua nai lo le mea e tasi lea sa na amataina i se taimi ua leva ona tea i totonu o lou ofisa ma e lei muta lava le tuuina atu. Sa ia lagonaina i lena taimi ia manaoga o tamaiti ia na moemiti i ai, ma sa ia tuuina vave atu ma le saoloto. Sa ia ositaulagaina lona faamauluga ma le paie ma lagona. Ou te mautinoa e le o toe foliga mai o se ositaulaga i le taimi nei.



Ua mafai ona ia tuuina atu lena meaalofa ona o se isi meaalofa lea na ia tuuina mai i se aso ua leva. Na tuuina mai e le Tama Lona Alo, ae na tuuina mai ia i tatou e Iesu Keriso le Togiola, o le meaalofa silisili lea o meaalofa uma ma foai uma. Na lagona e le Faaola i se isi itu le tiga ma faanoanoaga uma o le agasala lea o le a pau i luga o i tatou uma ma soo se tasi o le a ola ae (tagai i le Eperu 4:14–16).


Ou te molimau atu na foai atu saoloto ma le naunautai e Iesu le meaalofa, mo i tatou uma. Ma ou te tuuina atu se molimau faapea pe afai tou te taliaina lena meaalofa, lea na tuuina mai e ala i le taulaga le mafuatia, e aumaia le olioli i lē foai (tagai i le Luka 15:7).

"Ua maua fua e outou, ia outou foafuaina atu" (Mataio 10:8). Ou te tatalo o le a tatou foai saoloto. Ou te tatalo o le a tatou ootia i lagona o isi, o le a tatou foai atu e aunoa ma ni lagona o le faamalosia po o le faamoemoega o le manuia, ma o le a tatou iloa o lena taulaga o le a suamalie ia i tatou pe a tatou faatauaina le olioli e aumai i loto o isi. ■

Mai se lauga o se faigalotu, "Gifts of Love", na tuuina atu i le Iunivesite o Polika Iaga i le aso 16 o Tesema, 1980. Mo le tusiga atoa i le gagana Peretania, asiasi i le speeches.byu.edu.



AUTU O LE MUTUALE 2014



“O mai ia Keriso, ma faatoatoaina ia te ia, ma faafiti outou lava mai mea uma e le faaleatua” (Moronae 10:32).



Au Peresitene Aoao o Alii Talavou

O MAI IA KERISO

Saunia e le Au Peresitene
Aoao o Alii Talavou

Alii talavou o le Perisitua Arona, o la statou autu o le Mutuale i lenei tau-saga e musuia ai oe e mafaufau e uiga i la oulua sootaga ma Iesu Keriso, lo tatou Faaola ma le Togiola, ma auala e mafai ona avea ai faapei o Ia. O le tatou autu o le “O mai ia Keriso, ma faatoatoaina ia te ia, ma faafiti outou lava mai mea uma e le faaleatua” (Moronae 10:32).

O se valaaulia paia lenei e faalatalata atili atu ai i le Alo o le Atua. Ona o Lana Togiola, e mafai ona tatou maua le mana e auauna atu ai, e faafiti i tatou lava mai mea e lē faaleatua i o tatou olaga, ma ia lagona Lona alofa e le iu. A o tatou faia faapea, o le a tatou maua le filemu moni ma le fiafia.

A o e galue i le valaaulia e o mai ia Keriso, o le a oo ina ia e malamalamā i lou tiute paia o le “valaaau atu i tagata uma ia o mai ia Keriso” (MF&F 20:59). O le a faatumuina o outou loto ma se naunautaiga e taitai ai isi ia te Ia ina ia latou maua le faamanuiaga lava e tasi na e mauaina ma faauau pea ona maua.

Sa faataunuina e se tasi alii talavou, o Mikaele, lenei tiute e ala i le fesoasoani atu ia Jose, o se uo mai le aoga.

I se tasi aso, na fesili atu ai Jose ia te ia, “Mikaele, aisea e te fiafia ai lava oe i taimi uma?”

Na fai mai Mikaele, “Ona o loo ou auauna atu ai.”

“Aisea e te auauna atu ai?”

“Ona o loo ou umia le perisitua ma o lo’u tiute lea,” na tali atu ai.



Au Peresitene Aoao o Tamaitai Talavou

Na fai mai Jose, "Ou te fia iloa atili e uiga i le perisitua."

Sa valaaulia e Mikaele Jose i gaoi-oiga a le Ekalesia ma mulimuli ane i sauniga a le Ekalesia. Na iu lava ina aoaoina Jose ma lona aiga e faifeau-talai ma na papatisoina ai. Na fai mai Jose, "O le galuega faafaifeautalai o le faavae lea o la tatou Ekalesia. Afai tatou te faamaoni ma amiontonu i a tatou fegalegaleaiga i aso taitasi, o le a matauina e i latou o siomiaina i tatou ma o le a latou fesiliglia i tatou e pei ona ou faia. O Mikaele o se ipu i le fuafuaga sili a le Atua."

"O upu 'o mai ia Keriso' o se valaaulia. O le valaaulia sili ona taua e mafai ona e ofoina atu i se isi tagata. O le valaaulia sili ona taua e mafai ona talia e soo se tasi."¹

—Peresitene Henry B. Eyring, Fesoasoani Muamua i le Au Peresitene Sili

Ao e faalatalata atili atu i le Alii, o le a e maua se manao e auauna atu i isi e pei ona faia e Mikaele. Ma ao outou faia, o le a e iloaina le moni o lenei folafolaga mai Peresitene Henry B. Eyring, Fesoasoani Muamua i le Au Peresitene Sili: "A tuuina atu lou loto e valaaulia tagata e o mai ia Keriso, o le a suia lou loto. O le a e faia Lana galuega mo Ia. O le a e iloaina ai o loo tau-sia pea e Ia lana folafolaga e i ai faatasi ma oe i lau auaunaga. O le a e iloaina ai o Ia. Ma i se taimi o le a avea oe e pei o Ia ma 'faaatoatoaina outou e Ia.'"²

O le fatu lena o le autu o le tausaga lenei. ■

FAAMATALAGA

1. Henry B. Eyring, "O Mai ia Keriso," *Liahona*, Mat. 2008, 49.
2. Henry B. Eyring, "O Mai ia Keriso," *Liahona*, Mat. 2008, 52.

UA VALAAULIA OUTOU

Saunia e le Au Peresitene Aoao o Tamaitai Talavou

Oai e le fiafia e mauaina se tusi valaaulia? A tatou mauaina se tusi valaaulia e auai atu ai i se pati o le aso fanau po o se taumafataga o le faaipoipoga, tatou te lagona le fiafia i le mafai ona faamanatu faatasi ma isi ia mea taua na tutupu i o latou olaga. O le autu o le Mutual mo le 2014 o loo aofia ai foi se valaaulia fiafia o le taua faavavau: "O mai ia Keriso, ma faaatoatoaina ia te ia, ma faafiti outou lava mai mea uma e le faaleatua" (Moronae 10:32).

O le tele o valaaulia e manaomia ai se tali—se faailoa atu—e faailoa atu ai pe tatou te talia pe leai le valaaulia. Na e tali atu i lenei valaaulia i lou olaga? O le o mai ia Keriso o lona uiga o loo tatou tau-sia feagaiga paia na tatou osia i le papatisoga. O lona uiga ua tatou talia Iesu Keriso o lo tatou Faaola ma le Togiola patino. O lona uiga ua tatou iloa ma talitonu i le mea na aoao atu ai e Alema lona atalii o Sepulona: "Ua leai se isi lava ala po o ni auala e mafai ona faaolaina ai o le tagata, ua nao ia, ma ala mai ia Keriso" (Alema 38: 9). O le taliaina o lenei valaaulia o lona uiga ua tatou tautino atu e mulimuli i le faataitaiga atoatoa o Keriso e ala i le ola ai i olaga mama ma faapaina, ma e ala i le alofa ma le auauna atu i isi.

O lenei valaaulia e le o se mea na tupu i se taimi e tasi; o se faagasologa. Ua valaauliaina i tatou e mulimuli i se ala lea o le a taitai atu ai i tatou i le malumalu, i le mea tatou te osia ai isi feagaiga ma lo tatou Tama oi le Lagi

ma auai i sauniga taua mo lo tatou faaeaga. O lenei ala e mafai ona aofia ai le auauna atu i se misiona. O le a aofia ai le faaipoipoga i le malumalu ma avea ma alii ma tamaitai amiontonu i le malo o le Atua. O lona uiga foi o le tumau e oo i le iuga. E pei ona taua i le valaaulia, pe a tatou o mai ia Keriso, e mafai ona faaatoatoaina i tatou ia te Ia. O Keriso ua mafai ai ona tumau i lenei ala o le feagaiga e ala i le faatuatua ia te Ia, ma e ala i le salamo. O lenei faagasologa o le faaatoatoaina e mafai ona amataina i le aso; o le Togiola a Keriso ua mafai ai.

O lenei valaaulia ua talosagaina ai i tatou e faafitia i tatou lava i mea uma e le faaleatua—ia ese mai i tifiga, tulaga faatonuina, ma faataitaiga a le lalolagi. Ua valaauliaina i tatou e "tuu ese mea o lenei lalolagi, ma saili mo mea . . . sili atu ona lelei" (MF&F 25:10). Matou te molimau atu o le taliaina o le valaaulia e "o mai ia Keriso ma faaatoatoaina" o le a taitai atu ai i le fiafia i lenei olaga ma le ola e faavavau i le lalolagi a sau. Ua valaaulia outou e tali atu i le taimi nei! ■

Moronae 10:32

O le autu o le Mutuale o lenei tausaga o se valaaulia mai ia Moronae e mulimuli i le Faaola.



Ina ia Faaatoatoaina ia te la

“E le tatau ona tatou lotovaivai pe afai ua foliga mai ua matua faigata ma le maea a tatou taumafaiga faamaoni agai atu i le atoatoaga. O le atoatoa o loo faatalitali i ai. E oo mai lona atoatoa pe a maea le Toetu ma e na o le Alii lava e ala ai. O loo faatalitali mo i latou uma lava o e alofa ia te ia ma tausia ana poloaiga.”

Elder Russell M. Nelson o le Korama a Apostolo e Toasefululu, “Atoatoaga O Lo o Faatalitali,” *Liahona*, Ian. 1996, 105.

Alofa i le Atua

E faapefea ona e faaali atu i le Tama Faalelagi e te alofa ia te Ia? Mafaufau i manatu nei ma mafaufau nisi ou lava manatu. I lau api o talaaga, tusi ai e uiga i le mea o le a e faia.

- Tausi poloaiga.
- Alofa ma auauna atu i isi.
- Faataunu ia tiutetauave faale-ekalesia.
- Tatalo ma le faamaoni.

Leai se ala

Leai se ala—E leai se ala pe leai se mea.

O Mai ia Keriso

O loo i ai i tusitusiga paia le tele o valaaulia e o mai ia Keriso. Sue ia nai faataitaiga o loo lisiina i lalo. O le a le mea ua aoaoina ai oe e nei mau e uiga i faamanuiaga o le o mai i le Faaola? E mafai ona e mauaina nisi mau i lenei valaaulia?

- Omina 1:26
- Alema 5:34–35
- 3 Nifae 12:19–20
- Mataio 11: 28–30
- Ioane 6:35

32 Ioe, “o mai ia Keriso, ma ‘faaatoatoaina ia te ia, ma faafiti outou lava mai mea uma e le faaleatua; ma afai tou te faafiti outou lava mai mea e le faaleatua uma, ma ‘alolofa i le Atua ma o outou/manatu atoa, mafaufau, ma le malosi atoa, ona lava lea o lona alofa tunoa mo outou, ma o lona alofa tunoa e mafai ai ona outou atoatoa ia Keriso; ma afai tou te atoatoa ia Keriso e ala i le ‘alofa tunoa o le Atua, e leai se ala e mafai ai ona outou faafitia le mana o le Atua.”

Alofa tunoa

“O le upu *alofa tunoa*, e pei ona faaaogaina i tusitusiga paia, o lona uiga “atoa, atoatoa, ua faatupuina le atoatoa; amiotonu atoatoa. E mafai foi ona faatatau le atoatoa i le aunoa ma se agasala po o se leaga. E nao Keriso lava na atoatoa ona lelei. O soo moni o Keriso e mafai ona faaatoatoaina e ala i lona alofa tunoa ma lana togiola” (Taiala i Tusitusiga Paia, “Atoatoa,” scriptures.lds.org).



Ua Lava Lona Alofa Tunoa mo Outou

“O nisi Kerisiano ua latou tuuaia le Au Paia o Aso e Gata Ai. . . ua faafitia le alofa tunoa o le Atua


e ala i le tautino atu e mafai ona latou sailia lo latou lava faaolataga. Tatou te tali atu i lenei tuuaiga . . . , ‘Ona ua matou galulue maelega. . . e faatauanau atu ai ia matou fanau. . . ia talitonu ia Keriso, ma ia faalelei ma i le Atua; ona ua matou iloa e faaolaina i tatou i le alofa tunoa, pe a uma mea uma e mafai ona tatou faia’ (2 Ni. 25:23). Ma o le a le uiga ‘o mea uma tatou te mafai?’ E mautinoa lava e aofia ai le salamo (tagai i le Alema 24:11) ma le papatisoga, tausia o poloaiga, ma le tumau e oo i le iuga.”

Elder Dallin H. Oaks o le Korama a Apostolo e Toasefululu, “Pe ua Faaolaina Oe?” *Liahona*, lulai 1998, 70.

Faaatoatoa ia Keriso

→ *Atoatoa*, e pei ona faaaogaina i tusitusiga paia, o lona uiga “atoa, atoatoa, ua faatupuina le atoatoa; amiotonu atoatoa. E mafai foi ona faatatau le atoatoa i le aunoa ma se agasala po o se leaga. E nao Keriso lava na atoatoa ona lelei. O soo moni o Keriso e mafai ona faaatoatoaina e ala i lona alofa tunoa ma lana togiola” (Taiala i Tusitusiga Paia, “Atoatoa,” scriptures.lds.org).

O MAI IA KERISO



“O mai ia Keriso, ma faaatoatoaina
ia te ia, ma faafiti outou lava mai
mea uma e le faaleatua”

(Moronae 10:32).



E MAFAI FAAPEFEA E LE ILOAINA O LE AIGA ATUA ONA SUIA AU?

O mataupu faavae e lima e uiga i le Aiga Atua e mafai ona faia ai se eseesega i le ala o e ola ai.

Saunia e Lori Fuller

Mekasini a le Ekalesia

Na aoao mai Iosefa Samita: “O le mataupu muamua lava o le talalelei, o le iloa lea ma le mautinoa o le uiga o le Atua.”¹ O mea ua tatou iloa e uiga i le Aiga Atua e mafai ona suia ai le ala tatou te ola ai, e le gata i mea tetele ae faapea foi i nai mea iti, i aso uma. Mafaufau pe faapefea ona aafia e lou malamalama i le Aiga Atua lou olaga ao e faitau e uiga i nei mataupu faavae e lima.

E alolofa le Aiga Atua ia i tatou ma mananao i le mea sili mo i tatou.

O tagata o le Aiga Atua e faavau ma pule aoao, ae Latou te popole pea ina ia tatou maua le fafia ma le sologa lelei. Na molimau mai Peresitene Gordon B. Hinckley (1910–2008): “E fafia i Latou ia i tatou, ma o i tatou o le autu o lo Latou popolega tele. O loo avanoa uma i Latou mo i tatou taitoatas. Tatou te o atu i le Tama e ala atu i le Alo. O ia o lo tatou fautua i le nofoalii o le Atua. E maeu le ofoofogia o le mafai ona tatou talanoa atu i le Tama e ala atu i le suafa o le Alo.”²

Talu ai o sui o le Aiga Atua e alolofa ia i tatou ma e mananao i le mea sili mo i tatou, e taua a tatou filifiliga, ae maise lava mea iti tatou te faia i aso taitasi e aumai ai i tatou e latalata atili atu ai ia i Latou. E leai se tapulaa o lo tatou tulaga gafatia, ma e popole le Atua e uiga i lo tatou manuia, e oo lava i mea laiti.

Na tuuina mai e le Tama Faalelagi ia i tatou mea uma.

Ua tatou iloa ua tuuina mai e le Tama Faalelagi mea uma ia i tatou, o lea e tatau ai ona tatou iloa Lona aao ma ia loto faafetai. Pe a tatou loto faafetai, e ese a tatou amioga. Na folafola mai e Peresitene Thomas S. Monson faapea “e mafai ona tatou faaleleia i tatou lava, faapea foi ma isi, pe a tatou mumusue e tumau ai i le lalolagi o mafaufauga le lelei ma atiina ae ai i

o tatou lava loto se uiga faaalia o le lotofaafetai.”³

Talu ai o mea uma ua ia i tatou e sau mai le Atua (tagai i le Mosaea 2:20–21; MF&F 59:21), o lo tatou agaga faafetai e mafai ona faia i tatou ia sili atu ona naunau e faasoatatu i isi. E aofia ai i lenei mea lo tatou taimi ma taleni faapea ma o tatou faamanuiaga faaletino.

E alofa mutimutivale le Tama Faalelagi.

O le galuega ma le mamalu o le Atua o le “aumaia [o] le tino ola pea ma le ola faavavaau o le tagata” (Mose 1:39). Na te finagalo i lo tatou manuia, o lea na la ofoina mai ai ia i tatou le faamagaloga mo mea sese ua tatou faia. O Lona alofa mutimutivale ua saunia ai le faamagaloga pe a tatou toe faia na lava mea sese e tasi. O le Tama faalelagi, Iesu Keriso, ma le Agaga Paia o le a fesoasoani ia i tatou e sui.

O le alofa mutimutivale o le Atua o loo aoao mai i tatou ina ia loto faamagalo. Na saunoa mai Peresitene Dieter F. Uchtdorf, Fesoasoani Lua i le Au Peresitene Sili, “Talu ai e alofa tele le Atua ia i tatou, o lea e ao ai foi ona tatou alolofa atu ma faamagalo atu le tasi i le isi.”⁴ E aofia ai i lenei mea le faamagaloia o i tatou lava.

Na puapuagatia lesu Keriso mo i tatou.

E ala i le Togiola, na puapuagatia ai le Faaola i o tatou tiga ma faanoanoaga uma (tagai i le Alema 7:11–13). A tatou maua se aso faigata ma lagona le pei e leai se tasi e malamalama, e mafai ona tatou iloa o le Faaola e malamalama. Ma a tatou maua se aso matagofie ma manao e faasoatatu i se tasi, o loo i ai iina le Faaola mo i tatou.


E finagalo o Ia e faasoatatu mea o tatou fiafia ai e pei lava ona Ia faasoatina o tatou tiga.

O Le Agaga Paia e taialaina i tatou.

Na folafola atu e Iesu Keriso i Ana Aposetolo e mafai ona faatasi mai le Fesoasoani, po o le Agaga Paia, ma i latou i taimi uma e aoao atu ma faamafanafana atu ia i latou (tagai i le Ioane 14:16–17, 26–27). E mafai foi ona tatou maua le meaalofa o le Agaga Paia e taialaina i tatou. Ma e mafai ona tatou faatuatuaina o tali o le a tuuina mai e le Agaga Paia o le a fesoasoani ia i tatou. Faatasi ai ma Lana taitaiga, e mafai ona tatou fesoatai pea lava pea ma le Aiga Atua. Ma ao tatou mulimuli i musumusuga tatou te maua, o le a amata ona sili atu le lelei o le tatou iloaina o i Latou. ■

FAAMATALAGA

1. Josefa Samita, i le *History of the Church*, 6:305.
2. Gordon B. Hinckley, “Ou Te Talitonu ia i Latou Nei e Toatolu,” *Liahona*, Iulai 2006, 8.
3. Thomas S. Monson, “O Le Meaalofa Faalelagi o le Lotofaafetai,” *Liahona*, Nov. 2010, 88.
4. Dieter F. Uchtdorf, “O Le e Alofa Atu e Alofaina Mai,” *Liahona*, Me 2012, 76.



LESONA I ASO SA
O Le Autu o le Masina Lenei:
O Poloaiga



AUAI I LE TALANOAGA



O Mea e Mafaufau Loloto i ai mo le Aso Sa

- O anafea na faamanuiaina oe e le Tama Faalelagi, Iesu Keriso, po o le Agaga Paia?
- O anafea na e lagonaina ai le sili ona latalata atu ia i Latou?
- O le a se mea e mafai ona e aoaoina e uiga ia te oe lava ia i le aoao e uiga ia i Latou?

O Mea E Te Ono Faia

- Tusi i lau api o talaaga e uiga i le ala ua e suaia ai i le iloaina o le Aiga Atua.
- Faasoatatu ou lagona i le lotu po o luga o faasalalauga faaagafesootai.



Saunia e
Larry M. Gibson

Fesoasoani Muamua i
le Au Peresitene Aoao
o Alii Talavou

Ou Te MANATUA PEA O IA

O le ala tatou te tausia ai le aso Sapati ia paia o se faailoaga
i fafo o la tatou feagaiga e manatua pea lesu Keriso.

Ou te manatua, i le avea ma se tagata e 11 tausaga, o le taitai faaaloalo atu e lo'u epikopo i totonus o le falesa o le matou falelotu fou a le uarota, lea sa ma nonofa faatasai ai i luma o le laulau faamanatuga. Sa fai mai o ia, "E te iloa, Larry, e le o toe mamao ae faauuina oe i le tofi o le tiakono i le Perisitua Arona. Mata e te iloaina o se faamanuiaga ma se tiute faapitoa lena mea?" Na ia tau mai ia te au o le a ou maua se tiutetauave paia e galue ai e pei ona faia e le Faaola i le tuuina atu o faatusa paia o le faamanatuga ia i latou i la tatou aulotu. Sa lofituina au i le tele naua o le valaauga o le perisitua o le a ou mauainia.

Na talosaga mai lo'u epikopo ina ia ou taulotoina ia tatalo e lua o le faamanatuga ma mafaufau pe faapefea ona fetau i lo'u olaga. Sa ia fai mai e tatau ona ou taumafai e faia mea o loo fai mai ai ia tatalo o le faamanatuga ia i tatou taitoatsi e fai pe afai ou te galue ai mo le Faaola i le tuuina atu o le faamanatuga i isi. Ina ua ou toe foi i le fale, sa fesoasoani lou tama ia te au e sue ia tatalo o le faamanatuga i tusi uma e lua

o le Mataupu Faavae ma Feagaiga (20:76–79) ma le Tusi a Mamona (Moronae 4; 5). Sa ou faitau i ai ma le faaeteete mo le taimi muamua i lo'u olaga. Sa ou faalogo ma le totoa a o tuuina mai i le lotu. Sa ou mafaufau loloto i upu a o tufa le falaoa, ae na foliga mai o le aafiaga atoa o le feagaiga o le faamanatuga na amata ona manino mai ina ua ou faalogo i upu nei i le faamanuiaga o le vai: "latou te manatua pea o ia." Sa ou fesili ia te au lava ia, "Mata o ou manatua *pea o Ia?* O le a le uiga o le upu *pea?* E mafai faapefea ona ou manatua pea o Ia?" O taimi uma lava ou te faalogo ai i na tatalo o le faamanatuga paia ou te lagona le ootia i le toe mafaufau ai i nei lava fesili e tasi.

O le ala o tatou tausia ai le aso Sapati ia paia o se faailoaga i fafo o la tatou feagaiga ma le Tama Faalelagi e manatua pea Iesu Keriso. *O le aso Sapati e tatau ona avea ma faavae mo lo tatou manatuaina o Ia mo le isi ono aso o le vaiaso.*

O le Aso Sa o se aso e faifai lemu ai, malolo, ma manatua ai. Tatou te auai atu ia tatou sauniga Lotu; mafaufau ai i o tatou malosiaga,

faamanuiaga, ma pona; saili le faamalogga; aai ma feinu i le faamanatuga; ma mafaufau loloto i puapuaga o le Faaola mo i tatou. Tatou te taumafai e aua nei faatosinaina i tatou e soose mea o le a taofia ai i tatou mai le tapuai atu ia te Ia, "i le aso lenei," e pei ona fetalai mai le Alii, "aua nei e faia ai se isi lava mea" (MF&F 59:13). Soo se gaoioiga tatou te faatinoina i le taimi o le Sapati e tatau ona ogatusa ma le agaga o le manatuaina o Keriso. Afai o soo se mea o loo tatou faia i soose vaega o le Sapati e aveese ai i tatou mai le manatuaina o le Faaola ma auauna atu i le Sapati e pei ona Ia auauna atu, atonu la e tatau ona tatou toe mafaufau i mea o loo tatou faia. Ia manatua, o le aso Sapati o se aso ua tofia e le nao le "malolo ai mai au galuega" ae ia "avatu ai au tapuaiga i le Silisili Ese" (MF&F 59:10).

E tatau ona tatou fuafua o tatou olaga i se auala o le a leai ai se alofaga mo le aveesea mai o le paia o soose vaega o le aso o le Alii. O se aso e tatau ai ona faia Lana pisinisi, o se aso lea o le a faamanuia ai ma toe faafouina ai o tatou olaga atoa e ala i aafiaga paia a le tagata lava ia ma o



tatou aiga. O se aso mo le faatamao-aigaina o o tatou agaga.

Faaalu sina taimi o le asō e fatuai ai se fuafuaga manatunatu lelei o mea o le a e faia e avea moni ai le aso Sapati o se aso paia ma mamalu i lou olaga. Ona faatinoina lea o lau fuafuaga.

Ia manatua le folafolaga matagofie a le Alii ia i latou o e ua faamamaluina ma le tatau le Sapati: "Ma o le tulaga e oo i ai la outou faia o nei mea ma le faafetai, ma loto ma mata fiafia, . . . e a outou le atoatoa o le lalolagi" (MF&F 59:15–16). Mata tatou te gafatia le aveesea mai o nei faamanuiaga i o tatou olaga ma olaga o tagata o o tatou aiga?

Ou te talitonu i le faamamaluina o le aso Sapati. Ou te molimau atu ma le lototoa ma le lotomaualalo o le tausia o le aso Sapati o se poloaiga a lo tatou Atua, o loo soifua ma e alofa ia i tatou taitoatasi. Ou te molimau atu afai o le a tatou mulimuli ma ola ai i le tiute paia o le tausia o le aso Sapati ia paia, o le a faamanuiaina i tatou e le Alii, taitaiina i tatou, ma musuia i tatou i le foiaina o faafitauli e faafetaiaia i tatou. ■



Faaopoopo Atu i le **MANUIA**

Saunia e Daniel Kawai

Na ua 14 ou tausaga, na vaai lou faiaoga o le fisiki i lau taleni i le matematika ma faaalu au i le Tauvaga o le Olimipeka o le Matematika a Pasila. E tolu ona vaega. O le vaega muamua ma le lona lua e faia i le Aso Toonai. O au sa i le faatulagaga lona tolu ma iloa ai e lua aso o le a faia ai, Aso Toonai ma le Aso Sa.

Sa ou tauina atu i lau faiaoga ma le faatonu o le Olimipeka ou te le suea se suega i le Aso Sa ona o le aso o le Alii. Sa talosagaina au e le faatonu e talanoa i ou taitai faale-Ekalesia ina ia faataga au e sue le suega i le Aso Sa, aua a ou le sue, o le a faaleaogaina au. Sa ou fai atu e mafai ona ou faagaloina mea uma ae e le mafai ona faagalo le Atua.

Sa ou lei faanoanoa, ona sa ou maua le faamoemoe e faamamaluina e le Atua i latou o e faamamaluina o Ia. Na ou manatua le Mataio 6:33: Ae ia outou muai saili le malo o le Atua ma lana amiontonu, ma o le a faaopoopo atu ia te outou nei mea uma.”

O ni vaiaso mulimuli ane sa matou faafesootaia ai le failautusi o le Olimipeka, lea na tauina mai e le mafai ona ou sueina le suega i soo se isi lava aso ma o le a faaleaogaina au. Ina ua mavae le tele o talanoaga, sa ia fautua mai ina ia ou auina atu ia te ia se imeli e faamalamalamaina ai lo'u tulaga. Ina ua uma ona auina atu le imeli, sa ou tatalo i le Tama Faa-lelagi ma tau atu o le a ou faia Lona finagalo.

O le po na sosoo ai, na ou maua ai se imeli mai le taitai faamaopoopo o ta'u mai ai e mafai ona ou sueina le suega o le Aso Sa i le Aso Gafua i le taimi e sili ona talafeagai mo au, ma sa oo lava i lona ofo mai e faatautaia le suega i lou lava nuu ina ia aua ai nei ou misia le vasega o le aoga i le taeao.

Ina ua uma ona mauaina lenei tala fiafia, sa ou tatalo e faafetai atu i le Alii aua sa Ia fesoasoani mai ia te au. Na o o'u matua i le malumalu e faailoa atu le faafetai.

MANATU AUTU E FAATATAU I LE TAUSIA O LE ASO SAPATI

“Ua tuuina mai e le Alii le aso Sapati mo lou manuia ma ua poloaiina oe e te tausia lona paia.

“O le faamamaluina o le aso Sapati e aofia ai le auai i au sauniga uma o le faale-Ekalesia. . . .

“Ia saunia i le vaiaso ina ia mafai ona e faavanoaina le Aso Sa mo le tele o gaoi-oiga faagaeetia loto e talafeagai mo le aso Sapati. . . .

“O le tausia o le Sapati o le a e latalata atili atu ai i le Alii ma lou aiga. O le a tuuina atu ai ia te oe se vaaiga faavavau ma le malosi faaleagaga.”

Mo Le Malosi o le Autalavou (tamaitusi, 2011), 30, 31.

Ina ua maua taunuuga o le suega, sa ou mauaina le pine auro. E faamamaluina e le Alii i latou o e faamamaluina o Ia. ■

O le tusitala e alala i São Paulo, Pasila.



TUUSAO I LE MATAUPU

**Mata e tatau ona
ave se misiona a
alii talavou i le taimi lava
e atoa ai le 18 tausaga?
Ma o sili atu ea ona
uunaia malosi ia tamaitai
talavou e ave se misiona i
le taimi nei lea ua mafai ai
ona latou o i le 19 tausaga?**

Inua fofogaina mai e Peresitene Thomas S. Monson le suiga o tausaga e agavaa ai mo le galuega faafaifeatalai, sa ia saunoa mai, "Ou te le o faapea atu o alii talavou uma o le a—pe ua tatau—ona auauna atu i le vave lena. Ae, e faalagolago lava i tulaga o tagata taitoatasi, faapea foi ona faalagolago i le naunautaiga o taitai perisitua, ae ua i ai nei le avanoa lena."¹ Mafaufau i lou soifua maloloina faaletino ma faalelagona, sauniuniga mo mea tautupe, ma le sauniuniga faaleagaga. E mafai ona e talanoa ma matua ma taitai perisitua e uiga i nei mea pe a filifili po o le a le taimi sao e auauna atu ai.

E faatatau i tamaitai talavou, na saunoa mai ai Peresitene Monson, "Tamaitai Talavou . . . e le o noatia . . . i lalo o le poloaiga lea e tasi e auauna atu e pei o alii talavou. Peitai, matou te faamautinoa atu o tuafafine talavou o le Ekalesia, ua latou faia se saofaga taua i le avea ai o ni faifeatalai, ma e matou te taliaina foi la latou auaunauga."² ■

FAAMATALAGA

- Thomas S. Monson, "Susu Mai Ia Ma Maliu Mai i le Konafesi," *Liahona*, Nov. 2012, 4–5.
- Thomas S. Monson, "Susu Mai Ia Ma Maliu Mai i le Konafesi," 5.



Inaua le lototeli e tu atu mo tulaga faatonuina o le Ekalesia, e tusa lava pe o le uunaiga e sau mai isi talavou o le Au Paia o Aso e Gata Ai o e malamalamai tulaga faatonuina ma atonu foi o manatu o e fia amiontonu. O fea o mea nei e sili atu le lamatia:

o le le usitai i poloaiga a le Alii po o le faafoliga o se tagata lelei i nisi o lau tupulaga? (Ia, afai o latou uunaia malosi oe e faia se mea e te lagonaina *patino* le le toafilemu pe ua solia ai se tulaga faatonuina na setiina e lou *aiga* nai lo le Ekalesia, e mafai lava ona e tu atu mo oe lava ia e ala i lou faapea atu, ua e filifili e aua le faia ma talosagaina i latou e faaaloalo i ou lagona.)

E moni, e tatau ona e taumafai e taulimaina ma le faaeteete le mea na tupu. E pei ona tau atu e le perofeta o Alema i lona atalii faifeatalai o Sepulona, "Faaaoga le lotoa, ae le o le faafiamalosi" (Alema 38:12). E le tatau ona i ai se tuuaiga sauva po o se uiga faamaualuga. E mafai lava le na o lou faailoa atu i tagata ou tulaga faatonuina ia ua e filifili e ola ai. Ma afai ua talosagaina oe e tagata o toaaga mai o le Ekalesia e solia ni tulaga faatonuina a le Ekalesia ua manino lelei, ia manatua le saunoaga a Peresitene Dieter F. Uchtdorf, Fesoasoani Lua i le Au Peresitene Sili: "Ia avea oe o se uo i tagata uma, ae aua lava nei fetuutuunaia ou tulaga faatonuina."¹ ■

FAAMATALAGA

- Dieter F. Uchtdorf, "O Lau Malaga Matagofie i le Aiga," *Liahona*, Me 2013, 128.

O VAEWA UMA E LUA O LE FAAMANUIAGA



O le auai i le malumalu ma talafaasolopito o aiga e ttau uma; pe a tuufaatasi, la te aumaia faamanuiaga faaopoopo.

Saunia e Brittany Beattie

Mekasini a le Ekalesia

Ao e matamata i itulau o le *Liahona* o le masina lenei, tagai i le tele o ituaiga lanu eseese lea e faamanaiaina ia ata taitasi, atavali, po o se mamanu. O le toatele o lanu na mafai ona maua ona o le tuufaatasia o ni lanu autu se lua—lanumumu, lanusamasama, po o le lanumoana—e fatu ai se lanu fou, o se tasi o lanu e le mafai ona maua pe afai na tuueseese ia lanu autu.

E tulaga tutusa le galuega o malumalu ma talafaasolopito o aiga ma na lanu: e mafai ona e maua atili ni faamanuiaga i le tuufaatasia o galuega taua ia e lua. O le mafuaaga ona o le galuega o talafaasolopito o aiga ma le malumalu o ni vaega moni lava e lua o se galuega e tasi—o le galuega o le faaolataga. Ioe o le a e mauaina pea ia faamanuiaga silisili e ala i le fesoasoani atu i isi ia latou talafaasolopito o aiga ma e ala i le auai atu

i le malumalu e faia le galuega mo tagata ua tuuina atu iina o latou suafa. Ae o le a faapea ona e maua ai faamanuiaga sili atu—o le olioli i vaega uma o lanu—pe a e tuufaatasia ia vaega e lua ma maua ai igoa o *ou lava* aiga ona faatino lea o le galuega mo *ou tuaa* i le malumalu.

E pei ona aoao mai Elder Richard G. Scott o le Korama a Aposetolo e Toasifululu:

“O galuega o le malumalu ma talafaasolopito o aiga o le galuega e tasi e vaevaeina i ni vaega se lua. . . .

“E finagalo le Tama oi le Lagi ia maua e i tatou taitoatasi ia vaega uma e lua o faamanuiaga o lenei galuega ttau a fai ai ma sui [o e ua maliliu]. Ua Ia taitaiina isi e faasino mai ia i tatou le ala e agavaa ai. O oe ma a’u lava e pa’u i ai le mauaina o na faamanuiaga.

“Soo se galuega e te faia i le malumalu o le taimi faaaluina ttau lea, ae o le mauaina o sauniga sui mo ou lava tuaa o le a sili atu ai ona paia le taimi i le malumalu ma o le a faapea ona maua ai faamanuiaga sili atu.”¹

O a la nisi o “faamanuiaga sili atu” lea e oo mai pe a tatou mauaina “vaega uma e lua o le faamanuiaga”? I le itu taumatau o loo i ai ni folafolaga se tele mai Aposetolo o nei ona po.

FAAMATALAGA

1. Richard G. Scott, “O Le Olioli i le Faaolaina o i Latou ua Maliliu,” *Liahona*, Nov. 2012, 93–94.
2. Boyd K. Packer, “Your Family History: Getting Started,” *Liahona*, Aug. 2003, 17.
3. Russell M. Nelson, “O Tupulaga e Sosoo i le Alofa,” *Liahona*, Me 2010, 92.
4. David A. Bednar, “O Le Taimi Lenei,” lds.org/youth/family-history/leaders.
5. John A. Widtsoe, i le Conference Report, Apr. 1943, 39.



O Se Uunaiga o le Faamamaina, ma le Faaleagaga

“O galuega o talafaasolopito o aiga a tagata o le Ekalesia ua i ai se aafiaga faaleleia, faaleagaga, ma toafilemu ia i latou o e o galulue ai. Ua latou malamalama o loo latou sosooina faatasi o latou aiga. . . . Afai tatou te sailia o tatou lava gafa ua sili atu isi mea tatou te fafia i ai nai lo igoa . . . O mea tatou te fafia i ai e liliuina atu ai o tatou loto i o tatou tama — tatou te saili ia maua i latou ma iloa i latou ma auauna atu ia te i latou.”²



Vaega o se Galuega e Sili Atu

“Sootaga faaleagaga . . . e mau. . . . Pe a liliu atu o tatou loto i o tatou tuaa, e i ai se mea i totonusi o i tatou e sua. Tatou te lagonaina o i tatou o se vaega o se mea e sili atu nai lo o i tatou lava.”³




O Se Malupuipuiga e tetee atu i Faaosoosoga

“E manuia uma lava i tatou i e ua muamua atu. O le aoao i na tala e fesoasoani ia i tatou e iloa po o ai i tatou ma o fea tatou te o mai ai. . . . O e faia se saililiga i lou lava aiga ma fesoasoani i saililiga a isi tagata? Mo se tagata talavou, i le amioleaga o le lalolagi o tatou ola ai nei, o se tasi lea o puipuiga sili mai faaosoosoga a le fili.”⁴



Fesoasoaniga mai le Lalolagi iē Vaaia

“Masalo afai tatou te faia la tatou galuega e fai ma sui o i latou o le lalolagi iē vaaia, o e fia aai, ma tatalo mo le galuega e mafai ona tatou faia mo i latou, o le a tuuina mai ia i tatou e le lalolagi se fesoasoani i lenei vaitaimi o lo tatou manaoga faanatinati. E toatele atu tagata i le lalolagi o agaga nai lo iinei. E tele atu le mana ma le malosi iina nai lo iinei i lenei lalolagi.”⁵



SA OU MAUAINA SE IGOA

“Ina ia saunia mo se malaga a le autalavou i le malumalu, sa tuufaatasia e la matou uarota se gaoioiga a le Mutuale e sailia igoa o le aiga e mafai ona matou aveina. Sa ou nofo i ona autafa o la'u uo ma sa fai si faitio e le mafai ona ou mauaina ni igoa e tatau ona faia ni sauniga. Ina ua uma le tele o saililiiga i le familysearch.org, sa ou maua se igoa. Sa ou matuai fiafia lava!

“Sa ou tamoe faatopetope atu i lo matou faufautua o talafaasolopito o aiga ma fesili i ai po o le a le isi laasaga e sosoo ai. Sa ia faaali mai ia te au le ala e sefe ai le igoa ma lolomiina ina ia mafai ona ou faia le galuega o le malumalu. Sa ia tauina mai foi o le tamaitai o se tagata moni ae le na o se igoa i luga o le lau. Sa ou lagonaina le Agaga ma iloa ai na faatalitali le tagata mo lana galuega e tatau ona fai ma mo au e saili ia te ia. Sa mafai ona ou aveina lona igoa i le malumalu. Ou te matua faafetai mo le avanoa e auauna atu ai i ou tuaa ma fesoasoani ai e avatu ia i latou le olioli o le talalelei.”

Leah G., Niu loka, ISA



Ae Faapefea pe Afai Ou Te Le Maua se Initoneti?

E ui o igoa na e maua i lau sailiga o le talafaasolopito o aiga e manaomia le auina atu i le Initoneti ina ia mafai ai ona faia galuega faalemalumalu mo i latou, ae e le manaomia le i ai o sau Initoneti i le fale. Ao mai ia igoa, faamatalaga, ma tala o aiga mai tagata o ou aiga o loo soifua, ona vaai lea po o i ai se nofoaga autu o talafaasolopito o aiga i le lotoifale e mafai ona e auina atu ai igoa i le familysearch.org I eria o i ai se faatapulaa o le faaaogaina o le Initoneti, talanoa i faufautua o talafaasolopito o aiga a le uarota po o le siteki e uiga i punaoa ua latou maua mo le mauaina o le faamatalaga na taina i totonu faaeletonika mo oe.



O Lona Uiga La E Le Tatau ona Ou Alu i le Malumalu pe Afai e Le o I Ai ni Au Igoa o Aiga?

Lei lava! O le auai atu i le malumalu e aumaia ai le anoanoai o faamanuiaga mo outou ma mo i latou o e ua e sui papatiso ma faamauina ai, e tusa lava pe o ni ou tuaa pe lei. E tatau lava ona e auai i le malumalu e tusa lava pe e le o i ai se igoa o le aiga. Na aoao mai e le Au Peresitene Sili: “O tagata e tapulaa le avanoa e faia ai a latou lava saililiiga o talafaasolopito o latou aiga, e fautuaina ina ia faatinoina sauniga sui mo igoa e aumai e isi tagata o le au paia po o le malumalu” (Tusi a le Au Peresitene Sili, 8 Oke., 2012).



O SE VALAAULIA MAI LE AU PERESITENE SILI

“A maua e tagata o le Ekalesia ia igoa o o latou augatua ma avatu na igoa i le malumalu mo galuega o sauniga, e mafai ona matua faamauoaina lava le aafiaga i le malumalu. . . . E faapitoa lo matou fautuaina o le autalavou. . . e faaaoga mo galuega i le malumalu ia igoa o o latou lava aiga po o igoa o tuaa o tagata o a latou uarota po o siteki.”

Tusi a le Au Peresitene Sili, 8 Oke., 2012.



LEO O LE AUTALAVOU: FAAMANUIAGA O TALAFAAASOLOPITO O AIGA

Na valaaulia talu ai nei le autalavou mai Niu Ioka, ISA, e le latou au peresitene o le siteki e saili se igoa o le aiga e ave i le malumalu o se vaega o le konafesi faapitoa a le autalavou. Sa latou maua ni faamanuiaga silisili a o latou lagona le liliu atu o latou loto i o latou tama (tagai i le Malaki 4: 5–6).

Aveina o Igoa o Aiga i le Malumalu

- “Sa masani ona ou mafaufau o le talafaa-solopito o aiga o se isi lava mea e siaki, ae o le taimi nei ua ou iloaina o ni tagata-*moni* lava i latou o e ua tausagā ona faatalitali. O ou aafiaga o le malumalu e ese lava pe a ou aveina igoa o aiga. Ou te manatu ona o le galue malosi, taimi, ma tatalo sa alu i le sailia o se igoa e *tasi*. Ae o se igoa e *tasi* e matuai aoga lava aua o lena *tagata* e *toatasi* o loo manaomia le faatasi ai ma le Tama oi le Lagi.”

—Hana A., 13 tausaga

- “A uma ona e mauaina se tagata, e amata ona e fesootai ma lena tagata i le lalolagi o agaga. O le aumaia o a oe lava igoa o se auala lea e faamalolosia ai lenei sootaga. E fesoasoani ia te oe e malamalama ai i lou aiga e faavavau.” —Spencer S., 15 tausaga
- “O le aumaia o igoa o aiga i le malumalu e fesoasoani ia te oe e iloa ai le moni po

o ai nei tagata. E le na o i latou o ni igoa i luga o se fasi pepa; o i latou o ni uso ma ni tuafafine moni lava o e faasoaina lou talafaaasolopito—ma o se vaega o i ai.”

—Lilli N., 16 tausaga

Mauaina o Faamanuiaga

- “Ua ou matauina se eseesege i lo’u olaga. O se lagona mafanafana ma le saoga-lemu.” —Noah R., 13 tausaga
- “E te lagonaina i lou loto o oe o se vaega o se galuega e sili atu. O le tuuina atu i lou aiga le avanoa e maua ai faamanuiaga o le malumalu o se lagona e le mafaatusalia.”

—Corinne C., 17 tausaga

- “Ua sili atu lou lagona o le mafanafana ma le toofilemu talu ona amata ona ou faia le talafaaasolopito o aiga. Pe a ou ave igoa o aiga i le malumalu, e aumaia ai ia te au se lagona o le olioli.” —Tyler M., 16 tausaga

- “Ua faateleina ai lo’u alofa mo le Faaola, Tama Faalelagi, ma o’u tuaa. Ua fesoasoani ia te au e latalata atili ai i lo’u aiga patino ma faateleina ai lau molimau o le talalelei.” —Alexandra H., 14 tausaga
- “Ua matuai ou fafia lava.” —Ross S., 12 tausaga
- “Faatasai ai ma igoa taitasi, ua ou lagonaina se lagona o le filemu ma le fafia, e pei na faatalitali mai le tagata mo na o au lava.” —Rhiannon B., 15 tausaga
- “Ou te iloa le mea na ou sau mai ai, ma ua faatupulaia lou talitonuga.” —Eliza L., 13 tausaga
- “Ua faaititia lou finau i totonu o lo’u aiga.” —Gehrig L., 12 tausaga
- “Ua atili faateleina lou malamalama i le taua o aiga. Ou te fia faatalatalata atili i lo’u aiga i le lalolagi.” —Emma L., 15 tausaga
- “Ua fesoasoani ia te au ia malamalama atili i le fuafuaga a le Atua mo i tatou. Ou te lagona le latalata atili atu i le Tama Faalelagi ma le talalelei aua ua ou malamalama lelei atili i sauniga ia o loo faatinoina.” —Noah C., 14 tausaga ■

O Le a se Mea o le a E Faia?

O le a se mea o le a e faia e “mauaina ai na faamanuiaga” o le sailia o igoa o le aiga ona aveina lea o i latou i le malumalu? Fai se fuafuaga i le taimi nei e aumai ai folafolaga o le mauaina o vaega uma e lua o le faamanuiaga i lou olaga.

O LA TATOU AVANOA

O SE MAU MUSUIA

"O le a faia e ia [Iesu Keriso] le puluvaga mo le fanauga uma a tagata; ma o i latou o e e talitonu ia te ia o le a faaolaina" (2 Nifae 2:9).

I lenei mau, o le upu *puluvaga* e i ai sona uiga maoae. O lona uiga o le "galue o se faufautua e fesoasoani ai i ni vaega se lua e foia se faafitauli." I lenei tulaga, o le Faaola o le faufautua o lē e fesoasoani i tagata uma o e ua vavaeese mai le Tama Faalelagi ona o le agasala.

O lenei mau na fesoasoani ia te au ia iloa le taua o lo tatou Faaola o Iesu Keriso. Ou te faafetai mo Lana Togiola. Ua na o la e mafai ai ona tatou toe nonofo faatasi ma lo tatou Tama oi le Lagi.

Hanisha A., Initia



O AI E FIA TATALO?

Ila'u misiona, na ma aoao ai ma la'u soa se aiga e i ai ni tamaiti se toatele. I se tasi o taimi e faatulaga ai ma fuafuaga, sa ma tatalo ai ma talatalanoa po o le a le lesona e sosoo e tatau ona ma aoaoina i tamaiti, ma sa ma malilie uma e aoao atu e uiga i le tatalo.

Ina ua ma taunu i lo latou fale, sa matuai fiafia le tina matua ma tamaiti. Sa ma amataina le lesona i se tatalo. Na filemu ma sauni tamaiti e faalogo. Na ma faamalamalamaina ia i latou le auala ma le mafuaaga e tatalo ai. I le faa-iuga o la maua lesona, na ma fesili atu ia te i latou, "O ai e fia tatalo faaiu?". Sa mananao uma i latou e tatalo! O lea sa matou faia ai se faatulagaga mo i latou e tuuina atu ia tatalo i taimi uma lava ma te o mai e fai le lesona. Sa ma valaau-laina foi i latou e tatalo pe a ma le i ai.

Ina ua mavae lena lesona, sa ou mafaufau, "Aisea e faigofie ai i le fanau iti le tatalo ao ma tagata sailiili matutua atu e fai si faigata o le tatalo?" Sa ou maua-inia se tali i le Bible Dictionary [Lomifefilo i le Tusi Paia]: "A outou aoaoina loa le sootaga moni o i tatou ma le Atua (faapea, o le Atua o lo tatou Tama, ma o i tatou o Ana fanau), ona avea lava lea o le tatalo ma a tatou mea masani ma faaosofia i le loto (Mata. 7:7–11). O le tele o faigata ia e ta'ua e uiga i le tatalo e tulai mai mai le faagaloina o lenei mafutaga" ("Tatalo"; tagai foi i le Taiala i Tusitusiga Paia, "Tatalo," scriptures.lds.org).

Talu mai lena taimi, ua ou taumafai e fesoasoani i tagata ia malamalama i o latou sootaga moni ma lo tatou Tama oi le Lagi. E finagalo lo tatou Tama oi le Lagi e talanoa i Ana fanau, e pei lava ona mananao o tatou matua faalelalolagi e talatalanoa faatasi ma i tatou. E alofa o Ia ia i tatou, e finagalo o Ia e talanoa ma i tatou, ma e finagalo o Ia ina ia tatou talanoa atu ia te Ia.

Jarrel M., Filipaina

O TALAFAAASOLOPITO O AIGA UA TUUFAATASIA AI AIGA

Sa ou tau i se sini o le Alualu i Luma o le Tagata Lava Ia lea na faaosofia ai au e amataina le gafa o lou aiga. Soo se taimi lava sa ou alu ai i o'u matua matutua mo le taumafataga o le aoauli, sa la faamatalaina ia te au ni tala mai o laua olaga faapea ma isi tagata o lou aiga. Na amata ona ou alu i le nofoaga autu mo talafaaasolopito o aiga ma aoina mai ia faamatalaga e uiga i lo'u aiga.

Ou te manatua le taimi na ou maua ai le faamatalaga e uiga i le tinamatua a lo'u tinamatua. A o maitaga, na malaga mai ai o ia i Atenitina i luga o se vaa. I le taimi o le faigamalaga, sa tanuina ai lana tama tama i le sami. Sa na o ia o se tala pe ana ou le mauaina lona igoa i totonu o se faamaumauga. Sa amata ona ou latalata atili atu i o'u matua matutua, ma na ou iloaina o'u tuaa e peiseai sa matou nonofo faatasi. Sa ou maua faamatalaga e uiga i o'u augatama, faasoaa atu le tala fiafia o le faamauga e faavavau, ma fesoasoani i le faamanuiaina o le tele o augatupulaga.

Sa faaaauau pea ona ou iloa ia oa natia e faafetai ai i le FamilySearch. Ou te fiafia i le saunoaga a Peresitene Thomas S. Monson: "Ou te tautino atu pe afai tatou te faia mea uma tatou te mafai e faataunu ai le galuega ua tuuina mai i o tatou luma, o le a faavanoaina e le Alii ia i tatou ki paia e manaomia e tatalaina ai le oa o loo tatou sailia naua."¹ E ala ia tatou taumafaiga, o le a tatou iloa ai ki o a tatou oa e faavavau, ma o le a mafai ona tatou feiloai i se aso ma o tatou tuaa faaletagata.

Yael B., Atenitina

FAAMATALAGA

1. Thomas S. Monson, "O Le Ki o le Faatuatua," *Liahona*, Me 1994, 5.



MAUAINA O SE MOLIMAU MAI LE AGAGA PAIA

Ina ua ou auai i le Ekalesia i le iva tausaga, ua leva ona ou talitonu i le moni o le Ekalesia, ma sa ou manatu ai e le tau manaomia le fesili atu i le Atua pe moni. Ina ua auai mo ni nai tausaga, na amata ona ou masalosalo. Ao faia le sauniga faamanatuga, ao ou faalogologo i le viiga "O le Talosaga Muamua a Iosefa Samita" (*Viiga*,

nu. 14), sa ou tatalo ma ole atu i le Tama Faalelagi pe moni le Ekalesia ma pe na vaai moni lava Iosefa Samita ia te Ia ma Iesu Keriso. Sa oo mai le manatu i lo'u mafaufau, ioe e moni le Ekalesia a Iesu Keriso, ma ioe, na vaai Iosefa i le Atua le Tama ma Iesu Keriso. Sa faatumuina ou mata i loimata, ma sa ou lagonaina le mu o lo'u loto i le Agaga Paia.

I le taimi nei e mafai ona ou faamautu atu faapea o le Agaga Paia na molimau mai ia te au i le moni o lenei Ekalesia. Ou te iloa na vaai Iosefa Samita i le Tama Faalelagi ma Iesu Keriso, ma e le mafai ona ou faafitia. Sa tuuina mai e lenei molimau ia te au le lototele e faasoaa atu la'u molimau i isi.

Tamara O., Pasila



O U O M A I L E S A L A F A O L E L A L O L A G I

¡Hola, amigos!*

O i Maua o Mahonirae
ma Helamana
mai Mekisiko

Teu au ato! O mai
e feiloai i uo mai le
salafa o le lalolagi!

Mahonirae
Helamana

Mai se faatalanoaga ma Amie Jane Leavitt

O Mahonirae ma Helamana o ni uso o
loo nonofo i le talafatai o Mekisiko.
Na faaigoaina i laua e o latou matua i igoa
o ni alii maoae se toalua mai le Tusi a
Mamona. O Mahonirae Morianekumeri o
le uso o Iareto. Na ia vaai i le tamatamai
aa o le Alii. O Kapeteni Helamana sa avea
ma se taitai amiontonu. Sa ia taitaia le autau
e lua afe malolosi. ■

* "Hola Amigos!"



*O nei uso e faamoemoe ia ola e tusa ai
ma faamoemoega o igoa ia na faaigoaina
ai i laua e o la matua. Latou te mananao
ia faapei lava o Mahonirae ma Helamana
mai le Tusi a Mamona.*





Sa faamauina o maua matua i le Malumalu o Guadalajara Mekisiko i le 2003. O le malumalu aupito latalata lea i le mea o matou nonofo ai. Pe a ma le ono itula e alu ai iina i le taavale. Ma te fiafia e asiasi i le malumalu ma iloa o le a i ai se aso ma te o ai i totonus, e pei lava ona faia e o maua matua i le taimi nei.

OU TE FIA VAAI I LE MALUMALU



O le Malumalu o Guadalajara
Mekisiko o le lona 11 lea o malumalu e 13 i Mekisiko.



Ma te fiafia e faaalu faatasi le taimi o se aiga. O Aso Too-nai uma lava matou te o ai i le matafaga e latalata ane i lo matou fale. Matou te aai i ula—o le meaai matou te fiafia i ai—ma tacos ma tortas (o se ituwaiga o sanuisi). Matou te savavali i le Malecón, po o le auala o le apitagal. Matou te fauina ni fale i oneone ma taaalo i le sami.



SAUNI E O!

Na teu e Mahonirae ma Helamana nisi o mea la te fiafia i ai ia la ato. O fea o nei mea o le a e teuina i lau ato?





Saunia e Elder
Robert D. Hales

O Le Korama
a Apostolo e
Toasefululua

*O sui o le Korama
a Apostolo e
Toasefululua o ni
molimau faapitoa
a Iesu Keriso.*

O le a le uiga o le avea ma se **KERISIANO?**



O le upu Kerisiano o lona
uiga o le tauaveina i o tatou luga
o le suafa o Keriso. Tatou te faia lenei
mea e ala i le papatisoina ma le
mauaina o le Agaga Paia.

*Mai le "Avea o se Kerisiano Moni
e Faapei o Keriso," Liahona,
Nov. 2012, 90–92.*



6

Italia



5

Niu Silia



4

Filipina



3

Zimbabwe



2

Rusia



1

Meksiko

Aso o le Aso Lenei

Aso Fanau

Atunuu

ATAPUE

Igoa

Tusifolau #



Passaport
Passeport
Pasaporte
O U O M A I L E
S A L A F A O L E
L A L O L A G I



Pasila

7



Toga

8



Korea i Saute

9



Chile

10



Egelani

11



Suetena

12

Tusifolau

O U O M A I L E
S A L A F A O L E
L A L O L A G I



Vaavaai mo se faailogatusi fou o se atunuu
e faaopoopo atu i lou tusifolau i lomiga a sau
o le Liahona.



O UO MAI LE SALAFA O LE LALOLAGI



O LA TATOU ITULAU



Talu mai lo'u laitiiti, na aoaoina au e lo'u tina ma lo'u tama e uiga i le malumalu. E mamao ese lava, ae ou te fiafia e alu i ai faatasi ma lo'u aiga. Ina ua faamauina a'u i o'u matua, sa iu lava ina mafai ona ou ulu atu i totonu—e ese le matagofie. O le taimi lenei pe a matou o, ou te nofo i fafo e faatalitali. Pe a ou matua, o le a ou osia ni au lava feagaiga i le malumalu.

David V., 6 tausaga, Nikarakua



Ou te fiafia tele e usu ia pese o le Ekalesia ma auai i afiafi faaleaiga faatasi ma lo'u aiga. E i ai nai ou tei laiti e toalua e igoa ia lareto ma Sarai, ma ou te alofa tele ia i laua. Ou te fiafia e fesoasoani i lo'u tina pe a kuka aua pe a ou matua, ou te manao e lelei lau kuka e pei o ia.

Ambar A., 9 tausaga, Ekuatoa

Talu mai lo'u laitiiti, na aoaoina au e lo'u tina ma lo'u tama e uiga i le malumalu. E mamao ese lava, ae ou te fiafia e alu i ai faatasi

Ou te iloa o loo soifua lesu Keriso, ma e popole o la mo i tatou uma, ma ou te iloa e moni le Ekalesia.

Osiris M., 6 tausaga, Pasila



Tris M., 8 tausaga, Pasila



Ou te fiafia e fesoasoani i lo'u tina i le afiafi faaleaiga. O loo mananao lo matou aiga e o i le malumalu ina ia mafai ona matou faatasia e faavau. Pe a ou matua, ou te fia auauna atu i se misiona e pei o ou tausoga. Ou te alofa i le Tama Faalelagi ma le perofeta, o Peresitene Thomas S. Monson. Ou te fiafia i le pese Peraimeri "O Le Ekalesia a lesu Keriso."

Keydi P., 12 tausaga, Honetura



D. Văn Hiêp, 11 tausaga, Kemupotia



Sa aoaoina au i le talalelei talu mai le taimi ao ou laitiiti lava. Ina ua valu ou tausaga, sa ou faia le filifiliga e papatiso. Sa ou taulotoina uma mataupu faavae o le faatuatua e 13 mo lena aso faapitoa. Ina ua ou sau i fafo mai le vai, sa ou lagonaina se mea matuai malosi lava. Sa fai mai lo'u tina o na lagona e sau mai le Agaga Paia. Ou te iloa na toefuatai mai e losefa Samita le Ekalesia a lesu Keriso, o le Tusi a Mamona e moni, ma o Thomas S. Monson o se perofeta soifua.

Abigail A., 8 tausaga, Sepania

E Faapei Lava o Tusitusiga Paia!

Na matou manatu o loo lelei lava le gasologa o le savaliga sopo, pe ana matou le vaaia le faailo o le auala.



**Na saunia e
Renae Weight Mackley**

E faavae i se tala moni

*"Ma o le a Ou faamamaina foi
avega ua tuu i o outou tauau"
(Mosaea 24:14).*

Ole au tai sefulu tausaga e matua atatamai lava. Matou te fia iloa mea mo i matou lava.

E ta'u soo mai lava e lo'u tama ia te au e faatatau ia tusitusiga paia ia te au lava. *Ia faatatau* o lona uiga ua e taumafai e faaaoga mea ua e aoaoina mai tusitusiga paia i lou olaga. O lea la, pe a matou faitauina

faatasi o se aiga, o nisi taimi e oso atu ai lava sau tala ao lei faamalamalamaina mai e Tama ia i matou. E pei, "Ou te iloa, Tama, ua tatau ona tatou anapopogi ma tatalo, e pei na fai mai i tusitusiga paia."

E ataata o ia aua e masani lava ona ou mauaina le savali sao.



"la tatou tautino atu i le faitauina o tusitusaiga paia . . . i le faamoemoega ma le taulaisili atu."

Peresitene Dieter F. Uchtdorf, Fesoasoani Lui i le Au Peresitene Sili, "Lou Tulaga Gafatia, Lou Avanoa," *Liahona*, May 2011, 59.

Ae i se tasi taimi, sa ou iloa ai o tusitusiga paia e mafai ona pei moni lava o lo'u olaga! Na tupu nei mea uma ina ua matou o i se faatasiga faaleaiga o le malaga o atofaafafa.

Sa ou tauaveina la'u lava ato faafafa lapoa ma le taga moe, ma ou te le'i tomumu. Aua, sa faapea e na o le fa maila (6.5 km) i le vaituloto. Ou te mafai ona ou au, e leai se faafitauli.

E lei faigata tele le savaliga sopo, ae sa ou fiafia e malolo ina ua mavae le lua maila (3 km). Ona matou vaaia lea o le faailo muamua o le auala sopo. Na fai mai o loo tumau lava le ono maila (9.5 km) le mamao o le vaituloto. E lei tau taua maia e lou tama ia te au faapea sa matua faaluaina le umi o le auala e pei ona matou mafaufauna muamua. Ua uma ona ou iloaina lena mea.

Sa tatau la ona ia *tau* mai ia i matou e tau faaumi-umi le faaaogaina o matou vaiinu.

O le fautuaga a lo'u tama sa taua ae sa faigata ona mulimilitai i ai.

Sa lagona le vevela o le la i le aoauli, ma sa tau leai ni meapaolo i le

auala Na foliga mai o le a matou le taunu lava i le vaituloto.

Na taotao mai i tua o tamaiti laiti ia le au matutua, ae sa pito lava i luma ia taosoga matutua. Sa matou o faatasigi ma ou taosoga e toatolu matou te tupulaga, ma sa matou oo i se mea e i le va.

Ina ua le mafai ona matou toe iloa atu se tasi i luma atu po o tua foi, na amata ona matou popole. Sa faalogoina le mamafa o matou atofaafafa, ma ua leai ni vai ia matou fagu vai. O le a le umi tatou te o ai?

Mulimuli ane, na matou popole tele ma ua le lavava ma filifili loa e tutu ma tatalo.

Ina ua uma le tatalo, na matou pikina i luga a matou atofaafafa ma faaaauau le savaliga.

E lei umi ae matou faalogoina le patapatatu mai o vae solofanua o loo agai mai i luga o le ala. Sa matou faatalitali ma iloa atu se alii o loo tietie i se solofanua o agai mai ia i matou.

Sa tu o ia ma tuuina mai ia i matou sina vai. Na ia faamatalaina mai o loo faanatinati atu o matou tausoga matutua i le vaituloto ma se faamama vai e pamu mai ai se vai e aumai mo i matou. Sa faalogo le tagata i le ala o matou manaomia ai se vai ma sa ia ioe e fesoasoani mai. "O i ai nisi o outou o manaomia se fesoasoani ia outou ato faafafa?" na ia fesili mai ai.

Sa ou tilotilo atu i o'u tausoga, ma sa latou ataata ia te au. Na matuai lelei lava o matou lagona!

"E tatau ona e alu e fesoasoani i isi," o le matou tala lea i le tagata. "O loo lelei i matou."

Ma e moni lava! O le vaega o totroe o le auala e oo i le vaituloto na foliga mai e pei o siiina e agelu a matou ato faafafa ma tuleia i matou i luma. Ina ua ou tauina i ou matua e uiga i ai mulimuli ane, na ataata Tama ao Tina na i ai loimata i ona mata.

O le vaiaso mulimuli ane, na faitau ai e lo'u aiga le Mosaea 24. Na pupula tele ou mata ao matou faitauina upu nei: "Ma o le a Ou faamāmāina foi avega ua tuu i o outou tauau, e oo ia te outou tou te le lagonaina i latou i luga o o outou tua" (fuaiupu 14).

"O le mea lena na tupu i luga o le auala," na oso atu ai lau tala. Ou te lei manaomia le tau mafaufau e uiga i le auala e faaaoga ai lenei mau i lo'u olaga—ua uma ona faamatalaina e lenei mau lo'u olaga! Matua ofoofogia lava! Ou te le mafai ona faatali e saili isi mau na pei o lo'u olaga.

Ma o le ala lena na ou iloa ai e mafai ona ou faatatauina tusitusaiga paia ia te au, ma e mafai foi ona ou faatatauina au i tusitusaiga paia! ■

E alala le tusitala i Iuta, ISA.



O NOA

o se perofeta o le Feagaiga Tuai. Sa ia tausia poloaiga ma fesoasoani i lona aiga ia tumau saogalemu mai le Lolo e ala i le faalogo i afioga a le Atua. E mafai ona e tausia poloaiga ma fesoasoani foi i lou aiga i le faitauina mai le Feagaiga Tuai i vaiaso taitasi o le tausaga lenei.

Fai i se tagata matua e fesoasoani ia te oe e oti ese le itulau valivali lenei po o le lolomi mai ai liahona.lds.org. I vaiaso taitasi pe a uma ona e faitau, valivali ia avanoa uma ma le numera o lena vaiaso, i le faaaogaina o soo se lanu e te manatu e manaia tele. Tagai i le itulau e 76 mo fautuaga o faitauga faalevaiaso. E mafai ona e faitau na o oe pe faitau faatasi ma lou aiga. A uma ona e faitauina, o le a e faitauina nisi o tala sili ona taua i le Feagaiga Tuai! ■

ATA NA TUSIA E ADAM KOFORD





28

5

29

41

26

18

25

24

52

15
1014
12

23

51

13
32

21

30

31

50

36

43

42

1

44

47

19

51

19

18

22

7

6

33

21

17

13

2

20

46

23

14

16

24

15

34

Fautuaga mo le Faitauga Faalevaiaso mo le “Lu’i o Mau o le Feagaiga Tuai” (tagai i itulau 74–75).

VAIASO	FAITAUGA	VAIASO	FAITAUGA
1	Ata o le Faaolataga: Mose 1:39; Aperaamo 3:12, 22–28; 4:1	26	Kitiona: Faamasino 6:6–16; 7:1–7, 16–22; 8: 22–23
2	O Le Foafoga: Kenese 1; 2:1–3	27	Samasoni ma Talila: Faamasino 13:1–5, 24; 16:2–23, 28–30
3	Atamu ma Eva: Kenese 2: 7–9, 15–25	28	Ruta ma Naomi: Ruta 1:1–9, 14–16; 2:1–8, 15–18; 3:1, 3–11; 4:13, 17; Ioane 7:42
4	O Le Pau: Kenese 3	29	Samuelu, le Perofeta Taulealea: 1 Samuelu 1:9–11, 17–20, 24–28; 2:26; 3:1–11, 16–20
5	Kaino ma Apelu: Kenese 4:1–16	30	Tavita ma Koliata: 1 Samuelu 16:7; 17:1, 4–24, 32–33, 37–51
6	O Le Nuu o Enoka: Mose 6:21, 26–28; 7:13–21	31	Tavita ma Ionatana: 1 Samuelu 18:1–9; 19:1–10; 23:14–18; 24:9–10, 16–19; 2 Samuel 1:4, 11–12
7	O Le Vaa o Noa: Kenese 6:5, 7–9, 13–22; 7:1–19, 23–24	32	Tavita ma Patisepa: 2 Samuelu 11:1–4, 14–17, 26–27; 12:1–7, 9, 13
8	Ua Laveaiina le Aiga o Noa: Kenese 8:6–13, 15–17	33	Tupu o Solomona: 1 Tupu 2:1–4, 12; 3:3–28; 6:1
9	O Le Olo o Papelu: Kenese 11:1–9; Eteru 1:1–3, 33–43	34	Reopoamo: 1 Kings 11:43; 12:1–21
10	O Le Feagaiga faa-Aperaamo: Aperaamo 1:1–4; 2:6–13; Kenese 17:1–7	35	Elia le Perofeta: 1 Tupu 17; 19:11–12
11	Aperaamo ma Lota: Kenese 13:1–13; 19:1, 15–17, 24–29	36	Elia ma Perofeta Pepelo a Paala: 1 Tupu 18:16–18, 21–39
12	Aperaamo ma Isaako: Kenese 22:1–18	37	Ua Faamaloloina ia Naamanu: 2 Tupu 5
13	Isaako ma Repeka: Kenese 24:1–4, 7–20, 61–67	38	Elisaia ma le Fafine ua Oti Lana Tane: 2 Tupu 4:1–6
14	Iakopo ma Esau: Kenese 25:21–34; 27:1–23	39	Isaia ma Hesekia: 2 Tupu 18:1–7; Isaia 36:1–2, 4, 13–15; 37:1–7, 15–21, 33–38; 38:1–7
15	Iakopo ma Rasela: Kenese 29:1–2, 10–30	40	O Valoaga a Isaia: Isaia 1:17–19; 2:2–4; 11:6–10; 53:3–5; 55:8–9; 58:6–14
16	Ua Suia Iakopo ia Israaelu; Ua Faatau Atu Iosefa i Aikupito: Kenese 35:9–12; 37:3–14, 18–34	41	O Iosia ma Esera o Ioo Faitau i Tusitusiga Paia: 2 Tupu 22:1–4, 8–13; 23:1–4, 24–25; Neemia 8:1–8
17	Iosefa i Aikupito: Kenese 39:1–4, 7–20; 40:1–3, 5–8; 41:1, 8–12, 14, 29–36, 39–40	42	Salamo ma le Faataoto: Salamo 1:1–3; 19:1–3; 24:1–4; Faataoto 3:5–6
18	Ua Faamagalio e Iosefa: Kenese 42:3–16; 43:15; 44:1–12, 18, 33–34; 45:3–8	43	Eseta: Eseta 2:5–9, 17; 3:2–13; 4; 5:1–8; 7; 8:3–11, 17
19	Soifua mai ma le Valaauga o Mose: Esoto 1:8–14, 22; 2:1–6, 10–21; 3:1–14, 19–20; 4:10–12	44	Iopu: Iopu 1; 19:13–26; 27:2–6; 42:10
20	O Mala: Esoto 7:10–14, 20–21; 8:6, 17, 24; 9:6, 10, 23; 10:14–15, 22; 11:5; 12:30–32, 41–42	45	Ieremia: Ieremia 1:1, 4–9; 18:1–6; Isaia 64: 8
21	O Le Faigamalaga: Esoto 14:5–16, 19–31	46	Malumalu o Solomona: 1 Nofoiga a Tupu 28:20; 29:6–9; 2 Nofoiga a Tupu 5:1; 6:1–3
22	Na Maua e Tagata Israaelu le Manai mai le Lagi: Esoto 16:1–8, 21–31, 35	47	Tanielu ma Meaai a le Tupu: Tanielu 1:1, 3–20
23	O Poloiga e Sefulu; le Gata Apamemea: Esoto 19:1–5, 20; 20:1–17; 31:18; Numera 21: 4–9	48	Sataraka, Mesako ma Apeteniko: Tanielu 3:1, 4–30
24	Afafine o Selofeata: Numera 27: 1–7	49	Tanielu ma Leona: Tanielu 6
25	Iosua ma le Taua i leriko: Iosua 1:1–11, 16–17; 2:1–6, 14; 3:5–9, 13–17; 6:1–5, 13–16, 20, 23; 24:14–18	50	Iona ma le I'a: Jonah 1; 2; 3:1–5
		51	Mau faaopoopo: Amosa 3:7; Nauma 1:7; Sapakuka 3:19; Sefanaia 3:16–20
		52	Malaki: Malaki 3:8–12; Malaki 4:5–6



Saunia e Rosemary M. Wixom

Peresitene Aoao o le Peraimeri

O Le Auala Faaofuofu o le Manumalo

“E, le silisili ese naua o le fuafuaga a lo tatou Atua” (2 Nifae 9:13).

Ile taimi o le tautotogo, sa ma auai atu ai ma lo'u toalua i le taaloga lakapi faa-Amerika a le tama tama a le ma tama e fa-tausaga le matua. Na fiafia tagata uma ao taufetuli atu tamaiti i soo se itu e tuli le polo. Ina ua ili le faaili mulimuli, e lei iloa e tagata taaalo po o ai ua manumalo ae po o ai ua faina. Sa na o lo latou taaalo lava i le taaloga.

Na talosagaina e faiaoga o au ia le au taaalo e faatalafo ma le isi au. Ona matou iloa atu lea o se mea mataina. Sa valaau atu le latou faiaoga e fai se auala faaofuofu o le manumalo.

Na tutu i luga matua, matua o matua, ma soo se tagata

na o mai e matamata i le taaloga ma faatulaga ni laina se lua e faafesagai le tasi ma le isi. Ona siiina lea i luga o latou lima ma fatuina se faitotoa faaofuofu. Na feei tamaiti ao latou tamomoe atu i lalo o lima o tagata matutua o loo faamalo atu ma agai atu ai lava i le ala.

E lei umi ae filifili foi tamaiti mai le isi au e auai i le fiafia. Na faamalo uma atu tagata matutua i au taaalo uma ao latou tamomoe atu i le auala faaofuofu o le manumalo.

I lo'u mafaufau sa ou iloa atu se isi ata. Sa ou maua le lagona o loo ou vaai atu i nei fanau o ola i le fuafuaga a le Tama Faalelagi na fatuina mo tamaiti uma. Sa latou tamomoe i le ala lauiti ma vaapiapi, i lalo o lima o tagata e alolofa ia i latou. Na lagona e tamaiti taitoatasi

le olioli ina ua i ai i le ala.

Sa “fai e [Iesu Kerisol] le ala ma taitai mai” mo i tatou taitoatasi.¹ Afai tatou te mulimuli i Lana taitaiga, o le a tatou toe foi uma atu i lo tatou aiga faalelagi ma saogalemu ai i aao o le Tama Faalelagi. ■

FAAMATALAGA

1. “Ma'eu le Poto ma le Alofa,” *Viiga*, nu. 109.



Aoao atili e uiga i le autu o le Peraimeri o le masina lenei!

Na Saunia e le Tama Faalelagi se Auala mo Au e Toe Foi atu ai ia te Ia

Ae tatou te lei o mai i le lalolagi,
na tatou ola i le lagi ma lo tatou
Tama Faalelagi ma Lona Alo,
o lesu Keriso.

Na tuuina mai e le Tama Faalelagi
Lana fuafuaga mo i tatou. Sa tatou
filifili e mulimuli i le fuafuaga a le Tama
Faalelagi ma o mai i le lalolagi.

E alofa le Tama Faalelagi ia i tatou ma e
finagalo ina ia tatou toe foi atu ia te la. Na
la auina mai Lona Alo o lesu Keriso, e faaali
mai ia i tatou le ala ma fesoasoani ia i tatou e
toe foi atu ia te la.

Tatou te mulimuli i le ala e toe foi atu i le Tama
Faalelagi e ala i le:

ia papatiso ma faamauina,

taumamafa i le faamanatuga,

Pe a tatou toe foi atu i le Tama
Faalelagi, o le a la taliaina i
tatou ma aao mafola!

ma ola ma
le faatuatua.

osia o feagaiga
o le malumalu,





O SE ALA MO AU

Fai se pepa lautele o i ai se savali e sui i lou ala e toe foi atu i le Tama Faalelagi. Tusi se auala i luga o le pepa lautele o i ai se savali po o le pepa lautele o le laupapa. Fai i se tagata matua e fesoasoani ia te oe e oti ese ia tamai ata ma faakelu pe faapipii i se mea faapipii i luga o le ala. Faaopoopo i ai ata pe tusi ni ata o oe lava i taimi faapitoa e pei o le papatisoga.

O LE A E MANAOPIA:

O se fasi pepa po o le pepa lautele o le laupapa
Seleulu
Kelu pe faapipii
Valigao, peni maka, po o penivali/penitala

PESE MA LE MAU

- “Na la Auina mai Lona Alo” (*Tusipese a Tamaiti*, 20–21)
- Ioane 3:16

MANATU MO TAU-TALAGA FAALEAIGA

O lenei savali e faamalamalamaaina le fuafuaga a le Tama Faalelagi i se auala faigofie lava. E mafai ona e tuu atu i tagata o le aiga ia auauai i le faaao-gainai o mea faitino e faamalamalama ai ia vaega eseese o le fuafuaga. Ona mafai lea ona outou talanoa faatasi e uiga i le auala e mafai ona fesoasoani ai le tasi i le isi ia tumau i le ala e tau atu ai i le Tama Faalelagi.

O au lenei!




Muai olaga




Ia oofu i ofutau atoatoa o le Atua




Maua le meaalofa o le Agaga Paia



Tausi poloaiga



Aso o lo'u papatisoga



Tu atu mo le mea sa'o



O le a ou mulimuli ia lesu Keriso




Ou te ulu i ai i se aso




Ou te toe foi atu i le Tama Faalelagi!



O Le Tusi A Mamona



Lou aiga i le lumanai



Toetu

E MAFAI ONA IA VAAI IA TE AU?

Na saunia e Teresa Starr

Ole taeao lea ao lei auai atu lou atalii, o Tanielu, i lona aso muamua i le aoga faataitai, ma sa i ai ni nai ona popolega e uiga i le tuua o le fale e auai i le aoga. Sa ou manao ina ia mautinoa na ia lagona le saunia e fetaiai ma luitau i le "lalolagi moni." Sa ou fai atu ia Tanielu o le a ou matua misia lava o ia a o aluese atu. Sa ou faamautinoa atu ia te ia e ui lava sa le mafai ona ou i ai faatasi ma ia i le aoga, ae na te le manaomia lava ona lagona le fefe po o le tuuatoatasi aua o le a puipuia o ia e lona Tama oi le Lagi. Sa ou faamanatu atu ia te ia e mafai ona ia tatalo i soo se taimi, i soo se mea ma o le a faafogfa mai le Atua ia te ia i taimi uma.

A o ou talanoa atu, sa faalogo ma le totoa ia Tanielu, lea e lei atoa lelei lona lima tausaga. Ina ua mavae ni nai manatu sa ia tali mai ai, "Mata e mafai Ona Ia vaai mai ia te au pe a ou i ai i lo'u fale?"

"Ioe," sa ou faamautinoa atu ia te ia.

"Mata e mafai ona Ia vaai mai ia te au pe a ou i ai i fafo?" o lana fesili mai lea.

"Ioe, e mafai ona Ia vaai mai ia te oe i taimi uma," o lau tali atu lea.

Faatasi ai ma se vaaiga o le fiafia, na tamoe vave atu Tanielu i tuafale. Sa ou taotao atu lava i ona tua. Sa tilotilo atu i luga Tanielu i le lagi lanumoana e leai ni ao ma fesili mai, "Afai ou te tilotilo i luga o le lagi ma ataata atu, mata Na te vaai mai ia te au ma Ia toe ataata mai?"

Na le mafai ona ou tautala ona o le mea na



*Na tamoe mai
Tanielu i le
fanua ma fesili
mai ia te au,
"Afai ou te tilo-
tilo i luga o le
lagi ma ataata,
mata e toe ata-
ata mai le Atua
ia te au?"*

ia fai mai ai na ou lagona ai le ootia tele, ae na luelue atu lou ulu, "Ioe!"

Sa tilotilo atu pea i luga, i le taimi la lea ua tau pulapula ona mata, ma se faatuatua atoatoa faatamaitiiti, na fesili mai ai Tanielu ma le manatunatu, "E mafai ona ou Vaai ia te Ia?"

"Atonu e mafai ona e vaai ia te Ia," o lau tali atu lea, "ae o le a e iloa o loo i ai o Ia iina aua o le a e lagonaina Lana ataata i totonus o lou loto."

Na tu Tanielu ma ataata a o ia tilotilo atu i le lagi. Mai le vaaiga ma le toafilemu i ona foliga pei se agelu, na ou iloa ai o loo ia lagonaina lena ataata faalelagi i le loloto o lona agaga.

Mai gutu o tamameamea tatou te aoao ai le tele o mea e uiga i le faatuatua mama—le faatuatua tatou te faamoemoe o le a latou pipii atu i ai e faavavau. E mautinoa lava lo latou iloaina e ui e lelei le olaga, ae e faigata i nisi taimi. Matou te tatalo ina ia fesoasoani lo latou faatuatua ia i latou e onosaia [na taimi faigata].

Pe a oo mai taimi faigata i lou olaga, ou te manatua le faataitaiga a Tanielu, ma faatasi ai ma le faatuatua faapei o se tamaitiiti lea e mafai ai e se tagata matua ona mauaina i totonus, ma o le a ou vaavaai atu foi agai i le lagi ma fesili atu, "Mata e Mafai Ona Ia Vaai mai ia te Au?" Ona, faapei lea o Tanielu, ou te mafaufau ai lemu, "Mata E Mafai Ona Ou Vaai ia te Ia?" A o ou mafaufau i le tele o Lona alofa mutimutivale agamalu i lo'u olaga, ua faamautuina mai ai e le Agaga Paia lou lagonaina moni lava o le alofa o le Tama Faalelagi. O le toe faafouina o lou faatuatua ma le uunaiga i le faamoemoe, ua faamautinoa mai ai e le Agaga ia te au o le a le mavae ma au le alofa o le Tama Faalelagi. ■

E alala le tusitala i Iuta, ISA.



HAROLD B. LEE

O Harold B. Lee na aoao i lona laititi lava ina ia iloa le Agaga. I se tasi aso na amata ai ona ia agai atu i nisi o **fale** ua malepelepe, ae na valaaui lona igoa e se leo ma ta'u atu ia te ia e aua nei alu iina. Na usitai ia Harold. Na faaauau pea ona ia mulimuli i le Agaga i lona soifuaga atoa, e pei o le taimi na ia taitaina ai le **Polokalama Uelefea a le Ekalesia**. Sa ia taitaia foi le matagaluega o le Ekalesia lea na atiaeina ia **punaoa mo aoaoga** ina ia fesoasoani i tagata ia iloa le Agaga i o latou lava olaga.

O Loo | Ai Foi | Lenei Lomiga

MO TALAVOU MATUTUA



i.42

Tumau ma le **Lelei**

E le tatau ona tatou faamoemoe e sosola ese mai o tatou tofotofoga e ala i le folafola atu i le Alii o le a tatou faamaoni i taimi uma. Nai lo lena e tatau ona tatou fuafua e tumau ma le lelei, ona faamanuiaina ai lea o i tatou.

MO LE AUTALAVOU



O VAEGA UMA E LUA O
LE FAAMANUIAGA

i.60

O a faamanuiaaga e oo mai i le faia o talafaasolopito o aiga ma ave igoa o tuaa i le malumalu? Na faasoa mai e nei autalavou mai Niu loka, ISA, o latou aafiaga.

MO TAMAITI



i.69

Tusifolau



Vaavaai mo faailogatusi o le atunuui i totonu o le *Liahona* e faaopoopo atu i lou tusifolau i le tausaga lenei!